

**NATIONAL ASSEMBLY OF
SEYCHELLES**

Wednesday 5th March, 2025

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Lasanble. Bonzour tou manm *secretariat* ki pe asiste nou, tou manm piblik ki pe swiv nou e byenveni pou nou travay lazournen.

Avan nou komanse Onorab Tamboo, dapre lord ki nou'n etabli si ou bezwen adres Lasanble avan nou komans sesyon ou bezwen demann permisyon Speaker avan, koumsa mon kapab rekonnet ou ler mon antre. Pour lemoman mon ti'n demann ou en *apology* an ekrir yer e mon pa'n gannyen.

Alor mon pe demann ou pou, ou bezwen fer li. Mon pe demann ou pou kit lasal ziskan ler ou a fer li. E ler ou fer li ou kapab antre dan lazournen si non ou ava antre demen.

Mersi, silvouple si ou pe adres sa al fer ou *apology*.

Par sinyorite mon rekonnet *Chief Whip*.

HON SYLVANNE LEMIEL

Bonzour Mr Speaker, tou mon bann koleg Manm Onorab. Mr Speaker, letan ki ou'n demann enn nou Manm pou fer en *apology* an ekrir pou ou.

Nou ti a kontan konnen anba ki *order* ou pe demand li pou fer sa? *Thank you*.

MR SPEAKER

Mon'n fer li anba lotorite Speaker, pou kontrol Lasanble dapre son zizman, mersi.

Nou a kontinyen avek deba Lasanble. Mon pa pe pran *point of order* ki pe zis retard Lasanble.

Nou a komans Lasanble avek deba Onorab Rocky Uranie. Ou annan laparol.

HON ROCKY URANIE

Mersi Mr Speaker, permet mwan pou mon dir, zwenn lezot mon koleg pou remersye Onorab Rachel Spiro, *MNA* sortan pou *US*. E osi sa 2 lezot koleg *MNA* ki'n sorti pou *LDS* e swet la byenveni Onorab Cecile Larsen, lo nou kote latab e Onorab Sultan, e Onorab Bijoux.

Bonzour pep Seselwa, bonzour tou zabitan Zil Pros. Pe al fer 5an depi Gouvernman *LDS* i o pouvwar, premye diskour Prezidan Ramkalawan ti anvoy nou mandyan bann

zengredyen debaz ki servi dan nou lakwizin toulezour. Me sa letan leskiz ti kof vid e *COVID*, kantmenm tou levidans in ganny montre ki kof pa ti vid. I ti osi deklar pei kales kase. Me zis detrwa mwan pli tar, apre fer nou krwar napa larzan, i koup tou sipor sosyal. Zot ti deside donn zot lekor bann gro *allowance* parey *allowance* palto, ledan, linet e lezot ankor.

Ler nou Seselwa ordiner pe bezwen trimouse pou kapab pey nou prop linet e lager pou fer debout zwenn. Zot ti'n byen aranz zot, pou servi parol ex-Onorab Wallace Cosgrow.

Zot ti osi frenm *URS* ki ti la pou ed bann zenn ki ti lo sibstans, e pe swiv program *Methadone*. *URS* ti donn zot en pti lanplwa zot osi an retour kapab rann servis lakominote. Sa program ti osi ganny servi koman tranzisyon pou ed bann lezot sitwayen ki pe esper lanplwa.

Nou annan plizyer *success story* dan lepase, kot bann ki lo *URS* in reisi antre dan lanplwa formel e menm pran bann pozisyon eleve dan servis piblik e menm prive.

Ozordi nou vwar plizyer nou dimoun ki lo sibstans dan Sesel. Senpleman aköz ler zot in fini pran *methadone*, zot napa en lanplwa. Bann landrwa travay pa oule pran

zot e la alor zot vire dan lenzirditan e retourn lo *ghetto*. E fer bann lezot aksyon kriminel, parey vole. Kekfwa zot pa ti ava pe al pike lo lans e vol touris, parey in ganny dir par en Onorab lo lot kote latab.

La Digue nou vwar, La Digue nou ti abitye vwar zot pe netwaye, kit landrwa prop. Ozordi nou kriye landrwa i sal, lafot se sa Gouvernman iresponsab.

Bokou zenn i ankor pe ganny difikilte ganny lanplwa kantmenm tou sa bann *advert* i ganny fer. E la, bokou i kontinyen antre dan biznes ilegal. Lekel lafot? Lafot se sa Gouvernman iresponsab.

Ou kapab donn *drug dealer* tou kalite *warning* ki ou anvi. Me si napa striktir apropiye pou ed zenn, nou pou kontinyen ganny menm problem. Zot in *fail* e zot pe kontinyen *fail*. Zot pe fer *back turning*, zot pe mars *forward* par ledò.

Kou lavi. Seselwa e sirtou pep Digwa in santi e pe kontinyen santi kou lavi, ki'n ariv en limit ki *LDS* li menm nepli konnen ki pou fer e Prezidan pe met blanm lo tou keksoz e tou dimoun konmkwa i annan ki met en lipye lo fren, i annan en lanmen lo fren armen. Olye pran responsabilite koman en

Gouvernman pou fer desann kou lavi.

Annou pa bliye, sete li menm *Ex-Leader* Lopozisyon ki ozordi Prezidan Wavel Ramkalawan, ti koz bokou lo pri lavi e kritik Gouvernman avan konmkwa pa pe get malere. E si li i vin o pouvwar, i pou fer desann kou lavi ki tre o, sirtou lo Zil Pros. Me ziska la, nanryen.

Kot sa Gouvernman dizour in ganny tou mal ankor, se ler ex-Minis Finans, Naadir Hassan, ki'n byen aranz son lekor apre ki in deside taye apre ki'n *fail* pou fer desann pri lavi. E in menm kontrandi son Prezidan *an disant* ki pri lavi pa desann, sa i en lenvansyon politisyen.

Eski i ti pe dir nou menm ki son Prezidan Wavel Ramkalawan i en politisyen ki kontan fer bann lenvansyon, pou anbet lepep. Wi ex-Minis Finans in byen dir, aköz Prezidan aktyel Wavel John Charles Ramkalawan, pa oule tann nonmen sa ki apel kou lavi. I annan milyon leskiz ki in *practice* pou dir Seselwa.

Antretan nou dimoun i ankor pe mor lo kredi e pey det magazen par pti bout. Si travayer i ganny peye le 25, ler i dir ou le 30 zot in fini fay finansyerman, larzan in fini disparet.

Mon konn tre byen sa ki mon pe dir, aköz plizyer in vin

rann lapel kot mwan pou eksplik mwan zot sityasyon, e difikilte finansyel ki zot ladan.

Koman *MNA* mon fer sa ki mon kapab parey lezot mon bann koleg lo mon kote latab. Blanm boutikye ki ankor pe servi *calculator* i pa pou rezourd kou lavi sirtou ler en lakonpannyen parey *STC* ki sipoze fer keksoz, bann pri komodite a en pri pli afordab i fer en profi enorm. Plis ki R60 milyon lo ledö malere, apre *CEO* i taye.

Lepep in fatigue avek zot. Fristrasyon, traka e lafatig Prezidan pou fini Septanm sa lannen. Zot in *fail* e pe kontinyen *fail*. En lot gro bat latet, se apre ki ex-Minis Naadir Hassan, ti prezant nou pli gro bidze dan listwar Sesel. Sa boug, ni menm 1 mwan apre i anmas son pake, i maron kot i pou al ganny plis larzan. E menm landrwa kot in aranze dan son faver.

I ti devret la pou defann son gro bidze. I annan loder koripsyon byen for la, ki Seselwa fodre get byen.

Biznesmenn, antreprenner e Seselwa ordiner in konfize e pe demann zot lekor kestyon lo sa size. Sa kalite trikmardaz pa pe enspir konfyans dan okenn biznesmenn, antreprenner e Seselwa ki nepli dormi boner. Manke i annan ankor ki ti anvi taye, me zot in ganny dir pa fer

akoz sa pou fer dimoun pli fristre e pli fatige avek sa Gouvernman.

Seselwa ki ti vot sanzman, sa menm sanzman ki pa'n anmenn okenn transformasyon. Plito in vin en lanflanmasyon e Seselwa pou met zot deor ater Septanm 2025 avan ki zot ganny en konstipasyon.

(APPLAUSE)

HON ROCKY URANIE

Prezidan, Wavel John Charles Ramkalawan, in konfirman li menm ki i fatige e in konpran ki Seselwa i fatige avek li osi. Fer lapenn vre.

Fer tou sa ki ou le, la kot in arive *Mr President*, in tro tar. Ou'n anmer dan labous tou dimoun, e sirtou bann ki ti vot pou ou e krwar dan ou parol. Koman en dimoun i fer en konversasyon avek mwan, nek zot demande ki kalite Prezidan ki les son pep soufer.

Zwer i viv aletranze e vin vakans Sesel. In vin parey en *influencer* ki pe ankouraz dimoun pou vwayaze olye get vre problemm pei e travay pou anmenn en meyer Sesel pour Seselwa. Tou sa vwayaz i vin avek bann benefis personnel pour li menm.

Son bann *allowance* ki akimile pour tou sa vwayaz, ti'n kapab fer plizyer lakaz pour Seselwa. Sirtou Digwa, ki

pandan sa 5an pa'n vwar okenn lakaz ganny konstri. Me zis promes. En promes fer lannen pase par *Ex-Minis Naadir Hassan*, dan bidze pour 2025. Ti dir ki lakaz *emergency* e osi lakaz abordab lo later *Ex St.Ange* pou ganny fer. Me ziska la, tousala i envizib.

Mon'n deza dir e mon pou repete. Frer, ser Digwa *Ex St.Ange* i sa landrwa par anba Chateau St Cloud, en landrwa ki annan lanmar lo de kote. Si ti pou vreman fer lakaz sa lannen lo La Digue dan sa landrwa, depi lannen avan sa teren ti'n devret fini ganny netwaye, plati e konble pou fer sa teren vin enn ki vreman soutenab pou konstriksyon lakaz. Ziska la zero.

Zot ganny tou mal e Digwa nepli kapab kontinyen fye lo en promes ki dan divan. Fotespere zot pa vin met okenn premyer pou bat latet avan eleksyon.

Digwa in ganny met retar kot lozman i konsernen, tou fason zot pa pou la apre Septanm. Nou pou montre zot ki mannyer i fer lakaz. Gouvernman avan i annan rikord pou konstri lakaz, apepre 300 par lannen. Me sa Gouvernman *LDS* li depi 2021 ziska 2024 in fer li 287 unit, ki vedir an mwayenn apepre 72 par lannen sa. Sa ti ganny dir dan bidze lannen pase.

Sa i fer ki proze lakaz an zeneral Sesel, in vin en *failure*. E sa pou fer ki plis dimoun pou akimile lo lalis ki pe rod lakaz e zot pou esper ankor bokou plis letan si zot vot pou sa kalite Gouvernman kapitalis liberal ankor.

Seselwa pa krwar dan *no turning back*. Akoz i vwar zot pe mars *forward* par ledò. Zot pe fer *back turning*.

I annan plizyer bon program pou devlopman pei, ki Gouvernman lepase ti egzèkite, e ti anmenn plizyer devlopman e lepanouisman pou nou Seselwa e biznes. E an rezilta, pei ti pe devlope gradyelman dan en fason konsistan. La ler nou gete, nou vwar keksoz pe al en lot fason. Pe deteryore.

Si nou pran touris, touris in desann. Si ou vwar en Prezidan i konpar la kantite touris an 2020 ek 2024, i dan problem. Tou ekonomis e matematisyen pou dir ou ki 2020 pa en lannen ki kapab ganny servi pou fer okenn konparezon pou lakantite touris ki'n vin Sesel. Akoz tou pei ti'n frenm zot lafrontyer akòz COVID e touris pa ti pe vin sa kantite. *Come on Mr President*, person pa dormi boner. Ou ti a kapab servi en lannen *Pre-COVID* pou fer sa konparezon.

Mr Prezidan, i dir nou fodre dir mersi. Mr Prezidan,

aprann dir mersi an premye Gouvernman ki ti la avan. Pa la koman ou'n fer de pti renovasyon, e de pti konstriksyon nou bezwen dir ou mersi. Selman pou ou servi ou parol, ou pa'n zanmen dir mersi Gouvernman 43an pour anmenn Sesel kot i ete ozordi.

Atraver plizyer lenvestisman, sipor sosyal, kiltirel, sportif e relizye pou nonm enn de. Ou'n kontinyen koup riban lo plizyer proze inisye par Gouvernman avan. Ou kontan koupe e ser malere, ler pou ou i kontinyen ogmante. Ou ti koup tou sipor sosyal e fer li vremen difisil pou en dimoun ki bezwen led gannyen akòz tro bokou birokrasi. Rod tou kalite lipou avek dimoun pou zot anmennen, e menm kantmenm zot anmennen zot zefor plizyer fwa i anven.

Dimoun ki bezwen sipor i degoute e plito manz zot margo anmer. Kas zot lekor an de pou fer de bout zwenn, plito ki vin tonm azenou pou ganny sipor sosyal. Larogans pouvwar in fer ou *fail*. Gouvernman deplizanpli nepli efektiv.

Se pourtan i ou bann prop dimoun ki ou'n met dan sa bann landrwa Mr Prezidan. Ou menm ki'n apwent zot dan sa bann pozisyon kle. I annan en gro problem Gouvernans dan ou ladministrasyon.

Ou ti met tou dimoun anba mikroskop ki fer keksoz pli tarde, la prezan blanm travayer servis piblik konmkwa zot pe ser dimoun. *Come on Mr President*, ou pe zis rekolte sa ki ou'n senmen.

Fer onte, fer lapenn ler ou vin fer en SONA, Diskour Leta nou Nasyon pou vin blanm travayer Pralinwa, ki pe fer malis dan biro pe anpes sitwayen ganny *license*. Ou dir zot sere e anpes laplikasyon bouz devan e materyalize. E la ou dir, ou pe personnelman met zot anba ou mikroskop.

Mr Speaker, pou donn i annan plizyer diferan prosedir e menm detrwa antite ki *involve*. Eski tousala pou ganny *bypass* par Prezidan e donn *license* gos dwat aköz eleksyon pe vini. Pre 5an zot sistenm ki an plas, ki pa pe marse. Oli transformasyon ki ou Minis ti pou anmennen?

Prezidan i kontinyen blanm tou travayer eksepte son lekor ek son bann Minis ki ansarz sa bann departman e lazans. Zot in *fail* sa pep.

Ler mon mazin sa ki ou'n dir, mon bezwen riye Prezidan. Be ou, ou pe trouve keksoz Praslin pa pe mars byen. Me selman laba i annan de *MNA LDS*, en *liaison officer* e osi La Digue ou'n met en *liaison officer* e lezot dimoun ki annan gran relasyon avek ou pou kontrol Praslin ek La Digue.

Zot *fail* menm. Zot pa kapab fer keksoz marse.

(APPLAUSE)

HON ROCKY URANIE

Si ou pa ti sey anpes *MNA Churchill Gill* e mwan menm fer nou travay, ozordi keksoz ti pou bokou pli meyer, dan plas inyor nou konpletman e met bann baryer dan nou semen.

(APPLAUSE)

HON ROCKY URANIE

Ou pe rekolte sa ki ou'n semen *Mr President*.

Nou konnen ou fristre. Ou vreman fristre, nou kapab vwar lo ou figir. Vre lakoz pou sa desizyon ki Prezidan Ramkalawan in pran, i aköz son fristrasyon e lafatig. Apre sa move resepsyon ki *LDS* ti gannyen dan blitz Praslin e La Digue. Zabitan ti fer zot foulkan.

Apre plis ki 4an ki mwan menm e Onorab Gill, ti demann plizyer kestyon anmenn plizyer problem e soufrans zabitan Zil Pros, sa Gouvernman pa ti enterese. Me plito boufonn nou e gognard nou isi menm dan sa Lasanble. Tousala in *backfire* dan zot figir, *back turning*.

Kantmenm zot pa envit mwan zot bann vizit e *meeting*, mon konn tou sa ki pase. Ler en pti keksoz i marse, *LDS* pe

travay. Ler i *fail*, ki Onorab Uranie pe fer. Be la keksoz pe *fail* laba Praslin la. Be la zot pa demande ki *liaison officer* pe fer e ki sa 2 *MNA LDS* pe fer lo Praslin. Zot in *fail* e zot pou kontinyen *fail* dan lafason ki zot pe fer keksoz. Se Prezidan li menm, ki responsab pou sa *failure* ki pe arive.

Gouvernman *LDS* i zis fatigue. Son Prezidan pli fatigue. Fer diskour pou fer nou konn leta son lespri olye leta nou pei. Maltret tou dimoun i dan son disan. Maltret tou *MNA*, maltret tou politisyen ki opoz li. Maltret direk bann oponan politik.

Ozordi les mon dir zot Seselwa, parti politik pli for dan Sesel i *United Seychelles*.

(APPLAUSE)

HON ROCKY URANIE

Mon zanmi Mr Prezidan, ou soufer vre. Sa bann pti manev i fay. Sa bann pti manev i fatigue, parey son *Leader* menm. Fer diskour konmsi ou dan *rally*, kan piblik antye pe asize pe ekout ou pou rode ki ou plan pou pei.

Bann viziter entelizan dan galeri i byen dezapwente, pe get Prezidan kot i kontinyen fer son ta gaf. Zwer, olye koz lo kitenge ki byen popiler dan Lafrik e menm bann Manm Parlman lo Kontinan Lafrik zot met kitenge. Balanse Mr

Prezidan, al *google* kitenge ou lespri i ava ouver.

Akoz ou pa rode ki mannyer pou ed Digwa re ganny zot lazwa de viv. Tir presyon lavi lo nou ledò. Aret swazir en pti group dimoun ki pa'n ganny elekte pou konsey ou lo problem La Digue. Zot pe rod zot gen personnel.

Ou'n *fail* e pe kontinyen *fail*. Kantmenm la ou pe taye pou sey bann dernyen pti zefor, ou pa pou sanz nanryen. E les mon dir ou Mr Prezidan, dan en lakours gran zistans ler ou apros laliny finisyon, ou oponan i deza devan ou, kantmenm ou bouz ou lanmen pli vit e ouver ou labous pli gran pou ganny loksizenn. Me ou lipye lo *slow motion*, vedir ou lenerzi in fini.

(APPLAUSE)

HON ROCKY URANIE

Ou zis fatigue. Pa blanm spektater ki dan *stadium*, ki pe sey siport ou.

Ou koz lo faver e *nepotism*. *Club car* pou aktivis ki napa *guest house* ti debark La Digue, Vandredi pase.

Bann operater zot dir mwan zot pa zalou, me selman ler i annan bann *guest house* ki ase lwen, zot propriyeter pe esper en repons ek en desizyon pou zot ganny en *club car*. Zot zefor i anven.

Me la sa enn pou li delivre manze, nennen ek labous ek lopital La Digue, mazorite fwa ki annan zis en pasyan, i ganny en *club car*.

Manke akoz zwer ti mazin sote lo sa bato, alors pou kalme li zot donn li sa ki oule. Sanmenm ki nou apel fer faver e *nepotism*.

Kantmenm Prezidan, ou vin koz lo meritokrasi labous plen. Sa i zis en lipokrizi. Mon swete ki sa larestan ki'n fer laplikasyon, ki zot demann pou *club car* ki pli *genuine* i ava ganny akorde sa menm faver, kantmenm zot merite.

Ler nou pran lasante. Sanmdi le 1 Mars, tou masin dyaliz pa ti fonksyonnen lo Praslin e bann pasyan ti bezwen ganny fer retourn kot zot apre ki zot ti'n travers lanmer. Be non, depi 2an. Pe al lo 2an la depi louvertir lopital La Digue. Ziska la masin dyaliz pa ankor kapab fonksyonnen. Menm si i annan ners kalifye ki kapab fer dyaliz sa bann pasyan.

Ozordi Digwa ki en pasyan dyaliz, i ankor bezwen pe monte desann Praslin dan botan, dan movetan. I menm annan en pasyan ki li i pa kapab avek lanmer dan letan vandswet, i vwar li bezwen kit son lakour al reste Praslin kot enn son zanfann pou plis ki 3 a 4 mwan zis pou li reste

konsistan avek son tretman dyaliz.

La mon'n antann Prezidan dir ki masin dyaliz pou komans fonksyonnen, me i mank mendev. Mansonz, pa vre Mr Prezidan. Problenm pa mendev, i masin ki annan problenm.

MR SPEAKER

Onorab. Mon pou donn ou en *warning* e letan ou servi sa mo mansonz, ou pe fer en lakizasyon ki serye. Ou bezwen evite. Mersi. Kontinyen.

HON ROCKY URANIE

Wi. I pa laverite Mr Speaker.

I pa problenm avek mank mendev, i masin ki annan problenm.

Pasyan ki ganny refer Lopital Sesel pou vin pas anba masin i fer depasman e tou laranzman. E ler ariv Mahe zot ganny dir masin pa bon. E la zot in fer sa traze pou zot lasante anven.

Sityasyon lanbilans, ki en gro problenm. Pasyan ki bezwen lanbilans i ankor bezwen pe *call 151* par Mahe, pou ganny servis lanbilans lo La Digue. E sa i kre bokou retar e fristrasyon. E menm konfizyon sirtou letan i annan *emergency*. I annan kliyan ki'n menm ganny letan perdi lavi akoz ti pe esper lanbilans.

Dokter ler pou al fer vizit pasyan e osi fer fizyo ek bann pasyan kot lakour, i bezwen *call 151* par Mahe e drayver lanbilans toultan i pa ganny call e *go ahead from* Mahe i pa pou kapab deplase e la tou i ganny retar. Gaspiyaz letan pasyan, ners ek dokter. Fristrasyon i akimile. Zot in *fail*. Annou serye avek lasante nou pep.

In ler pou sa Minister vin pli serye e met en laliny telefonn direk pour ki Digwa pa bezwen pas par sa 151. E sa problem i annan plis ki 4an nou pe dir, ziska la nanryen pa ankore ganny fer. Si en pti keksoz koumsa, parey en laliny telefonn pe pran zot plis ki 4an, zot in *fail* e zot pou kontinyen *fail*.

Sanson i dir, en zouvriye i bezwen annan lanmour pou son zouti. Be sa enn zouvriye ki o pouvwar, i en move zouvriye. I blanm tou zouti. Prezidan i blanm tou dimoun, eksepte son lekor. Sel keksoz ki i kapab fer se riy son prop lekor. Me selman ler dimoun i kritik li e riy li, msye pa kontan ditou. Pa bliye, i en fe ki en *clown* i egziste dan *circus* pou fer dimoun riy li apre ki in abiy parey en boufon e pe fer zes.

Lefe *Guinness* i fer ou fer lapriyer an langaz Madanm Seret. Sanmenm sa kalite konportman ki toultan annan lefe negativ lo nou pei e pei i

reste dan boulders. Ou fer vizit kot Lepap Katolik pou ganny benediksyon, an giz bann kreyen Katolik ava tonm dan ou latrap. Apre ki ou menm ek ou dalon ki konnen ki mannyer pou antre dan tou Legliz pou fer vandalizm kantmenm Legliz in ganny take. Parol i sorti dan ou prop labours.

MR SPEAKER

Hold on. Onorab eski ou pe dir Prezidan, in antre dan legliz pou fer vandalizm?

Onorab mon pou demann ou pou ou evit sa bann kalite lakizasyon. Mersi.

Kontinyen.

HON ROCKY URANIE

Bon, nou kontinyen. *Travel.* Dan en letan kot dimoun pe kriye lavi i dir, Prezidan in deside kas rikord *travel* pou *enjoy* son lekor e regardan *formula1* e lezot plezir pou son lekor. Koman i fer en pti tour Sesel i re *take-off* konmsi i reste e travay aletranze e vin vakans Sesel.

Ledikasyon. Deplizanpli rezilta i deteryore. Bokou mankman resours e osi mankman ansennyan. Digwa pe demande kan ki konstriksyon lekol La Digue pou ganny fer. Akoz apre sa ta *meeting* ek vizit nanryen pa ankore ganny fer. Plan parti plan. Promet bann

ansennyan, paran, etidyan nouvo lekòl. Detrwa fwa zot in fer bann ansennyan La Digue anmas tou bann materyo edikasyonnel, met dan bwat kartron akòz in dir zot, zot pe bouze. Apre pas en pti moman letan e fer zot re tir tou, re met lanmenm. I dir akòz personn pa ankor konnen ziska la kan ki nouvo lekòl pou komanse.

La eleksyon i pre, pa kout zot nanryen al met en premye pyer zis pou bat latet.

(APPLAUSE)

HON ROCKY URANIE

Me avek tousala, se bann etidyan e ansennyan ki ganny vremen afekte an premye. Lasaler i akimile dan laklas e ansennyan i bezwen met standing fan dan tou kwen, sirtou lakres.

Long servis allowance ki bann ansennyan in perdi, sa osi in de motiv nou ansennyan. Paran ki bezwen al travay 2 luvraz. Zot pa fer li par ekspre, me akòz sityasyon lavi Sesel in dir. In ser, in difisil e zot vwar zot ganny difikilte pou okip zanfàn. E la zanfàn i devlop bann problemm disiplin e tousala i al reflekte dan lekòl. Zot in *fail* sa pep.

Ler nou pran bann kontra netwayaz. Kontra netwayaz La Digue depi Mars lannen pase ti'n ganny promet

avek bann pti kontrakter, ziska la nanryen. Bann ki deza annan kontra, zot vwar zot pe zis ganny *extension* e bann nouvo aplikan i ankor pe espere. Lekel ki pe trenn lipye alors.

Tou le Desanm e Zanvye nou ganny gro lapli ki tonbe e linondasyon i ariv menm landrwa. Me drenaz avek louvertir i bloke. Si ti donn kontra nou bann zenn, linondasyon pa ti pou lo sa nivo. Drenaz ti ava reste prop, *fireman* pa ti ava pe vin ponpe sak fwa gro lapli i tonbe.

Ler nou pran sport, mon'n deza dir e pou kontinyen dir, si *failure* ti en Minister ti pou sa enn pou sport. Oli vremen sipor pou *sportsman*.

Menm foutbol pe nepli ganny sa kantite lanpler e siporter parey avan. Oli tou sa bann gran plan e koze pou devlop sport, oli sa bann nouvo linisyativ ki ti ganny promet. Tousala i anven.

Nou ti en pei ki ler nou'n ganny en levennman sportif pou organize, byen davans nou ti'n fer lorganizasyon pou met keksoz an plas. Bokou piblisite ti annan. La nou pe koz *FIFA*, sanpyonna mondyal *beach soccer*. Me ziska la blanm pe ganny mete lo en ledò. Be tou sa *Cabinet meeting* ki'n ganny fer, eski Minis pou Sport pa'n ganny

demande ki mannyer lorganizasyon pe ale?

Tou sa *press conference* ki'n ganny fer, eski Prezidan ti'n bliy komikman Sesel pou organiz *beach soccer*. I ti koz lo tou keksoz, me sa ki enportan i pa koz lo la. Toudmenm mwan mon en patriot, mon swete ki tou i al byen, ki nou pei pa mal ganny gete lo lasenn enternasyonal.

(APPLAUSE)

HON ROCKY URANIE

Prezidan i koz lo laliberte lekspresyon e la demokrasi. Selman li menm li ki pa oule dimoun kritik li, e isi menm dan sa Lasanble si ou fer li ou *micro* i ganny koupe si laverite i ofans son met.

(APPLAUSE)

HON ROCKY URANIE

Ti dir pou napa viktimizasyon, me selman si ou kritike ou ganny met dan kaso oubyen fer bann dimoun dan mask vin fouy kot ou pou entimid ou. Oubyen zot vin pran ou telefonn pou fouy lo la.

Zournalis i ganny maltrete, e la tou kestyon ki zot bezwen demann Prezidan fodre dan faver Mr Prezidan. Vre Mr Prezidan in dekonekte. I dir in fer pibliye nmero telefonn ek *email address* tou bann o zofisye, apartir PS

ziska direkter pour ki dimoun i kapab *call* zot oubyen kominik avek zot. Be Mr Prezidan les mon dir ou, dimoun i deza annan nmero telefonn ek *email address* sa bann dimoun, Sesel i deza pti. Dimoun i *call*, zot *email*. Zot *call* ek *email* pa ganny reponn.

E sa bann dimoun se ou menm ki'n apwent dan sa bann pozisyon kle, i ou prop siporter. Menm Minis pa oule reponn telefonn ek *email*. In ariv ek mon menm mwan Mr Speaker.

Pibliy nmero telefonn pa pou rezourd nanryen kot in arive. Zot in *fail* e ankor pe *fail*. Alor dimoun pe demande oli sa sanzman, oli sa transformasyon. Zot pe ganny zis lanflanmasyon.

(APPLAUSE)

HON ROCKY URANIE

Mwan koman en ansyen ansennyan mon konnen ki savedir fer en plan e ki ou bezwen fer pou ou plan marse, e ariv lo sa lobzektif ki ou'n set. Prezidan pa'n kapab etal son plan devan Lepep Seselwa. In plito maltret tou dimoun pou sey tir son fristrasyon e lafatig ki lo li.

Prezidan i kontradir son lekor dan son prop diskour. I koz respe e li menm li mank respe pou tou dimoun atraver son diskour. I koz linite,

selman i fer diskour ki pou anmenn divizyon e lanmertim dan nou pei.

Mr Prezidan mon konsey ou pou aret riy ou prop lekòr, ou ladministrasyon in *fail*. Septanm Seselwa pou met *United Seychelles* o pouvwar e LDS pou dan vin listwar.

(APPLAUSE)

HON ROCKY URANIE

Mr Prezidan koumsa ou ava ganny tou ou letan, apre ki ou'n ganny met deor pou *enjoy* ou vakans ek ou *retirement* aletranze. Mwan, mon fyer mon en *US* e La Digue pou reste toultan *US*. *Fearless in dignity*. Mersi Mr Speaker.

(APPLAUSE)

MR SPEAKER

Mersi Onorab. Laparol pour Onorab Desheila Bastienne.

HON DESHEILA BASTIENNE

Mersi Mr Speaker. Bonzour Mr Speaker, bonzour tou koleg Onorab, bonzour tou dimoun a lekout e en gran bonzour pou zabitan Perseverance.

Mr Speaker, i avek bokou loner ki mon aksepte sa privez pou donn mon reaksyon lo Leta Lanasyon, delivre par Prezidan Wavel Ramkalawan, Zedi 27 Fevriye isi dan sa Lasanble.

Mr Speaker, an premye mon oule *welcome* nouvo Manm Onorab, dan nou *Caucus LDS* e osi nouvo Manm Onorab, lot kote Parti *US*. Permet mwan dir en gran mersi Onorab Flory Larue e osi Onorab Naddy Zialor, ki'n fer en travay eksepsyonnel dan nou *Caucus*, e mon swet zot tou de bon dan zot travay kontinyel dan devlopman nou pei. Mon osi swet Onorab Spiro, tou de bon dan son fitir karyer.

Mr Speaker, diskour Prezidan Ramkalawan ti en diskour direk e kler. E tou sa ki'n ekout sa diskour in konpran tre byen kwa ki Gouvernman *du jour* ti pe met devan Lepep Seselwa.

Son bann *achievement* pandan sa 5an ki in pran pouvwar, son lalit ansanm ek son *Cabinet of Ministers* pou arive remet Sesel lo son de lipye. E in osi koz kler lo bann defi ek bann aksyon iresponsab ki'n seye pou met retar pei. E osi son vizyon pour lefitir apre ki *LDS* pou repran sa eleksyon ki pe vini an Septanm 2025.

(APPLAUSE)

HON DESHEILA BASTIENNE

Mr Speaker, mon pou plifere komans avek sa lalit pou remet Sesel, lo son de lipye Mr Speaker, Sesel ti ganny beni

avek en Prezidan le 25 Oktob 2020, ki i pran sa pei a tan e fer tou dan son pouvwar pou lse pouse pou met sa pei debout avek en kof demi vid rantre dan en lepidemi COVID ki ti fors bokou lendistri pou *stand still*.

Met en stop lo mouvman touris pa ti en leksperyans fasil pou fer marse en pei avek tou sa lamizer nwar ki i ti'n erit.

Mr Speaker, sa ki ti donn Seselwa lespwar ki nou pou sirviv sa sityasyon sete letan dimoun ti swadizan pli savan ki ti rekomande ki erport i fermen.

En Gouvernman determinen ki ti'n pare pou donn pep Seselwa en meyer lavi ti debout for e gard nou erport ouver pou ki touris ki ti'n pran zot vaksen zot ti kapab rantre Sesel. E vin pas en moman dan sekirite e lwen avek sa lepidemi.

Mr Speaker, atraver en tel desizyon parey ki'n ede pou arive fer tou dimoun al avek en saler dan lakour e tou nou bann dimoun aze ganny zot pansyon ek sekirite sosyal plen e a ler. Pour sa, nou pou dir ki nou Prezidan ti vin o pouvwar pou travay dan zentere Lepep Seselwa. Me non pa pou son plezir personnel.

Mr Speaker, apre en pa byen kalkile kot Prezidan ti al

tap laport pou ganny vaksen e anpes Lepep Seselwa ganny enfeste avek COVID19. I ti montre son lanmour pour sa pep par pran vaksen an premye, lo medya sosyal pou tou dimoun *witness*. E sa ti donn li plis loportinite pou kontinyen al tap laport pou relev nou lekonomi. E osi al negosye bann det ki Ladministrasyon SPPF, Lepep, US ti'n met Sesel ladan.

Mr Speaker, apre ki laplipar popilasyon Seselwa ti'n pran zot vaksen. Ki'n ankor ti ganny dir par bann savan Lepep US pou pa bezwen al pran sa vaksen, Seselwa ti santi zot soulaze. E ti pare pou leve pou al debourye pou zot kapab kontribye lekonomi nou pei.

Biznes ti komans releve, dousman viziter ti ogmante, avyon ti komans retournen e bato ti komans ranpli dan nou por apre ki zot ti remarke ki nou annan en Gouvernman responsab. Ki met son pei ek lavi son pep an premye par pran bann bon desizyon pou anpes COVID propaze.

Ozordi Mr Speaker, mon pou dir fyerman pou sa kalite Gouvernman ki nou annan depi Oktob 2020, kot in tir Sesel e fer li ariv kot i ete ozordi. Mon pou dir avek Lepep Seselwa "*No turning back*".

ALL LDS MEMBERS

“kit li lanmenm”.

(APPLAUSE)

HON DESHEILA BASTIENNE

Mr Speaker, Sesel i bezwen en drayver solid e sa drayver i pa lot ki Wavel John Charles Ramkalawan. Apre ki Gouvernman ti vwar li nesese pou pran serten desizyon pa popiler, pou arive met bann bout ansanm serten dimoun ti pas zot letan kritike. Akoz pou zot sa gro saler, bann gro *allowance*, *fuel* ki ti zot priyorite nimero 1.

Mr Speaker, ti annan bokou lemozite. Seselwa ti ganny ankouraze pou desann e fer lamars, me zot ti *fail*.

Mr Speaker, nou Gouvernman pa ti taye ni *walk out* dan *State House*. I ti pli vomye reste pli for e pli determinen pou Sesel. Alor i ti kontinyen lo son misyon ek son promes pour donn Seselwa en meyer lavi e anmenn plis devlopman dan pei. Gouvernman ti aksepte kritik, i ti travay lo zot bann mesaz negativ e transform li dan pozitivite.

I pran zot bann *curse* e transform li an *blessings*. I ti reste *focus*. Lensilt ti glise parey lapli lo fey sonz. E laport lo nivo nasyonal koman enternasyonal ti ouver pou li,

e son bann demann pou lentere pei ti ganny akorde.

Mr Speaker, apre tou sa bann bon travay prop e transparan, lekonomi Sesel in re fleri. Saler in ganny ogmante 3 fwa, sekirite sosyal in ganny ogmante. Latizann dan lopital i annan e tou dimoun pe ganny zot latizann.

Lokipasyon napa dra in tennyen, dra in deborde lo *cabinet* lopital.

(APPLAUSE)

HON DESHEILA BASTIENNE

Lili nef ek matla nef in alinyen deor dan koridor.

Wi Mr Speaker, mon fek pas obor Lendi bomaten an sortan kot *oncology*. Mon pa ti zwenn lera dan koridor, mon ti war lili nef ek matla ki'n alinyen. La ki bon tir portre pou met lo medya sosyal.

Marsandiz dan *STC* kot Gouvernman i annan kontrol lo la, in desann e pe kontinyen desann.

Viziter i kontinyen antre dan nou pei, malgre serten zot pe servi *AI* pou fer *video* e sali repitasyon Sesel. Plis avyon enternasyonal pe montre lentere pou vin Sesel. Zot bann konplo sal pou met lafreyer dan viziter pou pa vin Sesel pa pe marse. Lepep Seselwa pe note e alor nou dir “*No turning back*”.

ALL LDS MEMBERS

“kit li lanmenm”.

(APPLAUSE)

HON DESHEILA BASTIENNE

Mr Speaker, parmi nou bann defi, Prezidan in koz lo fason delivre dan travay e osi lo trenn lipye.

Mr Speaker, tou dimoun i konnen ki *motto* nou ti servi an 2020 ziska ozordi. Mon a fer zot mazinen, bann ki pe zwe bliye “Sesel pour tou son zanfan”.

Mr Speaker, ki nou ti vwar an 2020? Prezidan ti sanze, Vis Prezidan ti sanze, Minis ti sanze, me tou lezot dimoun ti reste dan zot landrwa travay, dan zot post. Personn pa ti ganny pouse.

Sa ki’n ale, in al lo li menm. I pa’n anvi renouvle son kontra, i pa’n anvi travay avek sa Gouvernman pou son prop pei ek son fanmir. Sa ti son swa. Me eski ozordi nou kapab dir ki kantite zot ki’n onor zot komitman e fer zot travay avek lanmour.

Mr Speaker, annan bokou kestyon. Eski zot in reste pou revanz? Pou fer malis? Pou bloke? Pou detri sa Gouvernman? Eski zot pe pran *advice* avek zot *Leader* ki mannyer pou sere e fer sabotaz?

Pa donn zenn zot san ki zot merite, les zot kriy lasasen

pou ki zot a reste fristre. Pa les bann tel proze bouze pou ki Gouvernman a ganny gete koman enkonpetan. Pa donn li travay, servi leskiz ki sa aplikan napa leksperyans.

Be mwan, mon demann mon lekor ki mannyer en zenn pou ganny leksperyans si nou pa ed li, si nou pa anploy li e *train* li e montre li travay. Kote leksperyans i antre la.

Mr Speaker, mwan personnelman, mon ti ganny leksperyans travay *on the job*. Mon ti napa leksperyans ler mon ti rantre travay avek *Barclays Bank*, sa letan. Mon ti aprann dan travay e mon ti travay pou *Barclays Bank* pou 9 an, 6 mwan.

Letan mon ti al *Seychelles Credit Union*, mon ti aprann zot fason travay ankor laba e mon ti travay pou 14an dan sa lenstitisyon. Se la kot mon ti ganny leksperyans travay.

Mr Speaker, napa person ki antre dan en travay pou la premye fwa ki konn tou fason travay en lenstitisyon. Sa bann leskiz se pirman bann plan malisye pou fer dimoun fristre e dezapwente.

Mr Speaker, bann serten travay prive kot lakour, parey servis *child minding* ki ankor pe ganny sere. Sa ki pe ganny penalize, koup lapey pou en senp pti fot, sa ki ganny targete. Tou sa ki zot fer pa

bon menm. *Quota* ki sipoze sorti 10 pou vin 12 zanfan, 4an ankore pe vini menm. Sa i pa akseptab.

Mr Speaker, Prezidan in dir annou larg lanmen Seselwa, annou aret travay malis. Annou aret ser Seselwa, les nou frer ek ser debourye.

Mr Speaker, mon pa pou kapab pa mansyonn bann *job fair* kot i annan bokou *vacancies* ki ganny *advertise* e la osi mon pou demande ki i arive apre en *job fair*?

In ler pou annan en departman serye ki fer *follow up* entans lo sa bann *job fair* pou vwar si vre zot pe pran zenn pou travay. Si vre zot apel sa bann zenn pou *interview*. Ki kantite letan zot pran pou apel zenn Seselwa pou travay. E fer en legzersis pou vwar si vre sa bann landrwa travay i serye e anvi war nou Seselwa ki pe travay, non pa bann etranze.

Si *follow up* serye e entans i kontinyel, nou a vwar si aplikan, aplikasyon pou *GOP* pa pou bezwen desann dan nou pei.

Mr Speaker, annan ankore lezot fason ki pe kre fristrasyon. Sa se deklar *file* en dimoun perdi ouswa lenformasyon in ganny efase dan sistenm or “mon a *call* ou *back*” me zanmen sa *call* i ganny fer. E la osi fodre pa bliy serten *office line*, ki pa pe

reponn ditou par ler. Si ou napa nimero *mobile* sa dimoun, ou pa pe ganny li lo son *office line*.

Mr Speaker, trenn lipye i annan, en kantite bann aplikasyon ki pa ganny reponn. Ni *interview* ki pa zanmen arive. Anba Gouvernman dizour, napa *security clearance*. Pa egziste, i nepli.

Me lafason ki keksoz pe ganny fer, annan pe donn sa lenpresyon ki ou pa pe ganny travay aköz *security clearance*. Malis, kree fristrasyon, fer Gouvernman ganny gete konman enkonpetan ankore. Se sa ki zot bi. Ler tou sa bann keksoz pa marse lafot i mor lo ledò Prezidan.

Me nou, nou dir avek Lepep Seselwa, pa tonm dan sa bann pyez malisye. Ouvre zot lizye, kontinyen persevere, rod zot drwa e nou pou kontinyen dir byen for “*No turning back*”.

ALL LDS MEMBERS

“kit li lanmenm”.

HON DESHEILA BASTIENNE

Mr speaker, letan nou fer en revè lo bann akonplisman pou sa 5an, nou pa pou kapab aret dir mersi en Gouvernman tre responsab e annan Seselwa aker. Anba Gouvernman di zour, tou pti sou ki rantre dan kof Leta, i retourn dan lentere pep

Seselwa dan diferan fason. Tel ki logmantasyon saler, sekirite sosyal e osi pri lavi ki kontinyen desann gradyelman.

Proze lakaz in ganny fer dan preski tou distrik lo Mahe. Nouvo lopital nef lo La Digue, renovasyon lekol *NIHSS* pou formasyon nou bann zenn ki annan lentere pran en karyer dan *nursing*.

Renovasyon lo serten parti nou Lopital Sesel. Renovasyon lo Libreri Nasyonal. Renovasyon lo *Carnegie*, konstriksyon nouvo por lo Praslin e renovasyon lo por La Digue.

Lagrandisman plizyer semen sorti 2 *lane* pou vin 4 *lane*. Nouvo *roundabout* pou fasilite mouvman transpor e byento pep Seselwa pou benefisye avek en fasilite en gran *parking space* vizavi *Catcocos jetty*.

Pep Seselwa, Gouvernman *LDS* pa pe travay menm? Pa pe delivre menm dan sa 5an konmsi? Me **sepoursela** ki mwan mon dir pa les zot ganny anbete, e nou pou dir ankor 1 fwa byen for "*No turning back*".

ALL LDS MEMBERS

"kit li lanmenm".

HON DESHEILA BASTIENNE

Akoz son dezyenm manda i pou fer plis ankor, e pou

annan plis benefis ki pou rantre kot zot lakour.

Mr Speaker, prezan permet mwan koz en pe lo distrik Ile Perseverance kot mon ti ganny elekte par en gran mazorite an Oktob 2020.

Mon ti komans travay dan Ile Perseverance zis avan eleksyon 2016, pou determin kandida pou Lasanble Nasyonal kot nou ti sorti avek en viktwar 15 lo 10.

Travay dan Perseverance ti komans mwan avek konpani Mr Dereck Amade, en zenn aktivis determinen sorti Bel Ombre ki ti travay pou vwar en sanzman dan nou pei.

Dan sa letan kot nou *Leader* ti demann nou pou al fer en travay pozitiv, nou ti ale aköz nou ti'n pare pou anmenn en sanzman dan Sesel e tir sa sistenm koronpi ki ti a pe ronz nou pei. Mr Speaker, 2016 mon ti fer mon prezans konte dan Perseverance avek sipor Derek Amade.

Letan i pa ti kapab vin kanpanya, mon ti fer li mon tousel san okenn lafreier. E pli tar mon ti ganny sipor Madanm Linda Agricole, Renick Mathiot, Annette Cecile, e Denis Prempeh ki ti volonter pou vin zwen mwan pou fer sa travay.

Dousman, dousman amezir ki nou ti apros eleksyon 2020, lezot zabitan

Ile Perseverance ti komans zwen sa pti group determinen pou vwar sa sanzman.

Mr Speaker, letan Mr Dereck Amade. Mon repete, Mr Derek Amade ti ganny demande pou kontiny sa travay dan distrik Bel Ombre akote Onorab Sandy Arisol, ti napa okenn lezot Derek ki ti travay akote mwan Desheila Bastienne dan Perseverance.

Avek sipor sa pti group ki mon'n mansyonnen, nou ti tap laporte zabitan ziska tar dan lannwit. Nou ti prezant nou plan pou Perseverance e osi lo nivo nasyonal.

E la Mr Speaker, mon mazin byen ki dan mon PPB, an premye mon ti vann mon lekor avek sa promes ki mon pou vin en lavwa pou zabitan Ile Perseverance. Mon ti promet pou anmenn zot konsern devan, Ki annan pou fer avek distrik. Ki mannyer pou lev distrik Perseverance, kwa ki manke dan sa distrik e ki bezwen latansyon lo tou nivo.

Mr Speaker, ankore dan mon PPB 2020, mon mazin byen. Mon ti dir mon pou regard *welfare* zenn, kot landrwa lwazir ek sport i konsernen. E relev sa 2 kort ki ti'n ganny abandonnen e kouver avek lalyann anvaisan. Netway li pour ki zenn i ganny

en kort konvenab pou epanouir.

E alor netwayaz ti konmanse avek zis 3 aktivis, e pli tar lotorite distrik anba sipervizyon DA Nicole, nou ti ganny en *changing room* e osi demarkasyon lo kort.

Ozordi zenn i annan en kort *basketball* avek son landrwa asize ek son *changing room* dan Perseverance 2. Kot mon PPB, tou ti komanse.

Mr Speaker, sa ki fer mwan en gran plezir, se ki apart sa kort *basketball* pou zenn, mon'n osi arive fer *upgrade* en *beach soccer pitch* dan Perseverance.

Mon fyer pou dir ki premye distrik ki met en *beach soccer* standar, se Ile Perseverance.

(APPLAUSE)

HON DESHEILA BASTIENNE

Sa *beach soccer* i la pou tou zenn ki pare pou servi li dan nenport fason, me avek tou respe posib.

Dezyennman, mon lafyerte se en *outdoor gym* dan Perseverance 2. La mon pou remersye DA Nicole, Ki'n akote mwan e donn mwan tou sipor pou ki NSC i tann nou lavwa e donn nou sipor, pou nou ganny sa *outdoor gym*.

Ankor sa fasilite i ouver pou tou zabitan nenport ki laz. Mersi DA Nicole pou tou ou

sipor. Mersi NSC pou zot sipor, la mon pa pou ezite pou fer en mansyon spesyal, pou Mr Christopher Roucou, Mr Remie, Mr Aldo e CEO Marc Arrisol. *Mr Darenn Omath ek Miss Stacy* pou kontribisyon anver sa *outdoor gym*.

Mr Speaker, mon pa vwar mannyer i annan ki vwar sport flat ater. Mersi pou zot sipor anver zabitan Ile Perseverance pou arive donn nou donn zot en *outdoor gym* ki tre byento pou ouvertir.

Mr Speaker, lezot fasilite ki mon ti fer promes dan mon *PPB*, ti en landrwa lwazir pou zenn. E mon ti fer tou pou re ouver sa sant lazenes ki'n tonm ki ti tonm anba *SNYC* ki'n reste fermen pou 3an dan Perseverance 2.

Aprè bokou lalit, distrik ti kapab ganny lakle sa *building*. Gouvernman lokal in travay lo son renovasyon e byento aprè ki nou'n ava enstal bann lekipman elektronik avek sipor konsil. Sa sant pou ouver son laport pou servis ki nou bann zenn ek zanfan lekol dan distrik pou bezwen.

Mon ti dir ki peser pou bezwen en fasilite pou zot aret vann pwason ater lo palet. E zis 13 mwan aprè an 2021, peser Perseverance ti ganny en bazar avek sipor *SFA*. Mersi *SFA* pou reponn a mon demann.

Mr Speaker, mon ti promet pou demann plis lakaz afordab, aprè mon letour kot mon ti dekouver ki bokou fanmir ti pe agrandi. Zanfan in ariv laz mazer e zot bezwen bouze akòz lakaz ti *over crowded*.

Mr Speaker, ozordi dan distrik Perseverance nou'n ganny en faz 16 *unit* lakaz afordab en lot faz 24 *unit* lakaz. Sa ki'n kontinyen pey zot *scheme* byen, zot in ganny zot lakaz.

Mersi Gouvernman ek Minis Rangasamy ek son tim pou ekout mon demann e reponn nou lapel dan Perseverance. Pou soulaz bann fanmir ki ti pe viv tro bokou zot ansanm e osi bann ki'n lwayal anver zot *home saving scheme* ozordi zot pe rezouir zot komitman.

Mr Speaker, dan mon *PPB* 2020 ankor, mon pou kontinyen dir. Mon ti dir ki i mank en pe laboutik dan Perseverance e osi ki kapab vann gas pli pre avek zabitan. E avek sipor serten biznesmenn prive, ozordi i annan 3 *supermarket* modern e en laboutik ki pe vann gas.

Mon ti osi dir ki mon pou fer tou pour ki zabitan Perseverance i ganny en *ATM* dan distrik. Avek sipor Gouvernman lokal, nou'n negosye avek Nouvobanq ek *ABSA* pou ganny en *ATM*.

E Ozordi mon fyer pou dir ki zabitan Ile Perseverance ek lezot zabitan ki pas dan sa distrik, pe profit servis *ATM* atraver labank Nouvobanq,

Mon pou dir en gro mersi *management* Nouvobanq pou reponn nou lapel pou enstal en *ATM* dan Perseverans. Me mon napa dout e mon pa perdi lespwar ki labank *ABSA* osi pou vini pou donn sa servis tre byento.

Mr Speaker, en sant kominoter, pou ganny landrwa fer aktivite distrik. Mon fyer pou dir ki mon pa'n zanmen mank en loportinite pou demann Minis pou Gouvernman Lokal isi dan sa Lasanble, kan ki nou pou ganny nou sant parey tou lezot distrik.

An Novanm 2024 nou ti al vizit sa landrwa kot pou konstri sant kominoter e *tender* i dan prosedir. Mon ti demann osi en nouvo Stasyon Lapolis pour ki bann zofisye lapolis a kapab travay dan konfor e sorti dan sa pti lakaz sere. Ankor mon pa'n zanmen mank loportinite pou demande kan ki pou konstri sa stasyon lapolis nouvo.

Sit apropiye in ganny idantifye e la nou pe esper prosedir konplete kot nou annan lespwar ki byento nou ava vwar pyer fondasyon ganny plase.

Enn fwa, ki nou ava ganny nou sant ek nouvo stasyon lapolis, nou a kapab ganny bann lakaz pou donn zabitan ki ankor lo lalis espere.

En fasilite rekreyasyonnel kot zenn e osi nou bann *senior citizen* a ganny en landrwa detann e fer zot aktivite, pe reganny *tender* ki pou ganny fer kot pti lans Perseverance 2. Sa in retarde aköz kontrakter ti deside aret travay lo la aköz delo dan fondasyon, e negosyasyon i *on-going* e byento nou a vwar son kontinyasyon.

Mr Speaker, *Street lights* in en gran konsern e en gran batay dan Perseverance. Me avek bokou persevere ek pasyans, Ile Perseverance i annan lalimyer, malgre sa pa'n totalman rezourd problem. I annan ankor landrwa ki ankor mank *street lights*, mon donn zabitan lasirans ki byento sa travay pou kontinyen pou met plis lalimyer ankor dan Perseverance.

Vandalism, aksyon malisye pa'n dekouraz mwan. Bokou konsern monn met devan, tol ki ti pe koule e ki'n avarye sirtou lo bann lakaz *prefab* ozordi in rezourd. Anba *scheme re-roofing* nouvo twa in ganny mete lo plis ki 150 lakaz *prefab*, e apre pou swiv avek travay plonber ek firmizasyon.

Mon osi fyer ki apre 3 repriz kot mon ti demann Minis pour Transpor lo Later dan Lasanble Nasyonal pou fer en lot *lane* desann. Pou tir konzesyon trafik sorti dan Perseverance dan bomaten, ki sa pe ganny realize. Tou dimoun ki fer sa semen i vwar pou zot menm ki semen pe konstri sorti depi kot *shell* Perseverance ziska vizavi Lakour Mazistra. Travay i ankor pe kontinyen e byento pou annan 2 *lane* pou desann.

E mon pou dir mersi Minis Transpor lo Later pou fer sa arive avek sa lakonpannyen ki akote ou.

Mr Speaker, byento nou a vwar travay pou repenn *flat* ek netwayaz bann *staircase*. Serten sityasyon familyal, sosyal kot mon'n kapab rezourd ede pou rezourd mon'n fer li avek tout fyerte.

Mr Speaker, mon'n fer byen kler ki ti annan dan mon *PPB* 2020. Kwa ki mon ti promet, kwa ki mon'n gannyen ki mon ti promet dan mon kanpanny e kwa ki mon'n gannyen. Mon ti tap laport bann zabitan. Sete devlopman dan distrik e osi vin en lavwa dan Lasanble Nasyonal pou distrik Perseverance e osi lo nivo nasyonal.

Mr Speaker, nou reste pozitiv e nou kontinyen fer nou travay avek pozitivite e delivre lo nou bann promes ki

annan pou fer avek nou distrik dan pozitivite.

Mon remersye Gouvernman pou tou sa ki mon'n *achieve* dan Perseverance e sa ki ankor annan pou kontinyen nou a kontinyen dan sa lannen e osi dan nou prosen manda an 2026.

Mr Speaker, mon pou dir Mersi *DA* Nicole, *DA* Langia e tou travayer tou le de distrik pour tou zot sipor. Mersi mon Clerk Madanm Claudette Agathine e osi mon bann aktivis.

Mersi tou bann endividi ki donn zot sipor anver bann group tel ki Mr Dogley, *Chairperson* pou *Senior citizen*. Mr Fideria, pou *Family Council*. Sir Emmanuel ki donn letan anver bann zanfandan vakans. Miss Marylise ki ede avek *after class* e lezot zabitan ki donn zot letan dan en fason ou en lot pou nenport ki aktivite dan Perseverance.

I reste mwan pou dir avek pep Seselwa, Gouvernman LDS i serye e se son pei ek son pep ki vin avan tou. Alor nou pou dir byen for "*No turning back*".

ALL LDS MEMBERS

"kit li lanmenm".

(APPLAUSE)

HON DESHEILA BASTIENNE

Mersi Mr Speaker.

(APPLAUSE)

MR SPEAKER

Mersi Onorab, laparol prezan pou Onorab Andy Labonte.

HON ANDY LABONTE

Mersi Mr Speaker. Mr Speaker, tou *staffe secretariat* Lasanble Nasyonal. Manm koleg Onorab. Lepep Seselwa, espesyalman tou zabitan *La Rivière Anglaise*, bonzour.

Mersi Bondye Papa lo non ou garson *bienaimée* Zezi Kris pour tou benediksyon, gidans, lagras e proteksyon en kondisyonnel. Mon dir ou mersi Bondye pou ou lasante ek lasazes. Mersi Bondye pou beni nou avek en bann pli zoli Zil ki apel Sesel avek bann zabitan determinen, solider. Parey Prezidan in dir, ki i pa pou zanmen les tonbe e ozordi Seselwa pe dir nou “*No turning back*, Kit li lanmen”!

Wi mon bann frer ek ser Seselwa. Akoz avan Oktob 2020 nou lekonomi ti lo son zenou. Kot erport ti’n fermen e *US* ti pe dir kit erport fermen. *COVID* ti pe ravaz nou e *US* ti pe dir zot pa bezwen vaksen. Me nou Prezidan ti sourd lo zot.

Nou lekonomi ti pe soufer apre ki ladministrasyon *SPUP*, *SPPF*, Parti Lepep, *US* ti’n abiz li, vyol li e detri li. Zis pou fer

faver zot bann dalon, kot plizyer nou larzan ti’n ganny vole e disparet parey sa fame \$50milyon, ki ozordi i vo plis ki bilyon de bilyon rounpi.

Isi menm dan sa Lasanble, nou ti tann *Chairperson FPAC*, Onorab Sebastien Pillay ki ti dir byen for ki pe al rode. Me ozordi Mr Speaker, Onorab i reste trankil e i antre dan son lakok. I prefere fer toud sort lakizasyon kont Komisyon Anti-Koripsyon.

Wi Mr Speaker, *US* ki annan listwar sa parti e i annan rikord touy dimoun e fer tou bann frer ek ser Seselwa disparet parey nou’n vwar e tandé dan *TRNUC*.

Les mon dir Onorab Sebastien Pillay, atraver ou Mr Speaker. Se *US* ki vreman deplorab e degoutan. Ki pare zis pou fer propagann sal e denigre karakter okenn endividi zis pou zot retourn o pouvwar.

Se zot ki’n kre divizyon le 5 Zen 1977, ler zot ti fer *Coup d’état*. Menm e menm zot Prezidan parti, Dokter Patrick Herminie in dir, repete e konfirman dan enn son diskour kongre. Mon site, “Tou bann ki oule sanz sa direksyon. Tou bann ki oule sanz sa direksyon pou fini dan rigol anba en pon”. Retir sitasyon.

Mr Speaker sa i kler ki si en zour lazard i tonm dan potis e *US* i retourn o pouvwar, Seselwa pou ganny vwar dan en rigol mor anba en pon.

(APPLAUSE)

HON ANDY LABONTE

Me sa pa pou zanmen arive, akòz Seselwa i konn zot bann vilen manni e nou dir “*No turning back*”.

ALL LDS MEMBERS

“Kit li lanmenm”.

HON ANDY LABONTE

Wi Mr Speaker, Bann dirizan *US* se bann move dimoun atoufer. Sa bann zans, zot zis voras e lafen pouvwar. Seselwa fodre i mazin byen ki en serpan i reste touzour en serpan menm si i sanz son kouler lapo.

Me Seselwa pe dir ki le 27 Septanm 2025 nou pou kit Prezidan Wavel John Charles Ramkalawan *State House* e re donn *LDS* en mazorite absolè isi dan sa Lasanble pou nou kapab kontinyen transform nou pei e fer Paviyon Sesel mont pli o ankor.

Akòz se Prezidan Wavel, ki’n touzour la ler sa pep i dan maler e se sa ki zot pe apel *micro-manage*.

Menm zot in bat li. kas son latet, me Prezidan Wavel i sa zonm ki for, determinen

ki’n akimil bokou leksperyans e pa zanmen les tonbe. Wi Mr Speaker, “*No turning back*, kit li lanmenm”!

Prezidan Wavel, in demontre dan plizyer mannyer in pran bann risk byen kalkile e re ouver nou erport. In al rod vaksen ler *US* ti pe *boycott*.

In sov nou *Air Seychelles*, ler li Herminie pe degaze e vann tou later Malaki. Omwen sa Dokter ti ava annan lakourtwazi pou aret voras e rann nou zabitan La Rivière Anglaise, nou sant kominoter ki zot in pran an malapropo.

Me non Mr Speaker, sa dokter i prefere vin fer bann zabitan La Rivière Anglaise ki’n fini dir li zot pa kapab met konfyans dan li pou vin Prezidan pei. Akòz ler i ti Speaker Lasanble Nasyonal, i ti tro abiz son pouvwar. Me zabitan La Rivière Anglaise pe ankouraz sa Dokter pou plito retourn dan lasante e donn en koudmen pou ed nou sosyete dan plas zis ronfle.

(APPLAUSE)

HON ANDY LABONTE

Konplent e fer bann *statement* boufon.

Onorab Georges in dir ki i pa pou vot pou *US*. I pou vot pou vot pou *US* si i rann Lepep Seselwa sa ki pou li. Me mwan, mon pou dir avek sa dokter. Si ou rann zabitan La Rivière

Anglaise son sant, mon pou fer tou zabitan La Rivière Anglaise vot pou ou.

Dokter Herminie i enkonpetan konpare avek nou Prezidan Ramkalawan, ki touzour ganny akeyir dan bann lakour. I ede diriz bann loperasyon dan moman difisil e vizit bann zabitan dan lensidan parey le 7 Desanm 2023. Ler ti annan leksplasyon Cascade e dezas dan rezyon Nor. Prezidan Wavel, pa per pou met lanmen dan lapat, ler i nesese i dir non. E se sa ki zot pe dir *micro-manage* Mr Speaker.

Wi, Prezidan Wavel i en Prezidan e en dirizan ki pa per lasaler dan lakwizin. Sa wi en vre kaptenn ki pa abandonn bato pandan movetan. I en zonn Bondye, i en Prezidan ki'n fini *pass* son legzanmen. En kaptenn ki konn dirize. Oli problemm *US*.

Ler mon'n antann Onorab Audrey Vidot dir pou plizyer fwa ki Seselwa i dan mal konmela. Nou konpran ou Onorab Vidot, atraver ou Mr Speaker. Ki i pe konfirman, se ki konmela bann dirizan *US* pa kapab vol later ek larzan Lepep parey zot ti fer dan lepase.

(laughter)

HON ANDY LABONTE

Mr Speaker, wi nou pep Seselwa i nepli met kitenge ki ganny koud latet anba. E mon anvi fer rapel Onorab Audrey Vidot e Onorab La Digue ki fek koze, atraver ou Mr Speaker. Ki kitenge i annan en rol dan Leta nou Nasyon e dan listwar, e en listwar fermal e anmer.

I anmenn soufrans aköz i anmenn move memwar kot nou bann frer ek ser ti ganny masakre, touye e disparet. Me Seselwa in delire depi le 24 Oktob 2020 e pe bouz avek pozitivite anver prosperite anba gidans ladministrasyon *LDS*. E nou dir byen for "*No turning back*".

ALL LDS MEMBERS

"Kit li lanmenm".

HON ANDY LABONTE

E *LDS* i sel opsyon pour Sesel.

Mr Speaker, sa *SONA* ki Prezidan ti fer le 27 Fevriye 2025 isi dan sa Lasanble, i 5enn parmi en seri 10 *SONA* ki Prezidan Wavel John Charles Ramkalawan pou fer dan Sesel.

(APPLAUSE)

HON ANDY LABONTE

E lannen 2026 ziska lannen 2030, zot pou vwar li ankor pe fer sa menm legzersis. Bann *US*, kontan pa kontan. Me zot napa swa. Si zot pa kontan, parey zot labitid zis *walk out* e

les *LDS* travay. *LDS* i annan responsabilite anver sa pep e pe delivre, san lafreder sa bann ki napa Sesel aker parey bann *US*.

Mr Speaker, mon pou siport Prezidan Wavel ler i dir ki lafransiz i sel fason pou fer fas avek larealite. Pou konfront laverite direkteman e onnetman.

Prezidan ek son Ladministrasyon *LDS* in touzour analize, fer refleksyon lo defi lafebles e transform zot dan loportinite. I annan en vizyon pou en meyer ozordi. E se sa ki donn lespwar pou en meyer demen, ki anmenn nou pep ver matirite.

Prezidan in byen dir ki napa okenn dout sa lannen 2025, nou pou demontre ankor enn fwa ki pep Seselwa i entelizan. Wi Prezidan, sa gro lanmer pa pou zanmen fer nou per e nou pou kontinyen dir byen for “*No turning back*”.

(APPLAUSE)

ALL LDS MEMBERS

“Kit li lanmenm”.

HON ANDY LABONTE

E se sa ki pep Seselwa pe dir, kit li lanmenm. Wi Mr Speaker, ler nou pe get larealite nou pei, i kler pou tou sa ki annan lizye e vwar kler trouve bann devlopman an

zeneral e nasyonal atraver nou pei.

Nou bann sikse pe ganny rekonnet menm lo lasenn enternasyonal kot nou Paspour i parmi bann ki pli for dan Lafrik e dan larezyon. Lo nivo Mondyal, nou’n ganny klase 18enm parmi 180 pei par devan Lanmerik e bokou lezot pei ankor avek mwens koripsyon.

Zis sa pti group dirizan ki dan en tribi met *uniform* seremonyal semiz rouz, kravats nwar, ki pe viv lo en planet kot mon pa konnen kote.

Seselwa pa merit annan divizyon. Wi, Onorab Sebastien Pillay, atraver ou Mr Speaker. Me se zot sours divizyon dan sa Sesel depi le 5 Zen 1977, i pa drol aköz i zot natir e se zot ki ti fer *Coup d’état*, anvoy serten zabitan an legzil aletranze.

Kre en kondisyon ek nou pa ek nou. Me nou *LDS* nou dir, tou Seselwa i annan menm drwa e personn pa par laol Lalwa parey Prezidan in dir.

Me parkont tou Seselwa pe ganny ankouraze pou pran nou responsabilite o serye, kontinyen batir pou fer progresse nou pei. Se sa ki nou pe dir, meritokrasi i merit labaz progresse dan nenport ki desizyon.

Annou regard leta devlopman nou pei dan sa

dernyen 4an. Nou zoli pti zil La Digue avek son bann zabitan byen zantiy e akeyan. E la mon anvi dir zot, mersi pou zot bon lakey e la zantiyes Sanmdi le 22 Fevriye 2025 ler Prezidan Wavel ek son lekip *LDS* ti pe vizit La Digue.

Nou'n tann zot konsern e nou pou kontinyen fer sa ki byen dan zot lentere parey labitid. Nou Prezidan i kontan zot bokou, e yer swar Mr Speaker, en Madanm La Digue in *call* mon e i dir mon " ki si malelve, mank respe, san konpran avek dezespwar ti en dimoun se pa lot ki".

Mr Speaker, me mon pa pou nonmen aköz ou pa permet mon nonmen. Me nou tou nou konnen lekel li sa Onorab, lekel li sa dirizan.

Zabitan La Rivière Anglaise i vreman kontan zot in benefisye. I *mean*, zabitan La Digue i vreman kontan. Zot in benefisye avek konstriksyon e louvertir en zoli Lopital *St Mary*, malgre ki zot *MNA* elekte Onorab Rocky Uranie, pa'n zanmen an faver. Me in plito an faver en petisyon pou met retar sa devlopman.

Nou'n vwar louvertir nouvo por pasaze ek kargo lo La Digue. Devlopman *sewage* ki an mars, pou ede amelyor lavi bann Digwa in fini demare e pou konplete byento. Linyon *Estate* kot apre plizyer lannen pe fer profi. Pou plizyer

lannen pa'n fer profi. Me ozordi i *full* fonksyonnel e la byento komodite *STC* pou aksesib lo zil e lo en baz *retail* san ki Gouvernman i bezwen lwe en batiman en fortin, parey Gouvernman avan ti fer.

Wi nou Gouvernman *LDS* i la pou koup gaspiyaz. Mr Speaker, se sa ki montre ou kot nou bann dirizan *LDS* isi dan Lasanble nou serye. Me bann *US* pa kapab tenir lasaler.

(APPLAUSE)

HON ANDY LABONTE

Ler nou koz laverite, zot sove e zot *walk out*. E nou dan *LDS*, nou dir zot kontinyen *walk out* e les nou ale. Les nou *LDS* travay, e get zot. La *camera* i merit montre, zot tou zot in ale.

(APPLAUSE)

HON ANDY LABONTE

Mr Speaker, atraver ou mon swete ki Onorab Uranie i annan en pe gratitid anver sa bann tel proze e devlopman lo La Digue. Aköz tou kou mon'n tand li dir ki i son zil. E ozordi ler mon pe koz pozitivite lo son zil, li osi i *walk out*. Be ki kalite Onorab, nou annan isi dan Lasanble? Dimoun La Digue in ariv ler pou vot pou *LDS*, pou reprezant zot.

Annou get en kou Praslin Mr Speaker. Nou'n vwar plizyer devlopman ki enkli konpilasyon proze e louvertir nouvo fasilite por Ero pou terminal pasaze Baie Ste Anne. E bokou lezot fasilite ki'n ganny siporte par 2 Onorab isi lo sa kote latab ki ankor dan Lasanble, pe asize, pe ekoute e pe siporte. Sa se pa lot ki Onorab Wavel Woodcock e Onorab Doyace Porice.

(APPLAUSE)

HON ANDY LABONTE

Ki ou a krwar se li Onorab ki'n ganny elekte Baie Ste Anne.

E mon konnen ki pli tar zot pou al an detay lo bann devlopman Praslin.

Me lo Mahe tro bokou pou nonmen. Nou'n vwar devlopman lakaz dan plizyer distrik kot *US* ti ensiste pou abandonnen. Sa i enkli Vilaz Basen Union Vale. Reparasyon e louvertir *building* lekol *NIHSS* Mont Fleuri, ki ti tonm an rin pou plizyer lannen anba ladministrasyon avan.

Mr Speaker, se laba ki ti annan sa bann lera ki Onorab Tamboo ti pe dir. Me non pa dan Lopital Gouvernman e mon krwar se sa ki i ti pe sey dir. Me Mr Speaker, ankor enn fwa sa Onorab i *walk out*, i pa oule ekoute.

Nou'n vwar osi reparasyon e louvertir Carnegie enkli Libreri Nasyonal, kot pou ede remet an valer nou kiltir e leritaz. Reparasyon lo bann fasilite sport, parey *gymnasium*, *Palais de sport*, nouvo *track* Stad Linite, renovasyon kort *tenis* Roche Caiman. E sa i dan lentere tou nou bann atlet ki servi sa bann fasilite, e dan lot kote ki zot dir, sport in mor.

Me se zot ki pe mor, zot dan leral Mr Speaker.

(APPLAUSE)

HON ANDY LABONTE

Nou'n vwar lagrandisman e devlopman semen lakot dan rezyon Sid, kot tou bann motoris enkli pyeton pou benefisye. Nou'n vwar nouvo sant rimann ki'n fini konplete.

Mr Speaker, lalis i long. I vreman long, e tousala pandan zis 4an, me non pa 40an ou 44an.

Si zis ti napa bann Alibaba dan Ladministrasyon Gouvernman oparavan, ozordi nou Pei ti pou bokou pli lwen. Zot pe rod plis logmantasyon saler pou travayer, wi i vreman enportan e nou ladministrasyon i krwar ladan, e siport donn Seselwa logmantasyon saler. Akoz i nesaser, Seselwa pa oubliye ki se nou ladministrasyon ki'n ogmant saler 2 fwa pandan zis

4an, plis ki 17% logmantasyon nou'n donnen.

Me parti *US* ki zot ti fer? Zot ti donn ogmantasyon dimoun sekirite sosyal par pti kwiye. R50 tou le lannen zour laniverser Prezidan, ansyen Prezidan Albert Rene. Konmsi sa larzan ti sorti dan pos ansyen Prezidan. *US* napa okenn lesan pou vin donn nou.

Me pep Seselwa i annan en lesan pou donn *US*. I pe dir zot, vann tou zot byen malaki e pey bann viktim *TRNUC*.

Menm sa *Maison du Peuple*, Seselwa pe dir i merit ganny retournen akòz i en propriyete leta. I en kado ki ti pou Seselwa, me non pa pou *US*.

Permet mwan pou bouz lo nou bann defi e lafebles koman en pei e nasyon. Ki Prezidan avek ladministrasyon *LDS* pe travay dir pou rod solisyon e anmenn transformasyon lo semen pozitivite. Sa i labi sibstans. Mr Speaker, sak fwa ki mon koz labi sibstans mon vremen, vremen emosyonnel akòz i en keksoz ki tous mwan o fon mon leker.

Malgre nou bann zonm ek fanm in tonm dan sa fleo drog ek lakol ki enkli tou laz. Me pli lenkyetid se mazorite i nou bann zenn, e sa se en lafors travayer Seselwa, Mr Speaker.

Pou plis ki zanmen Mr Speaker, nou'n vwar larestasyon bann gro trafikier ki deryer baro prizon. En arestasyon rikord drog ilegal ki'n ganny sezi par lotorite e pli o dan listwar Sesel.

Me ki nou vwar? Ankor enn fwa sa dokter ki pe enspire pou vin Prezidan, i vin konplent, menm ankoler ki en laliny eroïn in vin pli ser.

Me sa boug son latet i bon? Si en laliny eroïn i vin pli ser sa i vedir ki eroïn i rar lo pei. Se pourtan sa menm dokter ti deza a latet divizyon ki ti apel *APDAR* e in konpletman *fail* dan sa pozisyon, akòz se anba son watch ki drog ti'n fann touni partou dan pei.

MR SPEAKER

Onorab, mon pa tro konpran sa bann remark ki ou'n fer dernyen.

Me selman mon santi i annan keksoz ki pa apropiye ladan, donk mon pou dir ou veye silvouple. Mersi.

kontinyen.

HON ANDY LABONTE

Mr Speaker, ki mon pe sey dir, se ki drog ti'n partou kote dan pei. Me par kont nou rekonnet ki nou ladministrasyon i annan bokou ankor pou fer e mon konnen ki Prezidan Wavel, i senser e determinen dan son lalit kont drog.

Mr Speaker, mon pou pran sa lokazyon e felisit sa bann travayer *DSAPTR* pou zot devosyon. E la mon anvi reasir sa bann viktim ki Gouvernman *LDS* i pare pou travay avek zot pou sorti lo sibstans. Akoz se sa, se drog ki pe detri zot lavenir.

Mon osi apresye ki mazorite sa bann kliyan *DSAPTR* ki avan 2020, zot ti anba. Zot ti bann delenkan dan dezespwat. kot *US* ti pe fer zot krwar ki zot pa kapab travay e zot ti vin lesklav politisyen.

Me ozordi nou vwar zot dan en lanplwa pe soutenir zot fanmir e mon dir zot bravo mon bann frer ek ser, ki pe lager pou sorti lo labi sibstans. Tre byento nou konnen ki nou bann zenn pou re ganny zot sant lazenes. Akoz i annan en sant modern reabilitasyon ki pou ganny konstri pou bann kliyan ki lo labi sibstans.

Mr Speaker, mon osi anvi lans en lapel avek bann anplwayer pou aret viktimiz sa bann dimoun ki lo labi sibstans e serye dan zot travay. Mon repet, bann viktim drog ki serye dan zot travay e pe fer en zefor pou sanze. Wi Mr Speaker, zot merit en lankourazman e ganny en lanplwa formel si vreman zot pe montre zefor.

Mr Speaker, malgre defi nou Prezidan in fer mansyon

spesyal pou bann zenn ki pe promouvwar pozitivite dan nou pei.

Permet mwan fer serten mansyon spesyal, lo serten bann zenn ki pe fer pozitivite dan mon distrik La Rivière Anglaise. E la mon mazin Jefferson Roberto Asba, ki annan plizyer talan.

Elijah Cœur-de-Lion, Josip Ravinia e Serge Asba dan foutbol. Paris Lozé dan Judo, Yhoni Farabeau ek Denis Rose dan lar. Jean-Yves Philoe e Solana Athanase ki pe diriz nou group danse e kiltirel dan Distrik.

Dylan Labrosse dan *basketball*. Keeran Bijoux ki pe debourye koman en pti kontrakter. Dwayne Adrienne ek Lester Dogley ki'n pran en metye nob koman *Fireman*.

Ray Benstrong, dan lanmizik. Annia Marengo ek Yannick Assary dan sekter maritim.

Wi Mr Speaker, dan distrik La Rivière Anglaise i annan bokou pozitivite, parey bann santer i sante, i annan pozitivite la ater.

Me mon osi bezwen fer en mansyon spesyal Mr Speaker, pou mon 3enm az ki byen konnen koman *Colombre D'or* sa i en klib ki vreman motive, determinen e pe kontribye. E la mon anvi dir zot ki mon kontan zot bokou e mon pou kontinyen siport zot dan

nenport ki fason ki mon kapab.

Mon osi rekonnet bann fasilite parey *Daycare Centre* kot nou annan *Apple Tree* anler Ma Joie. Nou annan bann *child minder* dan distrik parey Lafanmir Rose, Ma Joie. Parey nou annan Miss Sonia, Castor Road. Nou annan *Count and Read Daycare Centre* e bokou plis Mr Speaker. E tousala bann dimoun ki pe fer dibyen e nou ankouraz zot pou kontinyen.

Mr Speaker, prezidan in osi felisit mazorite travayer ki dan Sekter Piblik ki pe fer travay onnet e donn tou anver zot responsabilite. Me nou bezwen rekonnet ki annan en minorite pe kontinyen trenn lipye. Wi i annan zot ki pa konpran ki Sekter Piblik i vedir serviter piblik. Nou rol dan servis Piblik se pou *facilitate* lavi nou bann piblik, me non pa met zot an retar, *complicate* zot lavi.

Mon kapab fer mansyon direktteman lekel serten sa bann endividi. Me mon pa anvi dekouraz sa mazorite ki pe donn tou e fer sir ki servis piblik i alaoter. Mon anvi dir zot kontinyen zot bon travay e devosyon. Mon osi anvi dir sa pti minorite travayer servis piblik ki pe kontinyen trenn lipye, dormi lo *file* zabitan e fer sabotaz e anmenn fristrasyon. Silvouple arete, aköz ler ou pe

fer sa se ou prop ser ek frer Seselwa ki pe soufer. Sa ki pa kontan i arive avek ou, pa bezwen fer avek ou prosen. Aköz lanatir en zour pou *deal* avek ou.

Me mon Andy Michel Labonte, otan ki mon ankor la mon pou kontinyen met dife anba talon sa bann dimoun ki dan servis piblik pou delivre dan lentere mon zabitan. Me lo sa pwen servis piblik, i anmenn mwan fer en revi lo lakonplisman e devlopman ki mwan Andy Labonte, mon'n pouse e realize avek sipor Gouvernman *LDS*, dan mon zoli distrik La Rivière Anglaise pandan sa 4an, ki'n benefisye nou bann zabitan ki vreman sarz e pozitiv. Nou La Rivière Anglaise nou annan lakourtwazi e gratitud.

Nou konn dir mersi, e lo par tou zabitan nou dir Mersi Prezidan Wavel ek Ladministrasyon *LDS* e tou bann lekip pou zot sipor pou ed nou akonpli sa bann proze swivan. E pou bann proze ki pou ganny prevnir dan lavenir. E pour tou sa lakonplisman tou loner ek laglwar i al pou Bondye Papa, tre o.

Sa bann proze i konm swivan. 2 Proze Lakaz, Vilaz Basen. Sa i enkli en *unit 8 block*, de lasanm e 2 blok 8 *unit 3* lasanm, kot 24 fanmir in benefisye.

Konblaz pou nouvo bazar in konplete. Lapas pou peser pe ganny fouye e sa pou fasilite lavi bann peser La Rivière Anglaise e bann ki dan la rezyon. Lekol La Rosiere ki anba Ladministrasyon US, son plan ti pli gro ki teren. Ozordi anba Ladministrasyon LDS, batiman in antre lo teren e konstriksyon in fini komanse.

Drenaz La Rosiere, premye faz in ganny konplete. La i reste en lot faz kot pou anpes delo antre dan lakaz bann zabitan, kot lafanmir Valentin, Alcindor, Miss Sheila e lezot ankor. Drenaz Ma Joie par lao *bedsitter* in fini konplete. *Upgrade bus stop*, Ma Joie. En nouvo *bus stop* byento pou ganny konstri anler kot bis vire, Union Vale.

Playground, Union Vale in fini renouvle e la i reste zis pou enstal nouvo zouzou. Re sirfas semen, plizyer landrwa depi *English River* Santral ziska Quinci. Apre plizyer lannen semen *Castor* in ganny re sirfas depi kot larantre Saint Elizabeth ziska kot ronpwen *SBC House*.

Nouvo lalimyer ek laglas, semen, *crash barrier* en pe partou dan distrik. Lagrandisman semen dan zanmirant *SBC House* ziska isi *Ile Du Port*, kot en nouvo *round-about* la par deor kot larantre Lasanble, Lasanble Nasyonal kot pou *facilitate* trafik.

Demarkasyon *parking* *Ex-Tamarc Union Vale*. Proze *reroofing* Union Vale in fini konplete, ki pa'n zanmen materyalize pou plizyer lannen anba US.

Nouvo kous lapentir kot Sant Lasante, La Rivière Anglaise. Nouvo semen anler Ma Joie kot zabitan ki malad pou ganny pli bon akse transpor ek lanbilans.

Koneksyon *sewage* anler Ma Joie ek Union Vale. Koneksyon *sewage*, Vilaz Lenspoir avek Santral.

Upgrade laplenn ek kort anler Union Vale in fini komanse. *Design* pou refer e *upgrade* kort kot Stad Lanmizik ki pe fer, enkli *changing room* e *toilet* ek fasilite asize.

Diskisyon pou idantifye teren pou fer laplenn anler Ma Joie i vreman avanse. Plan semen Pti Pate faz 1 fini ganny *design*. *Pegging* in ganny fer e la, sa i lo faz zis negosyasyon pou *way leave*.

Plan semen *Thompson Lane*, i an diskisyon pou laprouvasyon *way leave*. *Road diversion*, Ma Joie kot *plateau* in ariv dernyen staz. Diskisyon pou *pavement* komansman Saint Elizabeth ziska *SBC House* i lo program. *Pavement* semen Union Vale anba ziska Vilaz Lespoir i osi lo program.

Redevlopman ex Krishna Mart par en lenvestiser prive ki pou anmenn plizyer fasilite dan distrik, parey fasilite Labank sa i osi *ATM* ki zabitan pe demande.

Mr Speaker, leta distrik La Rivière Anglaise i lo bon semen e an bon sante. Onorab Labonte ek Ladministrasyon LDS i dir “*No turning back*, Kit li lanmenm!”

Me avan mon ariv ver lafen i ekstremman enportan ki mon fer refleksyon avek bann zabitan La Rivière Anglaise. Sa i sorti dan liv *Saint Mark*, sapit 9 vers 33 a 35. Mon site “Zot ti ariv *Capernaüm*, kan Zezi ti dan lakaz i ti demann zot, ki zot pe diskite dan semen. Me zot ti reste trankil aköz dan semen zot ti pe diskit ant zot pou konnen lekel ki pli enportan parmi zot. Alor Zezi ti asize e apel son 12 Disip. I ti dir zot, si en dimoun i oule vin premye fodre i vin dernyen e fer li serviter tou dimoun.” Retir sitasyon.

Mr Speaker, se sa mon loner ki fer mon Andy Michel Labonte, touzour mars latet anler. Nanryen pa fer mwan per. Se zabitan La Rivière Anglaise ki’n vot mon e se zot ki fer mon loner.

Tou sa bann ki pe pase dan distrik La Rivière Anglaise e dir fodre tir Andy Labonte, mon annan sa pou dir zot parey mon Prezidan Wavel in

dir zot. Tir li, fodre zot kapab tir li. Me mon pa vwar zot. Mhm Mhm, zot ankor feb manrmay!

(APPLAUSE)

HON ANDY LABONTE

Avan mon konklir Mr Speaker, mon anvi zwenn avek mon bann koleg Onorab lo sa kote latab pou rekonnet e dir...

MR SPEAKER

30 Minit Onorab, konklir.

HON ANDY LABONTE

E dir Mersi nou 3 koleg Onorab, ki’n termin zot parkour dan Lasanble.

Sa i Onorab Naddy Zialor, Onorab Flory Larue, Onorab Rachel Spiro, e mon swet zot bonn sans dan zot fitir responsabilite.

Mon pou osi swet nou 3 nouvo koleg, Onorab Valdana Sultan, Onorab Gerald Bijoux e Onorab Cecile Larsen, byenveni dan nou Lasanble.

Me i fer lapenn ki Onorab Larsen in fini ganny anmare avek en lasenn kriminel, disan Seselwa le 5 Zen 1977. Mon konsey i se, Onorab Larsen, sorti dan sa pirog nanm koman i ankor boner.

E pour konklir, mon anvi dir tou zabitan La Rivière Anglaise ki sa listwar ki nou’n fer dan dernyen eleksyon an

Okto 2020 pou reste vivan dan listwar.

E Septanm 2025 pep Seselwa, e zabitan La Rivière Anglaise pa pou retoun an aryer nou pou kontinyen ralye deryer LDS e fer ki Wavel John Charles Ramkalawan, i reste *State House*.

Sa kontrol ki LDS....

MR SPEAKER

Mersi. Mersi Onorab.

(APPLAUSE)

HON ANDY LABONTE

Lasanble a pran poz e nou a rebran 11er.

(BREAK)

MR SPEAKER

Chief Whip LDS, evidaman ou bann Manm pa la e ou pe lev lanmen. Mon ekspekte ou pe al dir mwan napa *quorum*. Be ou a donn mwan en leksplikasyon silvouple.

HON SANDY ARISSOL

Mr Speaker bonzour. Bonzour tou dimoun ki a lekout ek tou bann Manm Lasanble Nasyonal. Mon anvi dir ou, premyerman wi napa *quorum*. Dezyenmman, mon anvi ou gidans koman Speaker Lasanble an relasyon avek nou travay. Parske depi nou'n komanse. I annan sa bann zwe antre, taye, *walkout*.

Nou lo kote LDS, nou asize, nou anval tou serpan par latet, par lake dan term Kreol, parey nou dir, letan bann Manm US pe koze.

Me nou pa ankor ganny en konpran aköz zot, letan nou, nou pe koze. Zot pa montre nou menm kourtwazi ki nou, nou montre zot letan zot pe koze.

Zot antre, zot sorti. Aköz sa ki zot kapab fer. La parey la, Miss Larsen, Onorab Larsen ki pe al koze. Nou ti kapab reste deor napa *quorum* nou. Nou, nou serye nou anvi travay. Parske nou ganny peye pour fer sa travay. E dimoun pe swiv nou pe get nou deor.

Alor mon anvi konnen eski, letan zot, zot koze nou, nou reste deor. Ler nou, nou koze zot, zot reste deor? Ki mannyer nou ale? Pour mon bann Manm kapab konnen. Parske nou, nou anvi travay e nou anvi fer en travay pour sa pei. Mersi bokou Mr Speaker.

MR SPEAKER

Ok. Mersi *Chief Whip*. Mon pou adres sa ki *Chief Whip* in dir avan. Onorab Pillay si ou bezwen laparol, ou a kapab gannyen a en lot ler.

Wi, sa i en sityasyon ki deplorab. Mon dakor avek serten pwen ki ou'n fer. Pa totalman mannyer ou'n mete, me i annan en diferans avek zot e avek parti lot kote. Se ki

si zot, zot pa la napa *quorum* e Lasanble pa kapab marse. So, sa i fer en gran diferans.

Me selman nou dan en sityasyon ki mon konsider deplorab e inakseptab. Mon pa krwar poudir sa *Standing Orders* mannyer i mete in donn Manm permisyon pour proteste, pour *walkout* an protestasyon si zot pa dakor. Me sa drwa pe ganny abize.

E mon pa kapab aksepte ki i kontinyen. So, mon pou bezwen fer en keksoz. Lasanble pe vin en fars. Ler *US* – ler *LDS* pe koze, *US* pa pour la. Ler *US* pe koze, *LDS* pa pour la. Nou pa kapab kontinyen koumsa.

So *Chief Whip*. Mon pa pe pran okenn *point of order*. *Chief Whip!* Mon pe dir ou, mon pe sispann Lasanble la ziska ller en kar. Mon ekspekte ki Manm *LDS* i la dan plas. E tou Manm i la dan plas pou nou kontinyen. E si sa sityasyon *boycott* Lasanble i kontinyen. Mon pou pran mezir ki mon kapab pran anba lotorite zeneral, anba *Standing Order 101*, ki Speaker i annan.

Menm si pa tou regilasyon ki annakor lo ki mannyer sa bann kalite konportman i devret – *in fact* sa kalite konportman pa ganny adrese dan Lasanble. E sa ki *Standing Order 101*, i donnen, i dir Speaker i kapab pran mezir anba okenn

sityasyon ki *Standing Order* pa adrese. Alor mon pou fer li.

Chief Whip LDS mon ekspekte ki ou Manm i la pour nou rebran ller en kar.

(BREAK)

MR SPEAKER

Lasanble a rebran avek deba e Onorab Cecile Larsen, i annan laparol.

Onorab Cecile Larsen i annan laparol. Mon pa pe pran okenn *point of order*, ki mon zize i zis ganny demande pou enteronp e retard Lasanble

(Interruptions)

MR SPEAKER

Onorab. Onorab Larsen, ou annan laparol fer ou diskour.

HON CECILE LARSEN

Mersi Mr Speaker. Mr Speaker, tou Manm Onorab e Manm Piblik ki a lekout, Bonzour. En Bonzour spesyal pour tou Zabitan dan Distrik Au Cap.

Premyerman mon oule dir Mersi *Leadership* Parti *US* pou konfyans ki in donn mwan pou kontiny sa travay e ki mon ser koleg Onorab Spiro ti'n komanse e osi mon remersye tou Manm Onorab ki'n akey mwan.

Mr Speaker, mon nouvo dan sa Lasanble me selman

mon napa okenn leson pou vin pran avek Onorab Labonte.

(APPLAUSE)

HON CECILE LARSEN

E mon pa pou asize dan Lasanble pou ganny maltrete par en MNA ki'n anmenn Lasanble *into disrepute* e napa respe pou lofis MNA.

(APPLAUSE)

HON CECILE LARSEN

E i malere pou vwar ki zis sa kote latab ki ganny reprimannen.

Mr Speaker, avan sa mon'n toultan swiv SONA koman en lodyans dan lakour e mon'n swiv bann repons osi koman en lodyans. Me Ozordi mon pe ganny sa privez pou donn mon repons lo sa enn SONA.

Pour mwan, mon'n toultan vwar SONA koman en ladres ki Prezidan Larepiblik i koz fran lo leta Sesel. Lekonomi e sosyal e leta pep Seselwa. Mon ti ekspekte en *speech* ki pou donn nou sa vre Leta nou Nasyon. Kot nou sorti e kot nou'n arive, nou vre sityasyon aktyel. Koz lo nou lekonomi, koz lo nou ledikasyon, koz lo nou lazenes e osi nou vyeyar. Aret koz lo lepase. Koz lo larealite ozordi, kot nou pe ale e ki byennet i annan pour nou pep Seselwa.

Ki nou annan pou nou kominote, ki pe arive dan distrik, ki pe arive ek bann group sosyal nou kominote.

Prezidan Wavel Ramkalawan, ti delivre en *speech* Zedi le 27 Fevriye. Eski in donn nou larealite? Sa ki nou'n vwar se en konpany politik dan tou son splander. Kot in vin koz lo kitenge, kot in vin blanm Gouvernman avan, letan i pa'n delivre pou sa pep pandan sa preski 5an ki i o pouvwar.

Eski i akseptab pou en Prezidan vin servi slogan politik "*No turning back* e nou pa pou zanmen les tonbe" dan SONA? Selman mon kapab dir ki in mank en mo dan son lapriyer e sa se "Sesel pour tou son Zanford."

Sa enn i pa'n kapab dir aköz nou tou nou konnen ki anba sa Gouvernman, Sesel pa zanmen pour tou son zanford.

Mr Speaker, eski i akseptab pou en Prezidan vin devan Lasanble Nasyonal e maltret bann ki opoz li? Sel keksoz ki Prezidan Wavel Ramkalawan, pa'n fer parey son labitid se vin ranpli nou vant ek bann fo promes.

Mon krwar i nepli annan promes pou fer, aköz Lepep Seselwa in vwar li dan gran kler. Aköz ankor mon pou dir Mr Speaker, pou sa 4an nou'n temwen bann promes ki pa'n

ganny realize, nou kapab apel sa mank responsabilite.

Mr Speaker, Prezidan Ramkalawan, ti annan en manifesto ki i ti prezant ek lepep e mwan mon annan sa pou dir lo la. Mr Speaker sa manifesto ti plen zis ek bann plan *wishful thinking*. Wi Mr Speaker bann plan *wishful thinking*, ki in vin bat latet Lepep Seselwa avek.

Me larealite se ki i pa'n kapab *walk the talk* e prezan i asize e blanm tou lo lepase. I kler ki sa Gouvernman aktyel pa'n kapab delivre e pa pou zanmen kapab delivre sa ki ti'n ganny promet. Vre Leta nou Nasyon pa ti zanmen dan sa diskour, me i plito dan leksperyans toulezour nou bann sitwayen Seselwa e sa leksperyans mon kapab dir Mr Speaker, ki i pli move ki margo anmer.

Laplipar Seselwa pe kriy "ayoyo i fermal". Me dan plas geri sa boubou, i vin met plis disel ladan. Dan plas donn Seselwa lespwar, Prezidan Ramkalawan i vin trenn nou dan menm leta avek li. Kot lannen pase i ti deklar konmkwa i fristre. La sa lannen i vin fer en lot deklarasyon. I dir nou i fatigue. Me sa fristrasyon e lafatig i zis en leta depresyon e i bezwen fatigue, aköz i vwayaz tro bokou e i pa ganny letan pou li repoze.

Le 27 Septanm i pou ganny ase letan pou li repoze, aköz Seselwa pe al tir li.

(APPLAUSE)

HON CECILE LARSEN

Mr Speaker olye koz lo kitenge, Prezidan Ramkalawan ti devret pe met en bon lanfaz lo bann dimoun ki pe viv avek dezabilite. Zis envit zot pou en moman avek li *State House* pa ase pou soulaz lenkyetid, e devouman sa paran.

Nou vwar bokou zanfan ki ne avek *ASD, Autism Spectrum Disorder*. Nou vwar bann paran ki annan zanfan avek *ASD* ki pe lite pou ki sa bann zanfan i ganny aksepte. Nou vwar sa bann paran pe atann a dezespwat pou zot zanfan ganny *diagnosis* formel e pou ganny akse bann lentervansyon nesaser.

Bokou sa bann lentervansyon pa disponib Sesel. E alor nou vwar bann paran ki mwen fortinen e napa akse avek resours pe bezwen kit zot lanplwa pou siport zot zanfan. Bann paran pe lit bokou pou sa bann servis e pou zot zanfan ganny aksepte.

Mr Speaker, Seselwa i sipoze annan plis larzan dan nou pos anba sa Gouvernman, me ki nou'n vwar. Parey li menm in dir, bour lanmen dan pos, nou bat zis ek lanm.

Bann Manman tousel pe vwar li difisil pou fer 2 bout zwenn. Bann pti biznes pe vwar li difisil pou fini lannen avek en profi. Bann pansyoner i bezwen trimouse pou aste zot pti konmisyen ek sa R10,000 imaziner ki zot in gannnen e pe viv lo la par laverti.

Annan nou frer ek ser ki pe vwar zot bezwen fer 2 ou 3 louveraz pour ki zot kapab pey zot bann *Bill*. Ki pli lavi i vin pli dir, pli Gouvernman i azout detruwa sou lo la.

Alors sa 1600 zour ki Onorab Georges in koz lo la Mr Speaker, i paret *LDS* in reve. E sa in vin sel fason pou zot vin anbet nou pep e fer nou krwar ki zot Prezidan pe travay. Kan larealite i ki sa Prezidan in *fail* nou, e mon pou dir ankor, wi sa Prezidan in *fail* nou.

(APPLAUSE)

HON CECILE LARSEN

Pandan 1600 zour nou'n temwann bann promes ki pa'n ganny realize. Prezidan Ramkalawan, in touzour fer nou krwar ki i en zonm brav. Me laverite se ki i pa'n posed ase kouraz pou koz lo sa size pri lavi dan en fason fran e onnet.

En Prezidan ki ti kanpanny lo en kanpanny baze lo bes pri lavi, ozordi i regretab ki i rod tou leskiz pou blanm son *failure* lo la lo. Lo sa

size pri lavi, sanseon ki i sante se sanseon *COVID*, lager Ukraine, lager Israel, enn ler ou a krwar i annan menm lager imaziner ki ganny blanmen lo pri lavi.

Me sel keksoz ki i pa koz lo la, se son responsabilite pou fer desann pri lavi e met larzan dan pos Seselwa. I pa pe realiz sa bann fo promes ki i ti fer dan son kanpanny eleksyon, e i pou fini sa manda ek fo promes ek selman bann devlopman ki ti'n komanse par Gouvernman avan e ki li i pe pran laglwar lo la. Pa ti zanmen son proze, pa ti zanmen son rev. I rev e proze sa Gouvernman avan ki li in zis vin anbak lo la.

Mr Speaker, lo sa size *TRNUC*, Prezidan Ramkalawan ti anonse lannen pase dan son *SONA* ki sa komite sikseser ti'n ganny apwente. Me lan pli tar sa komite pa ankor ni zwenn pou fer son travay e se pour sa rezon ki lo kote sa latab nou kontinyen dir zot, arete glorifye medyokrite.

Rezon tou sa bann keksoz pa pe marse, Mr Speaker se aköz Sesel i annan en Prezidan ki zis oule ganny glorifye me, selman pa pare pou travay.

Mr Speaker, Prezidan Ramkalawan in koz lo nouvo kours koltar lo bann prensipal e osi lagrandisman lezot bout semen. In osi dir ki ou ganny

en bon lendikasyon leta en Pei par kondisyon son semen. Pour sa i pa'n koz lalang, akòz an realite sa Gouvènmàn aktyèl i parye sa bann kours koltar. Zis anler ki zoli.

(APPLAUSE)

HON CECILE LARSEN

Letan en pti lapli i tonbe, maler ek dezagremàn. Sa ta basen naze ki transpor i bezwen pas ladan avan ariv dan destinasyon i fer lapenn. Nou bann ero ti fer semen ek pyos ek pik e sa bann semen in dire pou bokou plis letan an konparezon ek remet sirfas koltar lo koltar, lo koltar.

Mr Speaker, les mwan pran en pti moman letan pou bouz dan mon distrik Au Cap. Kot sa ki mon anvi touse ozordi se leta nou semen segonder ki deplorab. Mon a tous en pti pe dan Capucin kot zabitan sa sou distrik dan distrik Au Cap e osi Anse Aux Pins ankor pe mont ek zot pake lo zot latet. Pey sarwa dan sa landrwa, fodre zabitan i al pran *loan*.

Alors zot pe vwar li difisil pou zot bouze e fer zot rev vin en realite. Mon konpran ki annan zabitan ki ti refize donn later pou fer semen anba ansyen Gouvènmàn, me sa bann ki ti pe anpes sa arive in fini kit sa monn 3an pase. Me kantmenm annan 2an ki

zabitan pe siplye parti siplye pou zot ranplas sa bann peron ek en semen loto pou fasilite mouvman. Zot leokri i tonm dan en zorey e sorti par lot.

E se pour la senp rezon ki, pour sa Gouvènmàn aktyèl komans en proze lo zero i *rocket science* pou zot. Zot in konfortab dan konplet proze ki deza annan en komansman. Re sirfas en semen ki ti deza la, pli fasil ki al ranplas peron ek en semen loto.

Mr Speaker, Prezidan in osi koz lo bann fasilite ki pou sa Gouvènmàn i en lafyerte. Me eski i pe pran kont bann defi ki bann zenn pe fer fas avek? Nepli annan landrwa pou bann zenn detann. Si mon kapab pran en legzanp, sa se pa lot ki *St Anne Jetty*. Ki'n vin zis en memwar pou bokou.

Zis parey bokou nou lans ki'n vin lans prive e nou zanfàn pa pou zanmen konnen kote zot paran in zwe e grandi.

Mr Speaker, nepli annan aktivite ki zenn i kapab partisip ladan. Ankor mon pou azoute, pou en paran kapab met son zanfàn dan en klib i bezwen pey en fortin konpare ek dan lepase kot bann klib ti a dispozisyon zanfàn e sa ti ed bokou pou devlop en talan dan en sport.

Mr Speaker, nou'n osi tann Prezidan Ramkalawan kondann fortman viktimizasyon e in osi dir ki

viktimizasyon pa egziste. Me nou tou nou konnen ki i annan nou ser ki'n vin viktim sa menm size ki i kondann fortman e dir ki pa egziste dan son Gouvernman.

I koz lo trenn lipye, be eski pa tou laprev i la devan zot lekel ki trenn lipye. Zot zis pe kasyet e blanm lezot pou protez zot limaz e limaz bann Minis. E sa i fer ki zot in ledopli larz pou larg zot fardo lo la. Par egzanp kot *PS* later ti ganny met deor sa vremen en rezon valab ganny met devan e sa en fe. Akoz ziska ozordi, sa menm endividi pe esper en *panel appeal* ki sipoze ganny apwente par Prezidan, pou ekout son ka.

E mon asire ki letan sa *case* i fini Seselwa pou vwar lekel ki pe vremen trenn lipye e la ankor nou a gete si i a blanm Gouvernman avan letan ki i pou vwar li bezwen al pey konpansasyon sa viktim.

Mr Speaker, annou bouz en kou lo bann ran devlopman ki dapre sa Gouvernman Sesel in tonm premye. E sa enn ki zot pli fyer e port plis lanfaz lo la se mo *Ibrahim Index*, sa in vin refren sanson ki zot pe sante depi Oktob 2024.

Me nou konnen ki sa rapor i baze lo rapor 2014 ziska 2023. Sa peryod Mr Speaker, i kouver Ladministrasyon 3 Prezidan e

zis 3an ladan ki'n kouver sa Ladministrasyon aktyel.

Alors Mr Speaker, sa i vedir ki ankor se travay Gouvernman oparavan ki'n etabli labaz Sesel sorti premye.

(APPLAUSE)

HON CECILE LARSEN

Me ankor, nou vwar zot pe rod laglwar dan reisit zot kanmarad. Seselwa i devret vwar byen kler, ki letan sa Gouvernman dapre zot, zot in *excel* dan en serten devlopman i vin zot laglwar. Me letan zot *fail* dan zot bann devlopman *wishful thinking*, zot blanm Gouvernman avan.

Mon kapab dir ki enn bann devlopman ki ti pe mars tre byen ki sa Gouvernman aktyel in deside aboli, se program *URS*. E nou konnen ki 3 kar Seselwa ki ti anba sa program i ozordi zour san en lanplwa. Bokou sa bann dimoun ki ti lo program *methadone*, se zot ki ti lo *URS*. E sa ki ti form par zot reabilitasyon.

I regretab ki nepli annan sa program formasyon pou permet bann sitwayen ki pe swiv tretman avek divizyon labi sibstans, tretman pou zot kapab re entegre dan lasosyete.

URS ti pe ed bokou e avek sa program bann zenn ki ti'n vwar zot lo drog ek lalkol,

koman zot soutyen ti pe ganny plase dan en lanplwa. I sagrinan ki rezilta aboli *URS*, i fer ki an se moman nou vwar bokou plis krim, e bokou nou frer pe mont prizon pou bann lofans initil aköz zot pa pe ganny aksepte dan lasosyete.

Napa en programm reabilitasyon. Sa ki pli regretan se ki ler zot sorti prizon, dan plas refer zot vin pli depandan lo drog, ki vreman en gro konsern e ki sipoze vin en priorite lo rod fason pou ede dil avek.

I regretab pou dir ki nou prizon pa reabilit dimoun, i pa ed ou pou refer ou lavi. I pa ed ou reentegre ou dan lasosyete pou aksepte e koriz ou fot. Sa prizon i zis en pinisyon pou nou bann zenn.

Oli programm reabilitasyon? Oli programm konsey? I fermal pou nou vwar bann Manman lo zot zenou an *espérant* ki lapriyer a ed zot ganny en solisyon.

Sa Gouvernman ti dir i pou anmenn solisyon e soutyen pou bann fanmir. Me malerezman se pa sa ki nou pe vwar. Gouvernman pa pe *practice* sa ki i ti *preach* Mr Speaker.

I ti dir i pou met en *stop* ek bann *dealers*. Ankor, sa size met en *stop* ek bann *dealers* i zis en fraz dan vokabiler Prezidan Ramkalawan. Me aksyon zero.

En kantite i kapab ganny dir letan nou koz lo bann kondannen ki pe servi en santans dan sa prizon Montagne Posee. Letan nou ekout Prezidan Ramkalawan, ou a krwar dan prizon Montagne Posee i annan zis bann trafiker drog.

Me nou tou nou konnen ki en kantite nou frer in ganny arase zot drwa laliberte e pe fer en santans Montagne Posee pou rezon ki pa valab e pa fer sans.

Mon pou pran en legzanp kot en papa i kondann 6 mwan pou pa pey alimoni e al Montagne Posee. Sa manman pa vwar en laklerte. Me i plito vwar li pe bezwen trimouse pou kontinyen sonny son zanfán. Aköz kantmenm sa papa i fer 6 mwan prizon, sa manman pa gannnen larzan ki'n akimile, e i osi pa gannnen pandan sa letan ki sa papa in kondannen e fer dan prizon. Pandan ki in kondannen e pe fer dan prizon, sa zanfán pa pou viv, Mr Speaker?

Aküz dapre Lalwa sa papa in pey pou son fot an asizan 6 mwan Montagne Posee. Mannyer sa sityasyon kondannen pou alimoni i ganny zize ou a krwar nou zanfán bann pti bef, ki nou met dan en laplenn bomaten ziska tanto pou manz zerb.

Mon demann bann manman tousel ki pe pas dan

sa sityasyon pou annan pasyans. Septanm pa lwen. Mon osi demann tou mon frer e ser Seselwa ki'n perdi lespwar pandan sa 4an, ki sa Gouvernman *wishful thinking* in o pouvwat pou rod sa lafors pou *deal* avek sa dezapwentman ziska Septanm.

E apre sa ou ek mwan ki'n realize ki nou nasyon i merit en dirizan ki rekonnet nou bann difikilte, e travay sanses pour sirmont zot nou pou tir li akoz US i reste sel opsyon pou Sesel.

(APPLAUSE)

HON CECILE LARSEN

Mersi. Mersi e pas en bon lazournen.

(APPLAUSE)

MR SPEAKER

Mersi. Mersi Onorab. Laparol prezan pou Onorab Gerard Bijoux.

HON GERARD BIJOUX

Mersi Mr Speaker. Fotespere mon pa a fer zot ganny sonmey. Bonzour Mr Speaker e tou Manm Onorab osi byen ki tou Seselwa ki pe ekoute.

Premyerman Mr Speaker, mwan osi mon oule remersye ou ek Lasanble pou program lantrodiksyon ek lakey ki mon'n resevwar

ansanm avek mon koleg. Mon osi annan mon remersiman pou nou 2 ansyen Manm Onorab, Onorab Flory Larue ek Onorab Naddy Zialor.

Mon konnen ki sa 2 dimoun in debout for pou LDS ek tou prensip ki nou parti i reprezante. Ansanm nou pou kontinyen travay pou nou fer monte nou paviyon e anmenn devlopman nou pei lo en lot nivo kot nou tou nou pou pli fyer pou dir ki nou en Seselwa.

Mon oule osi remersye mon bann koleg Onorab pou zot lakey, lankourazman e zot sipor ki zot in akord mwan menm avan mon vin dan Lasanble.

Mr Speaker, i annan bann moman enportan dan lavi kot en dimoun i bezwen pran en desizyon. Tou sironstans i anmenn son defi ek sakrifis. Ozordi mon trouv mwan dan Lasanble Nasyonal akoz mon'n pran en desizyon ferm pou mwan met mon devan dan servis mon pei.

(APPLAUSE)

HON GERARD BIJOUX

Mon'n deside pou zwenn sa lekip solid dan sa Lasanble akoz mon vwar ki LDS pe anmenn sa pei lo semen devlopman e i pe regard tou Seselwa parey.

Mon vwar klerman ki sa slogan Sesel pour tou son

zanfan in enn ki pa zis bann zoli mo, me plito enn ki pe ganny aplike toulezour. Sesel in vreman vin en pei loportinite, kot sak zanzan ki ne lo nou later i ne lib e kapab aplik son lekor pou akonpli son rev.

Mon oule remersye *Leaders* nou Parti ki'n donn mwan sa sans e privez pou reprezant *LDS* dan sa lenstitisyon enportan pou nou pei. Kot desizyon vreman enportan i ganny diskite e pran. Sa i montre ki nou parti i krwar dan son dimoun avek nouvo lide pou fer avanse nou pei.

Nou parti i resevwar dimoun lebra ouver e kontribye pour ki potansyel sak endividi i ganny realize dan fer sa ki i byen e bon pou nou pei antye. Mon kontan e fyer pou viv dan en pei kot lafreder ek viktimizasyon se bann prensip lepase.

Alor, mon kontan ki mon dan en lekip ki pou travay dir pou fer sir ki nou pa retourn an aryer. Parey nou pe dir ansanm avek Lepep Seselwa "*No turning back!*".

ALL LDS MEMBER

"Kit li lanmenm!"

(APPLAUSE)

HON GERARD BIJOUX

Mr Speaker, mon pou komans mon larepons *SONA* par agree ek nou Prezidan ki Leta nou Nasyon i pli meyer ki nou ti ladan an 2020.

Sa pa'n vin par azar, me plito par bon planifikasyon. Bann bon analiz ekonomik e bann bon Polisi fiskal ek monneter.

En lot eleman enportan i sa disiplin ki neser pou nobou pran desizyon difisil ki kapab kout ou, ou vot me ki ou pran aköz i meyer. Mon kapab konpar sa avek pran latizann pou byen. Latizann i kapab pa bon, me nou bezwen anmar leker e pran sa gran kwiye aköz nou konnen ki se sa ki pou redonn nou sa lasante e permet nou retourn ankor lo nou lipye avek nouvo lafors. Se sa ki sa Gouvernman *LDS* in fer dan nou pei Sesel.

I evideran ki tou dimoun ki vwar kler e pare pou servi zot lizye parey i fodre, pou vwar zis pozitivite dan byennet nou pep ek nou pei. Mon vwar ki nou lo bon semen e dan bon lanmen. Mersi Mr Prezidan ek ou bann Minis pou sa bon travay.

Mr Speaker, i annan bokou desizyon *populiste* ki a Gouvernman ti kapab pran, sa ti ava en pe parey sa bann lide ki tanzantan mon ti tande avan ki mon ti vin dan Lasanble. Sa i enkli zafer fer desann laz retret sorti 65an pou vin 63an. Donn tou

dimoun trezyenm mwan, ki i travay oubyen trenn son lipye e reste kot li, kot klinik dan Lendi bomaten oubyen anba laboutik pandan ler travay.

Kestyon ki mon ti a kapab demann sa bann ki pe vin avek sa bann largiman pou anbet Lepep Seselwa, se pou donn nou en leksplikasyon matematik lo kote larzan an plis pou sorti. Mwan mon pou dir klerman ki sat maron i nepli manz pti baba si zot pa dormi. E pou sa bann dimoun, komans zot zistwar sounboula ek kousoupa omwen avek en sirondann.

(APPLAUSE)

HON GERARD BIJOUX

Me Gouvernman *LDS* in fer byen son kalkil, pran letan pou analize e pour sa ozordi Sesel i dan meyer lannen posib e dan sa direksyon personn pa pou bar nou. Se sa Mr Speaker, ki fer ki tou kous nou sosyete i kapab debourye.

Nou bezwen admet ki napa en Seselwa ki pe mor lafen parey serten ti a voudre egziste. Napa en zanzan lo nou later Sesel ki divan pe ranpli son vant e napa en dimoun ki napa posibilite pou li grandi e vin sa ki li i oule. Se sa ki mon pou repete, ki Sesel in vin en pei loportinite e nou tou nou devret fyer.

Konbyen pei ki ti a voudre kot Sesel i ete avek tou sa pozitivite? Mon napa okenn dout ki letan pep Seselwa i koste ansanm, reflesir ansanm e travay pou byennet nou pep dan son evolisyon, nou pei pou kontinyen progrese.

Keksoz vreman enteresan e ki donn vre lespwar se ki tou zanzan Seselwa pou dan menm tren aköz personn pa pou ganny kit deryer atraver lapreferans, diskriminasyon e mank konsiderasyon apropiye.

Ozordi, mon ankouraz tou Seselwa pou zwenn nou, aköz parey zot pe vwar devlopman i serye. Koman nou promes travay, ansanm nou pou ariv dan sa pei kot rev i ganny realize e sa se pa lot ki Sesel.

Mr Speaker, ler mon get sa bann devlopman ki pe arive dan mon pei, i met en sourir lo mon figir e mon konnen i sa menm santiman ki lamazorite Seselwa i santi. Sa bann ki dir zot pa vwar naryen, parey bann ki mon'n ekoute depi Mardi. Les mwan zis demann zot si zot pa vwar kler oubyen zot pe zis kontinyen reste dan *denial* avek zot negativite ki pe touf zot?

Sel konsey ki mon kapab donner, se pou mwan dir zot sorti dan sa kosmar e fer fas avek realite, aköz sa lakoler ki

mon'n war depi ki mon'n antre dan sa Lasanble pa bon pou lasante.

Mr Speaker, devlopman dan Sesel i partou. Laplipar bann lenfrastriktir Gouvernman ki ti an rin, nou Gouvernman in fer sir ki zot ganny repare. Parfwa mon ganny lenpresyon ki Prezidan Ramkalawan ek son Gouvernman an 2020 ti ganny en kontra mentenans nou pei.

E mon bezwen dir ki in fer en tre bon travay. E la aprezan, an 2025 Lepep Seselwa pou renouvle son kontra avek Proze Konstriksyon pou anmenn nou pei byen devan dan lavenir. Fondasyon in fini ganny mete, la aprezan nou pe konstrir pou zenerasyon a lavenir.

Mr Speaker, mwan parey tou dimoun i konnen mon sorti dan Distrik Anse Royale. Mon'n swiv tou sa ki pase dan mon distrik e mon'n koz ek zabitan. Parfwa, mon riy tousel aköz mon vwar dimoun ki oule donn lenpresyon ki tou sa ki pe arive dan distrik se gras a li.

Avek tou respe, mon bezwen dir ki sa pa vre ditou. Dimoun ki deryer bann gran proze se pa lot ki Prezidan Ramkalawan, sa dimoun ki zabitan Anse Royale ti donn plis vot ki tou kandida an 2020.

(APPLAUSE)

HON GERARD BIJOUX

Prezidan Ramkalawan i annan en lentere personnel dan nou distrik. Semen Lafous, i ti promet bann fanmir e i pe delivre, Semen Mont Plaisir, i ti debloke. Lanbousir pou anpes linondasyon, li ki par deryer *landbank*. Li ki pe fer sir ki zabitan i ganny Lakres Anse Royale e en lot proze dan ki in montre en lentere personnel.

Sports Complex Anse Royale se Prezidan menm ki'n rod sa donasyon avek *UAE* e i ankor enn fwa byento pou komanse. Nou pe ariv lo staz *tender*, pa trakase bann zabitan, Proze Kordgard, Lakour Mazistra, *Government House*, Klinik e lezot pou materyalize anba en lot Gouvernman. Se sa Gouvernman ki mon reprezante e sa se *LDS*.

(APPLAUSE)

HON GERARD BIJOUX

LDS i reprezant aksyon e non pa fer met pike e plis promes.

Mr Speaker, annou regard en pe pli pre sa bann proze ki mon Gouvernman *LDS* pe antreprann pou benefis nou zabitan.

Zis get sa semen la kot Sid Was Mahe, ki byen avanse.

Trotwar in ganny mete 2 kote semen e lalimyer pe ganny enstale. Si lezot propriyeter i donn permisyon, sa semen ava ganny konplete parey ki in prevwar.

Dan rezyon Mont Plaisir, semen Gran Riviere ek semen Lafous pe byen progrese, zis lapli ki'n met retar sak fwa ti'n preski fini, si pa ti'n fini.

Bann zabitan dan Sweet Escott, semen Bonne/ Dubel ki zot in espere pou plis ki 40an parey zot in dir mwan. Zot dir mwan ki sak fwa i lannen eleksyon bann dimoun, bann zans kot *SPPF*, *US* i vini i vin met pike pou montre zot kote semen pou pase. Me non zot pa'n gannyen. Be les mon dir zot ki byento zot pou gannyen zot semen.

(APPLAUSE)

HON GERARD BIJOUX

Sa semen pou komanse sa lannen menm e zot pou fyer sa soulazman ki zot pou resevwar.

I napa zis semen ki pou ganny konstrir, pou osi annan kare later *landbank* ki Gouvernman *LDS* pou met a dispozisyon nou sitwayen. *LDS* pe travay e mwan mon met mon a dispozisyon bann zabitan Anse Royale e mon pe deza travay avek tou mon

lenerzi. Zot kapab kont lo mwan.

(APPLAUSE)

HON GERARD BIJOUX

Mr Speaker, Prezidan in fer lapel avek tou bann travayer dan servis piblik, pou zot silvouple rann lavi nou bann dimoun pli ere par ofer zot pli bon servis.

Sa i en demann ki tou Seselwa i dakor avek. Nou pa kapab les dimoun reste dan pa konnen, san ganny en larepons. Sa i fer nou popilasyon fristre e apre zot blanm Gouvernman, malgre i kapab lafot en travayer ki swa pe *boycott* Gouvernman pou rezon politik oubyen senpleman enkonpetan e pares.

Fodre ki sa mantalite i sanze e nou rann sa meyer servis. Mon konsey se menm si zot demann pe pran en pe letan, kontakte zot e donn zot *feedback*. Dan sa fason dimoun i ava konnen ki staz zot demars in arive. Apre tou, zot ganny peye pou fer sa.

Sa eleman rann servis dan pli kourt dele posib i enn ki pou vreman sanz leta lespri nou pep, biznes pou bouze, dimoun pou zwaye e lavi tou kliyan pou santi zot ere e alez. Akoz tou keksoz pou mars vit dan en fason efikas. Ki pli bon ki sa!?

Mr Speaker, drog in fer son ravaz dan lavi nou bann zenn, tro bokou zenn in perdi zot lavi avek sa bann pwazon ki zot met dan zot lavenn. Ladministrasyon LDS ti pran li koman son misyon pou anmenn en lalit kont drog e mon vreman satisfè ki tou zefor pe kontinyen ganny fer dan sa lalit.

Napa en sel distrik ki pa'n ganny eparnye, sa i enkli Anse Royale. LDS pe fer tou pou termin sa soufrans ki bann paran i sibir ler zot zanfàn i dan drog. Sa bann loperasyon kot drog pe ganny sezi lo lanmer e osi lo erport pe anmenn bokou rezilta. Bann gro *dealer* dan sa biznes drog pe ganny anmase en par enn.

Bokou paran Mr Speaker, pe felisit nou Gouvernman pou sa lalit. Ler zot in tandè ki en lot Seselwa ki *Iran* koman garanti i kapab byento retourn Sesel, sa i anmenn lazwa.

En madanm dan leo Les Canelles in dir mwan, dir mersi Mr Prezidan akòz en lot nou zanfàn in ganny sove!

Mr Speaker, i malere pou dir ki dan sa lalit Gouvernman i li tousel. Lopozisyon i per pou koz for kont sa fleo ki pe ravaz nou pei akòz zot per ki zot ava perdi vot. Alor zot prefere reste trankil, tandis ki nou pep i soufer. Eski sanmenm sa kalite dirizan ki nou pei i

bezwen? Eski sanmenm sa bann dimoun ki anvi mont *State House*?

Sa ki montre ou klerman ki se zis zot lanbisyon personnel ki enteres zot. Zot anvi tit lo ledò Lepep Seselwa, me zot pa pare pou debout akote sa menn pep pou soulaz zot ek zot fanmir.

Ler Gouvernman pe lager kont dog, sa bann ki pe aspire pou vin dirizan sa pep, pou vin dirizan sa pei zot, zot pe promouvwar sa bann sibstans ki pe touy nou bann zanfàn. Nou dan LDS nou reste lwayal avek nou Prezidan.

(Interruptions)

MR SPEAKER

Onorab! Onorab! Onorab Loze. Ou'n enteronp mwan letan mon pe koze, silvouple!

Onorab dan ou parol ou'n dir “bann ki pe aspir pouvwar pe promouvwar sa bann sibstans”. Sa i en lakizasyon ki Manm Lopozisyon i enplike dan trafik drog, alor i pa korek e silvouple pa fer li ankor. Mersi e lezot silvouple pran kont.

HON GERARD BIJOUX

Mersi Mr Speaker.

Nou dan LDS nou reste lwayal avek nou Prezidan e nou dir nou pa anvi retourn dan staz kot en laliny ti R25. E nou dir, nou pou siport sa lalit

kont drog akòz nou debout lo kote nou lazenes e tou fanmir ek nou sosyete ki pe soufer.

Nou pou reisir dan sa lalit, nou dir byen for, “*no turning back!*”

ALL LDS MEMBER

“Kit li lanmenm!”

(APPLAUSE)

HON GERARD BIJOUX

Mr Speaker, mon anvi vwar en lazenes ki kontinyen adopte bann bon mers dan zot lavi pou zot grandi byen e vin bann dirizan ki nou pei i bezwen dan son devlopman.

Mon zwenn avek Prezidan pou felisit Mr Duncan pou bon travay ki SNYC pe fer. Nou tou nou rekonnet ki sa program pozitivite ki zot in lanse i aport son fri, i annan en bon lefe dan nou pei. Mon kontan pou aprann ki CJSOI osi pou deroul anba sa tenm. E pour sa nou pou ankouraz tou lazenes Seselwa pou ralye e donn zot tou pou fer paviyon Sesel mont pli o posib a tou moman.

Mon pran sa moman pou mon ankouraz nou lazenes ki lo bon semen pou reste e pa glise pou tonm dan tantasyon tou sa bann move lenfliyans. Mwan osi mon dakor ki mazorite nou lazenes pe fer sa ki byen e malerezman tro

souvan sa bann ki pe debourye i ganny mete dan menm pannyen ki sa bann ki'n tonbe.

Nou bezwen fer keksoz diferaman. Fodre nou ankouraz sa minorite ki'n tonbe pou zot les zot aprezan ganny enfliyanse par bann ki lo bon semen. Annou met sa defi devan nou bann zenn, pou sov zot dalon ki pe glise pou remet zot debout.

Lo nou kote, nou ava siport tou sa bann bon program pou prepar sa zenerasyon dirizan. Zis mazine ki kalite transformasyon ki sa i ava kapab anmennen pou Sesel?

Mr Speaker, mon napa okenn dout ki nou tou nou konsernen avek zistans ki nou lapey i anmenn nou. I vre ki tandans ki nou vwar se en logmantasyon dan pri lavi e sa i partou. E parey Prezidan in dir. pri lavi pa en keksoz ki depan zis lo Gouvernman i annan bokou eleman ki fer sa arive.

Parfwa nou krwar ki pri lavi i annan pou fer zis avek manze ki nou konsonmen. Non, sa pa vre. Letan pri petrol i ogmante i annan en lenpak direk lo pri lavi. Letan dimoun i fer monte zot servis, sa osi i annan en lenpak lo pri lavi.

Alors i bezwen annan en zefor kolektiv kot nou tou nou koste ansanm, devlop en

konsyans moral e tir latitid mazin zis nou menm. Me plito mazin nou kominote ki nou pou kapab avans devan.

Mon lapel avek tou dimoun enkli Gouvernman se pou nou koste e fer li nou misyon pou fer pri lavi desann dan nou pei. Mon krwar ki i annan bokou landrwa ki imedyatman nou kapab fer en diferans.

Annou fer sa pou nou kominote ek nou pei. Sa ki nou kapab fer, annou fer li. E sa ki an deor nou kontrol annou esey regarde osi kwa ki nou kapab fer. Mon krwar nou kapab reisir. Mon osi dir avek Lopozisyon pou pa zis kriy lasasen lo pri lavi, e koze konmsi zot kontan ki i o e pa zot ki o pouvwar, me plito parey dan lalit kont drog pou zot osi anmenn zot kontribisyon.

Mr Speaker, mon en dimoun ki siport tou aksyon, ki konstrir en kominote ini. Mon pa krwar ki i annan plas pou nou senm divizyon dan nou pei. Sakenn antre nou i annan en plas e en rol pou zwe. Se pour sa ki mon napa okenn dout ki si nou met plis zefor dan nou fanmir, nou ava trouv sa transformasyon ki nou pe rode dan nou kominote.

Mon pou ankouraz tou aktivite, tou rekognisyon e tou zefor ki rod anmenn nou pep

ansanm. Nou lopinyon i kapab diferan, me sa pa vadir ki nou pa kapab siport kanmarad e viv byen ansanm kot sa ki mal i reste mal e sa ki byen i reste byen. Nou pei in sorti dan bann lannen fernwar parey ki nou kapab swiv dan *TRNUC*.

Ozordi i depan lo sakenn ant nou pou transform sa laverite dan linite ek rekonsilyasyon nasyonal. Mwan, mon enn sa bann dimoun ki pou ede pou fer sa arive aköz mon kontan mon Sesel e kontan mon pep.

Mr Speaker, an konklizyon mon pou ankor enn fwa dir mersi pou sa loportinite pou mon servi mon pep koman *MNA*. I annan bokou pou aprann e fer, me mwan osi mon'n vin avek mon bann bon lannen leksperyans e mon pou met tou sa ki mon annan an dispozisyon mon pep ek pei.

Mon napa okenn dout ki sa lannen pou enn ki pou sofe avek eleksyon. La mon senpleman demande ki tou dimoun ki anvi vin en dirizan i pran koz laverite e aksepte la realite koman bann fason fer ki nobe, aköz se sa ki pou ed nou lazenes e nou pep avans devan. Dan sa demars mon don mon langazman.

Mon napa okenn dout ki Sesel i dan bon lanmen anba Prezidan Ramkalawan ek *LDS*. Diskour lo Leta Lanasyon pa'n

menm tous en kar sa pozitivite ki pe arive dan nou pei. Letan serten nou Lopozisyon i dir ki Prezidan pa'n tous lo tel e tel size, mon larepons i senp. I annan tro bokou bon keksoz pou koz lo la. E si i ti koz lo sa ki zot pe dir, ti pou annan zis keksoz pozitiv menm. Pa les size ki i pa'n koz lo la fer zot krwar i pe kasyet keksoz. I pa en Prezidan ki kasyet naryen me i enn ki dir keksoz fransman e onnetman a tou moman.

Alor Mr Speaker, mon zwenn la mazorite Lepep Seselwa pou dir ki le 27 Septanm nou pou fer en sel keksoz. Nenport ki landrwa ki LDS i ete lo *ballot paper* nou pou tik, aköz nou pou dir *no turning back!* Kit li lanmenm! Mersi bokou.

(APPLAUSE)

MR SPEAKER

Mersi Onorab. Laparol pou Onorab Doyace Porice.

HON DOYACE PORICE

Mersi Mr Speaker. Mr Speaker, tou mon bann koleg MNAs e tou Seselwa a lekout bonn apre midi, espesyalman Baie Ste Anne Praslin. Letan ki mon annan laparol, mon pou profite pou *welcome* mon 2 koleg, Onorab Valdana Sultan e Onorab Gerard Bijoux dan nou *Caucus LDS*. E

osi Onorab Larsen dan Parti US.

Mon osi dir mersi Onorab Naddy Zialor e Onorab Flory Larue pou zot kontribisyon anver nou *Caucus LDS* dan Lasanble. Ki Bondye i kontinyen gid zot dan zot nouvo metye. E kontinyen donn en koudmen Parti LDS pou sa *win* 2025. E mon osi dir Onorab Spiro bonn sans dan son fitir travay.

Mr Speaker, atraver ou mon anvi koriz Onorab Rocky, vizit ki Prezidan ti fer dan lofis servis piblik lo Praslin ti napa naryen pou fer ek sa 2 Onorab LDS lo Praslin. Annou aret koz keksoz ki nou pa konnen.

Mon pe osi enform li ki masin dyaliz pe fonksyonnen Lopital Praslin. Mon pa konnen kote in ganny sa move lenformasyon. Lopital Praslin i enn mon *baby*, ki sak fwa mon Praslin mon al en pti vizit pou gete si tou keksoz pe marse, menm si mon pa en Manm elekte.

Mr Speaker, nou dan LDS nou pare pou travay e nou pou kontinyen travay ek nou Prezidan Wavel Ramkalawan pou nou *win* sa eleksyon le 27 Septanm 2025. E ki nou dir? "*No turning back!*"

ALL LDS MEMBERS

"Kit li lanmenm!"

(APPLAUSE)

HON DOYACE PORICE

Sesel pour tou son zanfan. Sa i toultan dan lespri nou Prezidan Wavel Ramkalawan son bann Minis, nou bann *MNA LDS* e osi tou Seselwa.

Nou tou nou'n konn nou drwa e menm nou grander. Ozordi Seselwa i koz ler i oule, dir nenport kwa. Me parfwa i anmenn nou bokou pli lwen. kot nou mank respe pou nou kanmarad e menm bliy nou responsabilite.

Koman lontan avan 2015 bokou nou pa ti konn nou drwa menm pa ti kapab koze. Akoz nou ti pou ganny bate, zet anba en pon, menm ganny disparet par bann move *leader* ki ti annan dan sa pei Sesel. Alor, nou dir “*No turning back!*”

ALL LDS MEMBERS

“Kit li lanmenm!”

(APPLAUSE)

HON DOYACE PORICE

Avek mon retour lo mon zil koman en politisyen an 2018, siporte par mon *Leader* Parti. Mon ti santi ki mon zil ti bezwen mon avek *LDS*, espesyalman mon distrik Baie Ste Anne . Apre plizyer lannen apre lannen pa'n ganny devlope parey i ti devret.

Gouvernman *SPPF*, *US* ki ti pe diriz sa Sesel oparavan ki krwar ki zis serten

devlopman ki enportan san mazinien ki i annan bokou plis ankor ki pou kit nou zabitan dan konfor e zwaye.

Mr Speaker, mon komans mon repons lo Leta Lanasyon koumsa, zis pou mwan montre Lepep Seselwa espesyalman mon zil e zil pros diferans ki i annan ant Leta Lanasyon 6an pase ek Leta Lanasyon aktyel ki sa Ladministrasyon *LDS* i dirize. Dirize par Prezidan Wavel Ramkalawan ek son lekip in fer.

Akoz parfwa i annan nou ki bliy vitman kot nou sorti oubyen ki nou'n pas ladan avan *LDS* i pran sa pei Sesel. Serten nou pe zis les bann move dimoun, fouter dezord, bann voler dan serten parti politik. Ozordi pe bat zot latet zis par lafen pouvwar.

Sa menm *Leader* Parti *US* ki'n dir zot ki ler i pou vin o pouvwar 2000 zanmen i pou montre zot, zot drwa. I pou pous tou travayer aköz dan bal kafe napa triyaz. Sanmenm sa kalite dirizan ki Seselwa pe rode 2025? Mon krwar pa Mr Speaker, Seselwa in dir “*no turning back!* Kit li lanmenm!”

Akoz sa Ladministrasyon *LDS* pe travay, pe delivre, pe rod solisyon pozitivman. Pe refer sa pti pei Sesel vin sa pti bizou dan Losean Endyen. E menm dan lemonn antye. Me i annan pa vwar ditou, zis aköz

pa zot ki pe fer ouswa zot ki pe atrap larzan dan zot lanmen pou zot kontinyen vole.

Les mwan Onorab Doyace Porice montre ki leta lanasyon dan distrik Baie Ste Anne ki dan lepase ti'n ganny neglize. Zot ti krwar sa distrik pou zot, zot ti krwar ki zabitan pa pou zanmen konnen ki savedir en wi ouswa en non. Zot ti krwar ki sa distrik pa pou zanmen al annavans.

Me Bondye in diriz mwan e mon'n antre koman en zabitan sa distrik. Travay dir avek mon Ladministrasyon LDS. Vwala bann zoli proze ki nou zabitan in *achieve* pandan sa 4an edmi. Nouvo lasose avek son bann zoli kiosk ki Pralinwaz i kapab *chill* anba la. Letan zot pe esper Cat Cocos ouswa Cat Rose.

Sa bann zoli pti *tuck shop* kot nou kapab aste bann bon *snack*, manze, labwason, ki fer par Pralinwaz. Zis parey Stephen Morgan, Harry Arnephy, Cliff Barbe. Osi sa bon *juice* Kreol ki Mr Adeline ek son madanm i organize pou nou. Pa i gou konmela dan nou pti distrik Baie Ste Anne ?

En pe pli devan sa zoli *roundabout* byen organize, nou zoli bazar ek tou son diferan lenfrastruktir, peser avek ferme pe byen apresye. *Rock armouring* dan Cap Samy e osi Anse Marie Louise. Zoli sirfas koltar lo nou semen

primer e osi segonder. E mon dir mersi de lapar zabitan.

Mr Speaker pa fini, nou zoli sant e lofis ladministrasyon distrik ki fek ganny renouvle e osi fer louvertir mwan pase, ki ti ganny propoze par *ex DA* Denis Antat e pouse par nouvo *DA* Berty Cedras, e Minister Gouvernman Lokal. Zabitan i vremen kontan. Menm sa pli vye zabitan dan son 102an ti la pou apresye sa ki pe pase. E mon dir mersi sa Minister. E nou dir "*No turning back!*"

ALL LDS MEMBERS

"Kit li lanmenm!"

HON DOYACE PORICE

Praslin in menm annan en *Baz Coast Guard* pou sirveyans nou bann zil e pou lit kont move lenfliyans. Parey nou deza konnen bann lord ki pe ganny mete konsernan sa *famous* drog lo nou zil. Bann paran e osi zabitan pe apresye sa travay fer par nou bann zonm ek fanm dan *uniform*, pou anpes nou bann zenn kontinyen ganny servi e detri zot lavi.

Mon dir mersi sa bann fanm ek zonm dan *uniform*, espesyalman Lapolis, Larme lo nou zil. Kontinyen sa bon travay e nou deryer zot.

Mr Speaker, lofis ladministrasyon *PUC*, Baie Ste Anne Praslin, osi pe aranze e

pe grandi. Zot lofis pou anmenn konfor pou travayer, e osi konsonmater.

Sa i en keston ki mon ti demann Minis konsernen 2an pase dan Lasanble e ozordi mon fyer mon rev pe vin vre. Gras a sa Ladministrasyon LDS e nou nouvo *manager* Denis Antat ki'n pouse pou bann proze ki ti la i ganny realize. Pour sa, mon dir mersi sa Minister Konsernen.

Plizyer *cross barrier* in ganny mete e pe kontinyen pou proteksyon nou semen e transpor, bokou lenfrastruktir in ganny mete lo Ile Eve pou bann pti biznes, e pe kontinyen. Nouvo semen Pasquere pe kontinyen. Pa i gou lo nou zil? Se sa ki nou apel Leta Lanasyon ozordi. Tousala sa bann move politisyen pa vwar, pa trouve.

Sa ladministrasyon pe montre zot ki mannyer i servi *taxpayers' money*. Bann donasyon ki Sesel i resevwar aletranze, kot nou Prezidan Ramkalawan i al rode sak fwa i vwayaze. I pa zis al manze e bwar lo avyon, ouswa al pronmen dan bann pei, parey bann bandi ek foutre dezord i toultan dir lo li. Akoz zalouzri i prodwi laenn, Mr Speaker.

Me zot pa trouve ler zot *leader* ouswa zot ki swadizan Prezidan zot Parti, i vwayaze dan *first class*, ki zis al aranz

son prop lekor. I pa ni mazin nou Seselwa. I pa ni mazin nou Seselwa ki egziste la ater Sesel ki swadizan pe fer li vin pli zoli. Me mon krwar pa si i ti get li dan laglas, *huh....huh Pinocchio* pir.

(laughter)

HON DOYACE PORICE

Mr Speaker, zis pran tou larzan Lepep Seselwa. Apre zot in vann tou sant ek later ki ti pou Seselwa e fer krwar pou zot, be pa i mal sa? Seselwa ouver zot lizye, sirtou sa bann ki siport *A New United Seychelles*.

Demann keston lo sa bann gro, gro ta larzan ki zot in gannnen, zot ti kapab kontribye dan konpansasyon bann viktim *TRNUC*, ouswa met en pe dan Fon Pansyon pou Seselwa benefisye. Akoz *United* Sesel, pa ti donn later Gouvernman a fer lakaz pou Lepep Seselwa ki napa enn. Ouswa donn Lepep sa bann sant kominoter pou fer aktivite ladan.

Kot Baie Ste Anne pa'n ganny eparnye, Mr Speaker. Avek sa Sant Payanke, Moulinie Estate. Pous sa bann dimoun ki'n ladan an plis ki 20an konmsi pa ti pey zot, bann voler. Mon rapel sa sant ti pou distrik, pa konnen keler in ariv lo non *United* Sesel.

Ki konfyans Lepep Seselwa i kapab annan dan en parti kriminel, ki'n deza pran lavi nou fanmir? Sanmenm sa parti ki anvi vin o pouvwar 2025? Zot napa konpasyon e zot napa pider anver sa pep. Bann voras, bann move dimoun. Toutfason US pou konn zot grander 2025, aköz Seselwa in dir "*No turning back!*"

ALL LDS MEMBERS

"Kit li lanmenm!"

(APPLAUSE)

HON DOYACE PORICE

Mr Speaker. mon retourn ankor lo bann zoli proze ki pe kontinyen fer lo Praslin. Sirtou dan Distrik Baie Ste Anne , batiman pou teste transpor ki byento nou pou fer louvertir e koup riban. Kordgard, lopital ki pe renouvle. Kontinyasyon lenfrastruktir lo Ile Eve.

Byento SPTC pou komans son nouvo batiman lo sa bout later obor teste transpor. Lezot morso later lo Ile Eve ki pe al donner byento pou pti biznes. Kontinyasyon sirfas semen lo Praslin, bann nouvo semen segonder byento pou amelyore. E pa bliy sa bann zoli *bin site* ki pe kontinyen fer, e ankor nou dir mersi Gouvernman LDS.

Se sa Leta Lanasyon. Ler nou vwar keksoz pe ganny fer,

pe kontinyen fer e dan plan pou fer. Tousala Mr Speaker, sa bann move dimoun pa trouve. Kot i konsern ledikasyon, pa vin gete. Nou bann etidyan dan Praslin segonder pe fer tre byen akademikman, zot ganny sa sans pou fer zot o *level* lo Praslin menm. Bann ki al lekol *post* segonder, *allowance* in ogmante.

Pa bliy osi kot i konsern *sport*, nou bann lekip pe fer pli byen ki Mahe. Prezan zot dir sport i aplat? Mersi Sir Sony Athanase, mersi Kalix, mersi Antho atraver nou bann lekip sport ki annan.

Osi kot i konsern lagrikiltir avek sipor bann lezot partner, nou etidyan ozordi pe zwiy zot legim, dizef, e byento zot pou manz zot prop lavyann poul. Ou vwar ki i annan devlopman kot nou lekol, lo nou zil. E sa mon pou remerisi *Headteacher*, Sir Ian ek son lekip *teachers*.

Mr Speaker, mon pa'n bliy Lekol Primer Baie Ste Anne ki zot osi pe fer byen dan plizyer domenn. Kot mwan osi mon'n ede dan en fason ou en lot, e pour sa mon pou remerisi *Headteacher* Monique ek son bann *teachers* pou sa bon travay.

Tourism pe fer tre byen lo nou zil, bokou touris i kontan nou zil. Si ti napa touris parey Lopozisyon minoriter pe fer

nou krwar, akòz ki biznessmenn pe kontinyen konstri lotel, ouswa pe fer *change of use* ek zot lakaz pou fer *guest house*? I montre ou ki i annan touris.

Bokou lenvestiser pe envestir lo *car hires*, pti *omnibus*, *taxi*, e menm parfw pa ni ase pou la demander. Savedir i montre ou ki i annan bizness nou lo zil. Ou konnen par ler Mr Speaker, ler ou vwar Lopozisyon minoriter pe fer krwar i pa vwar kler, ou les zot. Akòz zot pou kontinyen napa lizye pou trouve, napa nennen pou santi, e menm lalang pou bate. Akòz zot tro koz pa vre anver sa pep.

Seselwa ouver nou lizye, ouver nou zorey, regarde, ekoute e fer sir nou not sa ki enportan pou nou pei Sesel. Non, pa not bann mansonz ki ganny dir par bann ki pa vwar kler, ki voras pouvwar.

Kot i konsern later, lakaz, *condominium* lo nou zil, sirtou kot i konsern Distrik Baie Ste Anne . I annan ki'n fer e i annan ki pe al ganny fer. Kot nou zabitan pou benefisye atraver en lakaz oubyen en bout later.

Menm serten zabitan i reste semen *PUC* pou benefisye atraver en lesanz later ek lakaz dan proze Pti Lavil. Mersi sa Minister konsernen.

Mr Speaker, ozordi ler Sesel in sorti dan sa bann katastrof ki Gouvernman *SPPF*, *US* ti kite dan sa pei avan 2020. Prezidan Ramkalawan avek Gouvernman *LDS* in aranz sa pei Sesel, prezan *US* in vwar in bon pou zot, in bon pou vole, in bon pou ganny ankor parey dan lepase.

Kot gro ta larzan ti pe partaze, ki mon ti vwar dan mon 2 lizye Mr Speaker. Mon leker ti fermal akòz sa larzan ti kapab fer Lopital La Digue, aranz drenaz, aranz Lasose, refer lekol lo zil, byen lontan.

Zis parey Prezidan Ramkalawan ek son ladministrasyon in fer avek bann donasyon. *Taxpayers' money*. In fer lopital, drenaz, zoli lasose. In aranz La Digue e met zabitan dan konfor. *LDS* in toultan pe met son pep e son zil aker. Nou dir “No *turning back!*”

ALL LDS MEMBERS

“Kit li lanmenm!”

HON DOYACE PORICE

Tou fason Digwa in fini vwar ki Parti *US* napa plan, menm si zot pe fer krwar zot pe vin fer pli byen, kan zot ti les zabitan soufer pou tou sa letan. I annan bokou ki'n konn zot e pe zis fer zot krwar lizour pou aswar. Sa bann Digwa pa anvi

retourn an aryer e zot dir, kit li lanmenm.

Mon koleg *MNA* elekte Baie Ste Anne ek La Digue i konn byen, zabitan in fini deza dir zot kote zot krwar *Leader* sa Parti *US* pou kapab diriz sa pei Sesel. Plizyer dirizan ki ti dan son Parti *SPPF*, *US* in koze, aköz zot konn sa msye fouter dezord byen.

Sa *Leader US* pe zis vin rod larzan, ek pouvwar apre i pou zis *yes* tande, *no* konpran. Aköz i pa pou konnen...

MR SPEAKER

Onorab! Onorab! Fer sir ler ou fer sa bann remark ou pa pe koz lo Manm Lasanble, ou annan drwa koz lo politik, zis ekskli Manm Lasanble ki la prezan. Mersi.

HON DOYACE PORICE

Aküz i pa pou konnen ki manner pou dirize. Pou vin en Prezidan Mr Speaker, pa zis dir ek labous ouswa zis zwir sa non. I annan son travay ki vin avek. I pa parey louveraz en Minis ouswa travay avek *methadone*. Fodre Seselwa i obzerv sa byen.

Sa Mr Prezidan sa parti, son zalouzri, gro leker, aköz i pa ti krwar ki Wavel, John, Charles Ramkalawan pou vin Prezidan en zour e sa in sok li.

Prezidan Wavel in *train* Mr Speaker e in mir dan sa bann travay. Pandan 30an i pe

lite e Bondye in vwar ki i kapab e pare pou diriz Sesel. Non pa zis in dormi parey sa msye e lezot ki pe met kandida. Reve zot anvi vin Prezidan, pa mars koumsa sa. Nou, nou dir "*No turning back!*"

ALL LDS MEMBERS

"Kit li lanmenm!"

HON DOYACE PORICE

Mr Speaker, travay en Prezidan pa en metye tou dimoun. Sanmenm dan lepase ti annan ti kite avan son ler aköz ti'n lour, lanmans pwalon ti so e pa kapab tenir. Me nou Seselwa nou anvi ankor sa bann simagri ki'n pase dan lepase? Me non.

Nou, nou anvi en Prezidan ki kapab, ki pare pou rod solisyon ler i fodre. Pare pou defann nou pei, pare pou ekoute, pare pou desarz son responsabilite byen anver son pep.

Seselwa pa anvi en Prezidan ki pou zis parey en fantonm *State House*, ki pou zis fer per dimoun. Nou pa oule en Prezidan ki pa konnen ki manner pou adres son pep letan i pe vin fer en diskour, ki dan Sesel ou osi aletranze.

Mr Speaker, tou sa ki mon pe dir ozordi, set en vye Manm *US* ki'n asiz ek mwan e dir mwan ki manner i vwar sa kandida Prezidansyel. I dir mwan i ti kontan son parti

depi defen ansyen Albert Rene, me la in degoute akoz swazir kandida Prezidan dan son parti pa ti zis. Akoz sa msye i krwar Parti *US* i zis pou li.

E menm serten dan sa 10 dan nou Lasanble, ki dan Lasanble pa krwar dan li. Zot zis pe fer li krwar, apre zot pou zet li anba, parey li i ti fer avek son Prezidan ki ti la dan son parti. Ou pa vwar zot met zis zot portre letan zot al lo teren e pa enterese avek son portre. *Haa...haa* nou a konnen en zour.

Mr Speaker, nou dan *LDS* nou toultan pe promot nou Prezidan Parti. Akoz nou vwar ki i pe debourye, i pe fer en bon travay. Konmsi imsyek Madanm Payet, e osi imsyek Madanm Philoe ki reste Baie Ste Anne e ti en siporter *US* i dir nou. “Prezidan, kontinyen sa bon travay e ki Bondye pou touzour deryer li avek son lekip. E nou pou kontinyen priy pou zot pour le 27 Septanm zot *win* avek en gro poursantaz”.

Pa i ankourazan sa Mr Speaker? I montre nou ki bokou Pralinwaz la ater i kontan nou, i kontan mwan, i kontan Onorab Wavel Woodcock ek son lekip *LDS* Sesel. Zabitan i kontan sa lavans ki'n annan pandan sa 4 edmi lo nou zil. Ki nou'n rantre dan Gouvernman e nou'n fer

sir ki nou pa'n kit personnat.

Kantmenm ozordi nou pe vwar ki serten travayer dan Lofis Gouvernman ki ankor pe met retar avek travay, an krwayan zot pe pini Prezidan ek son ladministrasyon zis akoz politik bon marse. San realize ki zot pe pini zot prop fanmir, zanmi, e lezot ki dan bezwen. E osi, zot pe met retar travay ki pou benefis nou lasosyete dan nou pti pei Sesel.

Alors Mr Speaker, mon pou demann sa bann travayer dan Gouvernman pou silvouple met politik de kote ler nou pe deservi nou zabitan. Fer li avek nou leker prop, pou byennet nou sitwayen. Bann ki pe fer byen dan travay nou felisit zot e nou dir zot kontinyen debourye.

Nou en pti tas lo map dan lemonn, nou annan selman 100 ekek sitwayen. Alors, annou zwenn ansanm, koste nou zepol pou siport nou Seselwa. Apre tou. Sesel i pou tou Seselwa, ki nou viv Sesel ou aletranze. Annou esey sanz nou *mindset* anver bann politik bonmarse ki pe detri nou pei.

MR SPEAKER

30 minit Onorab. Konkli.

HON DOYACE PORICE

Zot dir ki kou lavi i ser, wi. Wi Mr Speaker, me nou Gouvernman LDS ti zwenn li koumsa. Mon kapab temwannen ki pa zis Sesel ki kou lavi i ser. Mon'n al dan plizyer pei, menm la ater dan Losean Endyen kot lavi i ekstrememan pli ser ki Sesel.

Pou terminen Mr Speaker, mon annan en mesaz pou bann zabitan Baie Ste Anne Praslin, se pou nou annan en Leta Lanasyon pli kontinyel pou 2025 pou al 2026. Se zot bezwen en serviter ki la pou zot.

En fanm determinen, travayis, pozitiv e pare pou asiste zot ki dan botan e osi move tan. En fanm ki zot anvi vwar dan tou kwen zot sou distrik. En fanm ki pou travay akote Gouvernman pou anmenn plis solisyon, plis proze e plis devlopman pou nou distrik. En fanm ki pa per pou grenpe, pou zwenn zot kot zot ete e fer en diferans. Se sa se pa lot ki Doyace Porice.

Mr Speaker, Doyace i bezwen osi dirizan, en zonm for determinen, pran aksyon e pare pou rod solisyon pou nenport kwa ki arive dan nou pei Sesel. E sa se pa lot ki Prezidan John Charles Ramkalawan.

MR SPEAKER

Mersi Onorab.

(APPLAUSE)

MR SPEAKER

Bon Lasanble a pran poz. Nou a rebran. Akoz nou annan *Assembly Business Committee* nou pou e nou'n ganny en retar deza, nou a komans Lasanble 2er 20. Mersi.

(BREAK)

MR SPEAKER

Bonn apre midi tou dimoun, Manm Lasanble, staff, piblik. Nou a re pran deba. Mon donn laparol onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi Mr Speaker, tou mon bann koleg Manm Onorab, zabitan Anse Royale, pep Seselwa. Mr Speaker, mon oule sezi sa loportinite pou mwan dir en gro mersi Mrs Rachel Spiro e Mr Wallace Cosgrow, pou zot kontribisyon tre valab ki zot in fer dan *Caucus United Seychelles*.

Mon swet zot bonn sans dan zot lot parkour lavi. Egalman, mon swet labyenveni Onorab Cecile Larsen dan nou *Caucus*. Mon konnen ki ou pou vreman delivre pandan sa letan, ki ou pou avek nou isi dan sa Lasanble. Egalman Mr Speaker, mon swet tou de bon

Onorab Sultan e Onorab Bijoux.

Atraver ou Mr Speaker, mon oule dir Onorab Bijoux ki Anse Royale sa bann proze dan diferan *zone* i bouze aköz se en fanm dinamik ki dan sa distrik.

(APPLAUSE)

HON SYLVANNE LEMIEL

Sylvanne Lemiel ki fer bouze sa distrik Anse Royale. Kontan pa kontan, Mr Speaker. Sa i larealite.

(APPLAUSE)

HON SYLVANNE LEMIEL

Mr Speaker, Zedi le 27 Fevriye 2025 bokou dimoun ti'n met pare devan zot televizyon ek zot radyo pou ekoute ki Prezidan pou vin dir dan son dernyen ladres lo Leta nou Nasyon. Me reaksyon bann dimoun ki mon'n koz avek zot dir ki ti en dezapwentman total.

Olye adres vre Leta Lanasyon Seselwa, Prezidan in profit lo sa privez ki in gannyen pou li vin fer konpanny politik dan Lasanble Nasyonal, e pas pli bokou son letan pou fer menas e sey entimid son bann oponan politik, espesyalman dan *United Seychelles*.

Fer menas lo bann travayer dan Servis Piblik,

pran lakoler aköz dimoun ki'n telefonn oubyen ekrir li. Petet sa bann dimoun i bezwen mazine e konpran ki zonm dan lopilans i souvan oubliy son nesans. Zot *call* ek zot let nepli fer sans pou Prezidan.

Be Mr Speaker, rezon i senp aköz Prezidan pa'n kapab adres Leta nou Nasyon. Bokou Seselwa e parmi en gran mazorite bann ki ti vot pou *LDS* pa'n vwar naryen ki zot in fer. Promes ki ti ganny fer avan eleksyon 2020 in anvole dan divan e pa pou zanmen retournen.

Dan lepase letan ki i pa ti ankor vin Prezidan i ti annan solisyon lo ki mannyer pou fer desann pri lavi. Lo fason ki i pou met larzan dan pos Seselwa parmi bokou lezot solisyon ankor. E la ki in vin Prezidan, i paret ki sa *manuscript* kot tou solisyon ti ete in perdi. Ozordi pri komodite in plis ki double.

Saler 1 mwan travay i fini dan 3 zour. Apre ki bann bil ek *loan* i fini ganny peye. E la Seselwa i bezwen re komans kont zour lo kalandriye. E priye pou ki lot lafen dimwan i arive aköz zot pos in pli vid ki zanmen. Zot pa pe vwar sa larzan ki ti ganny promet pou met dan zot pos.

Bokou in ganny dir lo logmantasyon saler ki Gouvernman in donnen. Me naryen pa'n ganny dir lo

logmantasyon gas, elektrisite, delo e lezot komodite esansyel ki swiv zis apre. Parey koze i dir zot donn ou ek lanmen drwat, deswit apre zot aras ou ek lanmen gos.

Mr Speaker, vre Leta nou Nasyon ozordi i enn ki tris. Enn kot Seselwa adilt koman zanfann pe sibir. En zi fri dan kantin kot lekol pe vann R12.00. Kan sa menm zi fri i kout R8.00 dan magazen. En boutey delo ki vann R10.00 dan magazen, pe vann R13.00 dan kantin kot nou lekol.

Sesel in ariv en staz kot konpasyon nepli egziste. Tou dimoun pe swiv legzanp nou bann dirizan. Savedir annou ranpli nou pos kan loportinite i donnen. Prezidan in esey vin eksplike ki mannyer zis li ek son bann Minis ki pe travay. Me lezot travayer pe trenn lipye e pe fer dimoun fristre.

Kan an verite, se li menm ki vre lakoz fristrasyon sa pep. In menm dir ki son Gouvernman pe travay sitan byen ki bokou in bliye. Petet la mon kapab reasir Mr Prezidan ki sa pep pa'n bliye. E sa pep pa pou bliy naryen, i zis ki zot pa'n fer naryen pou amelyor lavi Seselwa.

Me zot in plito profit dan sa 5an pou ranpli zot pos oubyen fasilite zot biznes. E la Prezidan i kapab asire ki le 27 Septanm lepep pou prouv avek li e lemonn antye ki zot pa

ganny *dementia*, letan zot pou zet *LDS* anba enn fwa pou tou.

(APPLAUSE)

HON SYLVANNE LEMIEL

In osi koz lo donn meyer lavi pep Seselwa. Si definisyon pep Seselwa i sa pti group dimoun privezye, alor la pou enn fwa mon a dir ki Prezidan in koz laverite. Akoz lavi lamazorite Seselwa, in vin pli pir e pli konplike ki zanmen.

Prezidan in dir nou ki fodre note lo ki mannyer nepli annan viktimizasyon anba son Gouvernman. E la ankor mon oule fer lepep e Prezidan rapel bann travayer *STC* lo Praslin ek La Digue ki ti ganny promet ki zot louvraz i garanti si *LDS* i vin o pouvwar.

Bann dimoun ki ti ganny demande pou zot demisyonnen dan zot pos akoz sa pos pou nepli egziste parey ti arive dan lofis *Blue Economy*. Kan an realite sa ti zis bann mannev pou ranplas zot par bann aktivis *LDS*. 5an in pas sitan vit e bann ki'n sibir tel labi bann zanfann ki vwar zot paran perdi zot plas travay. Ozordi bokou zot pe vin bann *first time voters*. Mon a les *LDS* reflesir lo la.

Lelo in ganny fer lo koman nepli annan koripsyon e lo prensip meritokrasi. Mr Speaker, eski tou sa ki Prezidan in vin dir dan sa

Lasanble i larealite e pirman laverite lo Leta nou Nasyon? Mon annan en pe dout. Prezidan in deza anonse ki letan *LDS* ti pran pei, kof ti vid. Nou ti lo zero.

Me Zedi, in fer nou konpran ki dan rezerv in annan \$700 milyon konpare avek \$500 milyon letan *LDS* ti vin o pouvwar 2020. E sa i fer ki mon annan enn de kestryon ki mon ti a kontan demann Seselwa. E osi ki Seselwa i merit fer en refleksyon lo la.

Eski zot santi zot lavi in vin pli meyer anba Gouvernman *LDS*? Eski keksoz i pli fasil pou zot ki anvi fer en biznes ozordi? Eski zot santi ki zot kapab koze libreman san ganny menase? Si larepons i non, le 27 Septanm 2025 zot devret dir avek Mr Ramkalawan e *LDS*, zot en bann move zanfane zot bezwen ale.

(APPLAUSE)

HON SYLVANNE LEMIEL

Mr Speaker, dan en konversasyon ki mon'n annan avek en profesyonnèl lo sa Diskour Prezidan, in dir mwan ki Sesel ozordi i diferan konpare ek Sesel an 2020.

Me kestryon ki nou devret demande se, eski tou Seselwa i pli byen ki zot ti ete 4an pase? Gouvernman i koz lo transformasyon e donn

Seselwa en pli bon swa e meyer lavi. Me ziska prezan lavi pou bokou Seselwa in vin pli dir e pa fasil ditou.

E avek tou sa difikilte *LDS* pe dir avek Seselwa pa vir deryer e kit zot lanmenm. Kan zot menm zot pe kontinyen vir deryer, zot ankor pe koz lo koudeta. Zot ankor pe koz lo politik, lo levennman ki zot menm zot, zot in dekrir koman vilenn. Me kan eski zot pou bouz de lavan Mr Speaker e les sa bann blesir geri?

Rapor *TRNUC*, in ganny soumet avek ou Mr Prezidan, atraver ou Mr Speaker. E ou sipoze egzokit sa ki dan sa rapor. Prezidan li menm, Prezidan in vwar li menm ki pep Seselwa i vreman entelizan. E sa pep pe swiv tou sa ki pe pase dan nou pei toulezour. Se pour sa rezon ki lepep pou dir avek *LDS* "nou pou pran en desizyon e nou pa pou kit zot la".

Sa pep in fatigue avek zot fo promes. Zot bann koze kontinyen lo 43an. Sa pep i ankor pe espere pou viv en lavi pli meyer ki zot ti promet an 2020. Sa pep i anvi ki zot soufrans i ganny soulaze. E ki zot ganny ekoute pli byen par sa Gouvernman *LDS*. Seselwa in dir zot in fatigue pas martir anba Gouvernman *LDS*. Annou get en kou lo difikilte ekonomik e pri lavi.

Prezidan in koz lo logmantasyon saler, sekirite sosyal ki sa bann dimoun aze pe al gannnen an Avril 2025. Eski sa logmantasyon pou fer sans si pri komodite i kontinyen ogmante lo letazer. Pri elektrisite, delo osi i kontinyen ogmante detanzantan. Bann manman ek pa tousel i kontinyen trimouse pou fer 2 bout zwenn pou zot kapab donn zot zanfan en meyer lavi.

Mr Speaker, *LDS* i dir i kapab dir ki i annan *welfare*. *LDS* i kapab dir ki i annan *welfare*, pou asiste sa group dimoun. Nou, nou ankouraze bann dimoun pou al fer laplikasyon. Me zot touzour ganny refize. *STC* ti sipoze la pou soulaz pri lavi. Me ki nou vwar? *STC* in vin pli ser ki lezot magazen.

LDS ti dir ki zot pou koup tou *middleman*. Me ozordi i paret tou sa ki ansarz *Board STC* pe li menm fer komers avek *STC*. Eski sa i normal? Eski sa dan li menm i pa en form koripsyon ki Prezidan in dir pa egziste?

Pti fermye i rankontre bokou difikilte pou zot kapab van zot prodwir avek *STC*. Selman *STC* pe aste poul avek *Chairman Board*. E get pri ki zot pe aste tousala.

Ki mannyer alors ki *STC* pou kapab fer pri komodite vin abordab pou Seselwa. Alors,

koup sa bann *middleman* parey zot ti promet. E fer ki pri marsandiz kot *STC* i a vin pli bon marse. Sa i a kapab soulaz soufrans sa pep.

Saler i merit ganny etabli baze lo kou lavi dan en pei. *An disant* sa, mon pe enplor sa Gouvernman pou aranz saler bann travayer ki pli ba lo lata. Afen ki zot lavi i a kapab ganny soulaze, aköz sa saler ki zot pe gannnen ozordi i ankor tro ba. Nou kontinyen vwar gran lekar dan saler bann ki pli o, avek bann ki pli ba.

Lekar i tro gran ant sa ki pe ganny plis e sa ki pe ganny mwens. Mr Speaker, sa ki ris i vin pli ris e sa ki pov i kontinyen vin pli pov. Gouvernman i bezwen kontinyen rod fason pou fer desann pri lavi atraver *STC*. Regard saler bann ki'n ganny pli mwens e osi ogmant sa sekirite sosyal bann pansyoner pou fer li vin sa R10mil ki zot ti promet an 2016 dan zot konpany eleksyon.

Ki sans i fer alors pou annan pli gran swa, si mazorite nou dimoun pa kapab annan ase larzan pou ganny zot bann bezwen neser.

Mr Speaker, Prezidan pe koz gran koze lo lademokrasi e laliberte lekspresyon ki dapre li fek gannnen an Oktob 2020.

E sa Mr Speaker, nou pa bezwen al lwen pou nou vwar ki portre ki'n ganny mete devan nou i pa reflekte larealite. Menm isi dan nou Lasanble laliberte lekspresyon pa egziste. En senp legzanp i fason ki *LOTO* ti ganny anpese fini eksprim li dan son larepons *SONA*. Akoz senpleman i pa pe dir keksoz ki zot anvi tande.

(APPLAUSE)

HON SYLVANNE LEMIEL

E la Mr Speaker, fodre note ki zanmen dan listwar Lasanble en tel levennman in deza arive. E pour sa mon a pes Prezidan li menm vin mon temwen, akoz li i ti dir sa ki i ti anvi dan sa Lasanble.

(APPLAUSE)

HON SYLVANNE LEMIEL

Ozordi Seselwa in koze. Me eski zot lavwa i vreman ganny ekoute? Oubyen zot ki o pouvwar zot ekout selman ler i konvenyan pou zot. La Seselwa in per pou fer en konversasyon lo zot telefonn. Zot ekout tou *call* dimoun.

Si ou tann en Minis oubyen en lot o zofisye dan lapolis menm pe dir ou *call* lo *WhatsApp*. Savedir zot osi zot konnen ki tou *call* pe ganny ekoute.

Pandan sa dernyen 4an, konbyen Seselwa ki'n ganny met dan kaso? Pran son telefonn e *laptop*, fouy lo la pou ganny lenformasyon. Zis akoz in vokal e eksprim zot lekor fortman lo *Facebook*.

Eski sanmenm ki Prezidan i dir ki i annan en laliberte lekspresyon isi Sesel? Laliberte lekspresyon i *ok* pou Prezidan e *LDS* ler ou koz bon koze lo zot. Pa seye kritike taler ou pou dan kaso.

Dan son diskour Prezidan in koz lo lademokrasi ki pe rennyen dan Sesel anba *LDS*. Konmsi avan Oktob 2020 ti napa lademokrasi isi Sesel. Diferans se ki ozordi nou vwar ki Gouvernman *LDS* in ofer pep Seselwa en demokrasi diktater. Kot zot oule nou dir sa ki zot anvi tande. E fer sa ki zot plezir. E fer sa ki fer zot plezir.

Mr Speaker, vre demokrasi se pa zis les dimoun annan en lavwa. Me i konsern osi ekoute e pran pli bon aksyon posib dan lentere Seselwa. Pep Seselwa i bezwen plis ki parol e promes. Zot bezwen en vre dirizan, solisyon reel e en vre sanzman. Seselwa pa bezwen en Gouvernman ki vin zis felisit son lekor dan Leta Lanasyon. Me Seselwa pe demann en Gouvernman ki aktyelman delivre lo son

promes. Apre tou, aksyon i koz pli for ki parol.

Mazorite Seselwa nepli pran parol Prezidan o serye. Apre tou, son bann promes ki in fer dan lepace e ki'n reste vid ziska ozordi. Nou dan Lopozisyon nou pou kontinyen fer Gouvernman rann kont lo tou sa ki i fer.

Sesel i pou Seselwa. Me non pa zis bann ki o pouvwar. Prezidan in dir ki zot in ranforsi bann Lenstitisyon Gouvernman. E in osi glorifye sa program *result base management* ki zot dir an kourt, *RBM*. Be eski *RBM* pe vreman marse dan tou lenstitisyon Gouvernman?

Akoz ki Prezidan i bezwen vin dispit la dan sa Lasanble e konplent ki dimoun i bezwen *call* li pou rezourd zot problem. Sa ankor i montre ki Prezidan i kontinyelman kontradir son lekor.

Konbyen sa bann *call* ou a dir mwan ki Prezidan in vreman reponn? Bokou son bann siporter ki'n met li *State House*, zot dir ou zot *call* li i pa reponn ni zot *call*, ni zot mesaz.

Prezan Prezidan in dispit avek bann travayer, e dir zot desarz zot responsabilite aköz zot osi zot ganny peye parey li. Me selman in bliy en detay. I ganny bokou plis ki zot, alors i normal si dimoun i *call* li pou

li osi rezourd zot problem ki son bann Minis pa kapab rezourd.

Apre tou, i pa ti anvi vin Prezidan pou tou Seselwa. Ozordi birokrasi i reste en gro problem. Tou prosedir i dousman, i pran tro bokou letan pou en dimoun ganny en larepons sorti kot Biro Gouvernman. Servis Piblik i inefikas e Seselwa i kontinyen fer fas avek lobstak ler zot pe rod en sipor e lasistans avek bann Lofis Gouvernman. Fristrasyon i kontinyen, aköz promes sanzman pa ankor vin egal avek aksyon reel.

Mr Speaker, Servis Piblik in *fail* sa pep. Sistenn Lasante i ankor anba bokou presyon. E zot annan bokou mankman menm si zot pe sant leloz lo sa detrwa lili e tapi ki zot in gannnen.

Mankman bon kalite latizann i ankor en problem. E pasyan i ankor pe konplent lakantite letan ki zot espere lo ban klinik pou vwar en dokter. Mr Speaker, dokter dan klinik distrik zot konplent sa sistenn *health information system* sa *HIS*. Ki zot dir i tro dousman, e laplipar letan pa marse. I met zot bokou retar e in ariv bann ka kot zot bezwen ekrir preskripsyon parey zot ti fer avan. Dokter i dir zot in fatige koze. Mr personn pa ekout zot.

Alors, enn fwa pou tou ekout sa bann dokter e

amelyor sa sistenm enformatik ki pe koz fristrasyon parmi dokter e pasyan.

Letan mon pe koz lo sa size Lenstitisyon Gouvernman, mon oule fer resorti serten keksoz ki pe pase dan mon distrik Anse Royale konsernan Gouvernman Lokal.

Si i annan en landrwa kot travay kas anba pe ganny fer dan distrik, kot bann *MNA US* in ganny elekte se atraver Ladministrasyon Distrik.

(APPLAUSE)

HON SYLVANNE LEMIEL

Anse Royale in komanse sa, depi lannen pase. Zot pe seye met mwan avek sa *DA* an diskord. Me les mon a fer zot konnen ki sa pa pou arive sa, akòz Sylvanne Lemiel i en fanm profesyonnel e en travayer dan Anse Royale.

Mwan mon pou touzour travay pou tou zabitan Anse Royale e kontinyelman rod solisyon pou zot problem. Me par kont se Lofis Gouvernman ki pe met zot retar pou rezourd zot problem. Zot pa pe delivre ase, pou mon bann zabitan.

An Out 2024, zis Vis-Prezidan ti vin Anse Royale dan fernwar. Mon repete ankor mon ti dir dernyen fwa, pou vwar 3 dimoun dan prezans *DA*, *Chairman LDS* e

Kandida *LDS* ki ozordi i isi dan sa Lasanble. Zot in donn sa 3 dimoun bon parol, me ziska prezan oli aksyon konkret pou rod solisyon pou problem sa 3 dimoun?

Sa bann zabitan in dir mwan dir, zot pa ankor tann naryen ziska prezan. *Comme dir* Prezidan li menm in dir, zot ankor pe trenn lipye lo problem sa bann dimoun. Dernyen fwa lannen pase ki *VP* ti vin dan sa Lasanble Mr Speaker, mon ti demann li en pti kont randi lo sa bann dimoun ki i ti zwenn.

Me i ti regard mwan angiz i pa tro konnen ki pe arive. Selman zot ti'n fer lar manman antre dan Distrik Anse Royale pou swadizan vin rezourd sa 3 problem toudswit. Me kan?

Atraver ou Mr Speaker, zot Kandida *LDS* ki ozordi i isi dan sa Lasanble, la mon pe koz ler i ti ankor kandida. Pe eseye pou *overthrow* lotorite distrik. Pas anba, anba avek *MNA Baie Lazare* atraver ou Mr Speaker, ki pa kapab reponn telefonn son zabitan e rezourd problem son distrik. Me deside vin fer *meeting* semen avek dimoun *Enforcement*. E Minis Gouvernman Lokal i dir mwan li i pa okouran sa ler mon ti telefonn li.

Par kont, letan ki mwan mon organiz *meeting* pou bann zabitan, pou donn zot bon

lenformasyon konkret lo sa proze *DA* i ganny konseye pou pa vini. Angiz i annan en lot komitman ki sa zour ti fini tre boner, avan sa *meeting*.

Menm teknisyen *SIA* Mr Speaker, e osi zofisye proze Gouvènmman Lokal ti ganny dir pa vini. Apre zot a vin dan sa Lasanble pou dir tir politik dan landrwa travay? Serten travayer kot Gouvènmman Lokal pe zis fer politik dan travay. Zot pe esey kas anba angiz pou ganny eleksyon Anse Royale.

Eski sanmenm sa kalite transformasyon dan sa bann lenstitisyon Gouvènmman? Apre konplent trenn lipye dan Servis Piblik. Blanm *US* ki travay dan Gouvènmman angiz zot pa pe delivre. Nou pe note tou sa ki pe arive. Me selman...

(APPLAUSE)

HON SLYVANNE LEMIEL

Me selman Mr Speaker, les mon a dir atraver ou Mr Speaker avek Onorab Bijoux. Atraver ou Mr Speaker, Septanm ni *Tsunami* pa pou vwar kot i vini.

(APPLAUSE)

HON SYLVANNE LEMIEL

Mr Speaker, sityasyon drog i vin deplizanpli alarman e trakasan isi Sesel. Nou bann

zonm, madanm, zenn fiy, garson, pe ganny afekte konsiderableman avek sa fleo. Bann manman, bann fanmir pe vremen soufer ozordi aköz drog.

Dimoun i trimouse pou kapab aste zot keksoz, pou anbelir zot lakour. Me drog i pase. Me droger Mr Speaker, i pase e vole pou al vann pou ganny larzan pou aste drog. Droger i vol zot prop manm fanmir, pran tou manze dan lakaz. Menm i annan ki pe pran lenz, soulye, kannson zot madanm pou vann pou kapab ganny larzan pou aste sa pwazon ki pe detri zot lavi.

Mr Speaker, i fermal pou vwar ki mannyer nou bann zenn fiy, ki mannyer sa drog pe afekte zot e zot zanfàn. Promes ki Prezidan ti fer lo kantite zour ki i pou pran pou elimin drog ti tro bon pou *être* vre. E letan in prouve ki sa ti zis en promes pou kapab mont *State House*, aköz drog i ankor la e i pa paret i pe al deswit.

Sa Mr Speaker, i leta ki nou nasyon i ladan ozordi. Annou koste e dir non a drog. E mwan mon dir ki mon pa toler drog. E mon blese pou vwar ki pe arive dan nou pti pei. Programm reabilitasyon pa bon. Zot in swadizan re negosye dil pou fer en sant. Me zot manda pe fini, nou pa vwar naryen.

Prezidan pe fer tay avek zis serten gro pwason. E serten i kontinyen ganny proteze. Sa labi drog i kontinyen ogmante, sirtou parmi nou bann zenn. E sa pe vreman detri lafanmir.

Ledikasyon i en konponan endispansab pou bon devlopman imen. Nou zanfan i devret ganny sa ki meyer an term ledikasyon. Alors, Gouvernman i devret kontinyen investir dan zot. E asire ki nou zanfan i ganny sa ki meyer an term bon ansennyan kalifye. E osi plis resours pou zot epanouisman.

Gouvernman i merit revwar *scheme* pou bann ansennyan. Rod solisyon pou ankouraz ansennyan Seselwa ki'n kit sistenm, espesyalman bann ansennyan lekol primer pou rebran zot vokasyon, aköz zot in prove ki zot kapab. E laprev i la dan nou Lasanble, kot bokou nou isi nou'n ganny nou ledikasyon primer avek bann menm ansennyan Seselwa.

Ozordi dan nou lekol primer i annan bokou etranze. E bokou nou bann zanfan pe ganny difikilte pou konpran zot laksan, fason koze. E sa i fer ki sa bon fondasyon primer pa vreman ganny etabli.

Minis pou Ledikasyon ti aparet devan nou Lasanble e deklare ki *scholarship* pou ganny donnen baze lo

performans atraver tou lenstitisyon profesyonnel. Me non pa selman *A Level* e SBSA.

Me ziska ozordi, sa promes pa ankor ganny onore. Me nou vwar ki se etidyan *A Level* ki kontinyelman ganny sa sans. E lezot etidyan ki *excel* dan teknik e sekte vokasyonnel zot ganny kit deryer. Si Prezidan i vreman konpran Leta nou Nasyon i devret realize ki bezwen irzan an term mende dan Sesel.

Mr Speaker, nou lekonomi pa fonksyonnel selman avek bann grad akademik. Nou bezwen bann profesyonnel ek kapabilite dan enzenyer, lasante, tourizm, konstriksyon, *IT* e bokou lezot sekte ankor. Se sa bann dimoun ki pou ede konstri lekonomi nou pei e asir soutenabilite.

Par kont zot pa pe ganny donnen menm loportinite pou kontiny zot letid avanse. Minister Ledikasyon i merit konsyan ki ekselans i pa selman ganny vwar dan etidyan ki fer letid *A Level*. Me i ganny trouve dan tou etidyan Seselwa ki pe travay dir pou metrize zot metye ki swa akademik oubyen teknik.

Bann etidyan Seselwa pe enplor Gouvernman pou onor zot komitman. E asire ki *scholarship* i ganny atribye baze lo merit atraver tou

sekte, me non pa en pti group privelezye.

Mr Speaker, Prezidan in dir ki i nepli annan viktimizasyon anba son Gouvernman e ki travay i ganny donnen lo meritokrasi. Ki mannyer Prezidan i kapab koz lo meritokrasi kan i annan bokou profesyonnel kalifye ki ganny met a kote akòz zot pa siport *LDS*. Ki mannyer Prezidan i kapab koz lo lopòrtinite egal dan rekritman e promosyon. I ankòr paret faver e koneksyon politik.

Promes *fairness* pa reflekte dan leksperyans bokou Seselwa, ki santi ki zot fitir pa depan lo zot konpetans me lo zot afilyasyon politik.

Annou pran en kou sa size viktimizasyon. Mr Speaker, viktimizasyon i pli reel ki zanmen dan Sesel. Sa ki'n ganny met deor dan zot plas travay angè...

(Interruption)

MR SPEAKER

30minit Onorab.

HON SYLVANNE LEMIEL

Mr Speaker. Be akòz ou koup mon....

MR SPEAKER

30 minit mon pe dir ou.

HON SYLVANNE LEMIEL

Me les mwan konklir.

MR SPEAKER

30 minit Onorab.

HON SYLVANNE LEMIEL

Mr Speaker, mon kapab konklir?

MR SPEAKER

Silvouple.

HON SYLVANNE LEMIEL

Mersi.

Mr Speaker, mon ladres aparaman i reste mwan ankòr en bon pe keksoz mon ti ava anvè dir. Me mon konklir *an disant*, i paret mwan mon pe ofans zot.

Mr Speaker, apre diskour ki Prezidan in fer Zedi pase, mazorite Seselwa pe dir ki foudre annan en lot sanzman dan Sesel.

Akòz nou bann frè e sèr Seselwa pou kontinyen vwar zot pe esey fer lakòrd vin lastik, pou zot kapab viv byen. E nou konnen sa i en posib. Apre ki Prezidan in avoue avek sa pep ki in fatige. Le 27 Septanm zot pou dir li al repoze e les *US* vin travay pou amelyor lavi sa pep.

Seselwa ti tonm dan zot pyez an 2020, e donn zot 5an pou diriz Sesel. Me mazorite Seselwa i tre dezapwente avek Gouvernman *LDS*, akòz zot pa'n delivre lo zot zoli promes.

Zot in pas tro bokou dimyel o bor ver apre donn sa

pep vineg. E ozordi mazorite ki'n met zot la, pe dir ki ozordi zot pli determinen ki zanmen pou met zot deor enn fwa pou tou. Akoz *US* i sel opsyon pou Sesel. Mersi Mr Speaker.

(APPLAUSE)

MR SPEAKER

Mersi Onorab. Laparol i pou Onorab Valdana Sultan.

HON VALDANA SULTAN

Mersi Mr Speaker. Mr Speaker, mon bann koleg Onorab. Tou Seselwa isi e aryer, bonn apremidi. En salitasyon spesyal i al pou bann zabitan mon distrik, Port Glaud.

Mr Speaker, premyerman mon ti a kontan remersye ou ek sekretarya, pou fasilite larantre mon koleg Onorab Bijoux ek mwan menm dan Lasanble Nasyonal, koman bann nouvo Manm. Egalman Onorab Larsen.

Mon osi dir mersi tou mon bann koleg *LDS*, pou zot parol lankourazman depi ki mon'n pret serman Zedi le 27. Sirman i en nouvo leksperyans e mon napa dout, ki zot pou gid mwan dan sa parkour. E mwan, mon pou swiv zot konsey.

Les mwan osi montre mon gratitid pour nou 2 Manm ki ti la avan nou, Onorab Flory Larue e Onorab Naddy Zialor.

Mon'n vremen apresye zot gran kontribisyon e mon swet zot bonn sans dan zot nouvo responsabilite. Ansanm nou pou kontinyen travay pour nou pei Sesel e pour tou son zanf.

Mr Speaker, mon osi annan parol remersiman pour mon Parti *LDS*, pour konfyans ki zot in met dan mwan konman enn zot reprezantan. Mwan Valdana Sultan, en zanf ki'n ne e grandi Port Glaud, mon fyer pour reprezant mon Parti *LDS* dan sa Lasanble.

(APPLAUSE)

HON VALDANA SULTAN

Sa langazman atraver mon sermantasyon, mon'n senserman fer li avek tou mon leker. Akoz mon santi mwan pare pour deservi Port Glaud ek mon pei Sesel.

Mon'n swazir *LDS* konman sa parti. Akoz mon krwar dan son prensip. *LDS* i krwar dan lepanouisman tou son pep e non pa zis en group. *LDS* i travay pour tou dimoun e i pa krwar dan diskriminasyon.

Mon asire ki dan mon travay, mwan osi mon pa pou swazir lekel ki mon pou asiste. Me mon laport pou reste ouver pou ekoute e mars avek tou dimoun ki bezwen mon sipor ek mon lasistans. Mon promet

pour travay pour byennet nou zoli pti Sesel ek son zabitan.

Mr Speaker, i en loner pour mwan ozordi apremidi, reponn Ladres mon Prezidan lo Leta Lanasyon. Kot mon pou fyerman fer resorti zefor ki nou Ladministrasyon LDS in fer depi son gran laviktwar le 24 Oktob 2020, pour anmenn devlopman Nasyonal.

San okenn dout, mon afirmen ki Gouvènmman LDS i sa Gouvènmman, ki pe vreman travay pour anmenn byennet pour son pep. Nou Prezidan in donn en long lalis, lo kwa ki Gouvènmman in akonplir pandan sa bann lannen. Letan pa ti ase pou mansyonn tou, me en keksoz i kler. Sa Gouvènmman in travay e i pe kontinyen travay dir pour nou pei.

Tou dimoun i vwar, me malerezman i annan bokou, parey nou'n antann dan sa Lasanble depi Mardi, ki war zis sa ki negativ. Akoz zot krwar zot kapab anbet Lepep Seselwa.

Mon senpleman anvi dir, ki Seselwa ozordi in fini vwar kler e personn pa pou fer li krwar lizour pou aswar.

(APPLAUSE)

HON VALDANA SULTAN

E mwan osi san ezitasyon mon pou dir byen for, *"No turning back"*!

ALL LDS MEMBERS

"Kit li lanmenm".

(APPLAUSE)

HON VALDANA SULTAN

Mr Speaker, sa Gouvènmman in anmenn tou kalite devlopman. Ki i bann gran proze kapital, devlopman imen e tou lezot kalite.

I enportan pou note ki devlopman pa zis bann gran, gran proze Nasyonal. Me osi bann pti proze ki fer en lenpak pozitiv e transform lavi bann sitwayen dan bann distrik.

Pandan sa bann dernyen lannen depi ki Gouvènmman LDS, mon Gouvènmman in o pouvwar. Nou'n temwanny plizyer pti proze, ki'n benefisye lakominote direkteman.

Sa i montre nou ki nou annan en Ladministrasyon, ki pare pou regard tou dimoun e soulaz sitasyon lavi.

Alor tou dimoun i santi li alez aköz personn pa rode lekel ou. Me plito ekoute e rod solisyon apropiye. E letan ou resevwar sa lasistans, personn pa dir ou, ki aköz ou resevwar li fodre ki ou vot pour li.

Me plito, i annan satisfaksyon ki en lot Seselwa in ganny asiste par Leta e sa Seselwa i kapab viv dan pli gran konfor e pli byen avek son fanmir. Se sa Sesel ki nou

tou nou ti pe rode e an 2020, e se sa ki nou'n resevwar.

La Mr Speaker, permet mwan dir avek sa Lasanble e avek Lepep Seselwa. Ki depi 24 Oktob 2020 ziska la Mars, Gouvernman LDS in akonpli bokou e bokou proze kominoter. Mon konn sa byen aköz mon'n travay dan Minister Gouvernman Lokal ek Zafer Kominoter.

E mon'n en temwen sa bann pti devlopman pour bann distrik. E tou dimoun avek ki mon'n enterakte i osi kapab dir ki mwan mon'n fer mon travay dan en fason zis e enparsyal.

Sa bann proze i enkli semen pour donn akse transport, semen lipye, drenaz, reanmenazman plizyer fasilite e trotwar. Aranz bann lakaz bann ki pa kapab, kree fasilite pour dimoun avek dezabilite ek bokou lezot. Zis pour nonm enn de.

Permet mwan mansyonnen ki zis dan mon distrik Port Glaud in osi annan plizyer proze ki'n ganny fer. Sa i tel ki semen ki pas kot bann Agathine, *crash barrier* Morne Blanc.

Reanmenazman *multi-purpose court*, drenaz Des Arpents. E tre byento semen peron pour mont dan vilaz anler Beoliere pour osi konplete.

Fodre pa nou bliye ki se avek bon korporasyon nou Prezidan ek Labank MCB, ki nou osi, byento nou pour rezouir avek en fasilite ATM dan nou distrik. E sa i enn bann fasilite ki zabitan Port Glaud in toultan reve pour annan.

Mr Speaker, tousala se nou Ladministrasyon LDS ki'n fer.

(APPLAUSE)

HON VALDANA SULTAN

E souvan bann ki ti sipoze pe pouse in absan lo kote nou sitwayen, e pas tou letan kritike e ensilte.

Mr Speaker, Gouvernman pa'n restrikte li zis avek bann pti proze kominoter. An plis ki sa bann proze, Gouvernman in pran bann aksyon desiziv, pour protez lavi e propriyete. Enn sa bann desizyon par egzanp, pour retir bann pye dibwa ki poz danze ouswa semen, propriyete bann endividi e menm landrwa piblik. E i annan ankor pou fer.

Nou tou nou kontan pye dibwa aköz i anmenn lonbraz, i kree en labita pour serten zannimo, e i osi ede dan nou ekosistenm. Me ler en pye dibwa i vin en danze, aksyon i bezwen ganny pran. Nou bezwen swa debrans li ou retir li konpletman.

Mon remerci mon Gouvernman ki'n proaktiv pour retir danze ki menas lavi ou propriyete. Mon bezwen fer remarke, ki dan serten ka spesifik e spesyal, Gouvernman in menm konsidere pour koup pye dibwa lo later prive, kot son met in vreman napa mwayen pour fer li.

Sa i demontre ki sa Gouvernman LDS pa zis la pour ranforsi regilasyon, me i osi aport led kot son sitwayen. Si pa LDS, lekel ankor? Prezan zot a dir mwan tir li! Me non, pa ditou Mr Speaker. O kontrer, mon pe dir avek Lepep, "*No turning back*"!

ALL LDS MEMBERS

"Kit li lanmenm".

HON VALDANA SULTAN

Mr Speaker, si mon pou sit ankor legzanp kot mon Gouvernman LDS in aport led pou son sitwayen. Mon kapab koz lo bann *case HRS, housing repair scheme*. Plizyer lakour, sirtou bann trwazyenm-az in ganny led anba sa program.

La Gouvernman in ede dan reparasyon serten pti bout avek zot lakaz, san ki zot bezwen re pey li konman en *loan*. Mr Speaker, nou'n fer li pandan sa dernyen 4an e nou pou kontinyen fer li. Nou Gouvernman LDS, pa pou vini lannmen eleksyon pou dir

avek nou bann sitwayen ki zot drwa nou Gouvernman sepa konbyen. Apre ki in aranz zot lakaz.

Gouvernman LDS, pa fer sa kalite aksyon malonnet parey in arive dan lepase anba ansyen Ladministrasyon. Sa latitud anbet dimoun, nou kit pour en lot bann. Me nou konnen, ki Seselwa pa pou al ankor lo sa *bus stop*. Akoz zot konnen, ki bis pa pou pase bor la.

(APPLAUSE)

HON VALDANA SULTAN

Sa larout ou pou mor lo la.

Nou Ladministrasyon LDS i travay avek bokou planifikasyon ek kalkilasyon. Nou fer sir ki nou parol i mars avek nou aksyon.

Mr Speaker, de menm fason, tou travayer anba kot ASP i konnen ki menm si 2025 i en lannen eleksyon, zot pa pou zanmen ganny demande pou fer *overtime* avek larzan Lepep pou aste vot.

Pou napa sa bann gran, gran laliny kot *Ocean Gate House*.

(APPLAUSE)

HON VALDANA SULTAN

Akoz politisyen pe abiz lo lasistans sosyal pou ganny vot. LDS i fer keksoz drwat i pa zanmen rod aste dimoun.

Eski pa sa kalite latitud ki nou bezwen dan nou pei. Kot tou dimoun i ganny respekt e pa ganny trete koman en lobze? Sesel i lo bon semen e nou bezwen kontinyen dan menm direksyon.

(APPLAUSE)

HON VALDANA SULTAN

Mr Speaker sa ki fer nou Gouvernman LDS for. Se ki i en Gouvernman ki ekout son pep. Byensir ekout ou pep pa vedir fer tou sa ki zot swete vwar e mannyer zot, zot anvi.

Me plito pran zot bann bon lide e egzekit li. Akoz i pou anmenn tou dimoun pli devan e fer zot pli for dan lavi. Se sa, ki en Gouvernman responsab i fer. E letan i fer sa, Lepep i ganny plis konfyans e nou kapab epanouir dan lavi.

Parfwa mon konpran ki dimoun i anvi tou keksoz e zot lekspektasyon i tre o. En Gouvernman ki iresponsab ki pran bann desizyon ki *populiste*. Me apre i detri nou pei akoz se la ki koripsyon ek labi i rantre.

Gouvernman LDS in pran semen difisil e parfwa pa popiler. Me gete ki mannyer nou pei in fer progres. Ekonomikman nou for e lavenir nou zanf an dan bon lanmen e bon direksyon. Nou rezerv in ogmante par 45poursan dan sa kourt letan.

Pa i fer nou tou demande, kote nou ti pou ete si nou pa ti'n gaspiy 43an anba sa sistenm avan? Kot lapliferans, koripsyon ek viktimizasyon ti rennyen. Wi, nou ti pou lwen. Sanmenm nou dir, "*No turning back*"!

ALL LDS MEMBERS

"Kit li lanmenm".

(APPLAUSE)

HON VALDANA SULTAN

Mr Speaker, mon pou pe koz mansonz, si mon dir ki nou'n napa defi. Wi, defi i la me progres i kontinyel.

Alor, les nou tap en pti lanmen lo nou zepol e dir "Wi nou an mouvman." Gouvernman LDS in proaktiv. In donn son komitman pour amelyor lavi pa zis avek parol, me avek aksyon.

Mr Speaker, pou nou kapab gard sa *momentum* ki nou pei pe devlope, i enportan ki nou travay ansanm. Gouvernman, Sekter Prive e sitwayen osi. La mon lans en lapel pour plis kolaborasyon. Annou sorti dan sa mantalite zis konplent san sizesyon pour solisyon. Vin avek propozisyon.

(APPLAUSE)

HON VALDANA SULTAN

Se sa ki apel travay lekip. sa ki apel nou kontan Sesel. Akoz devlopman pa en keksoz ki ariv zis en zour, me i en parkour kontinyel.

Nou bezwen siport bann Polisi ki efektiv, adres bann defi avek dyalog konstruktiv e nou a kontinyen devlope, san kit personn deryer. Dan sa fason nou ava ede kree larises pour nou pei. E apre nou ava kapab partaz sa larises, anmezir ki nou met enn pti keksoz dekote pour letan dir. Zis parey nou fer dan lakour.

Nou ava kapab kontinyen regard byen nou bann dimoun aze. Donn goute nou bann zanfann lekòl, pou asire ki napa zanfann ki dan laklas avek en lestoman vid. Ki nou bann *carers* i ganny logmantasyon e tou dimoun ki ganny lasistans ek *welfare* i kapab respir pli byen. Se sa bann kolaborasyon ki ed nou gannyan dan nou pei. Sa i apel en meyer lavi.

Mr Speaker, pep Seselwa, mon pa la zis pour felisit mon Gouvernman LDS. Me mon pour osi demann li, pour kontinyen, dan sa menm lelan pour devlop nou pei Sesel e amelyor byennet tou Seselwa.

I enportan ki nou rekonnet progres, amelyor kot i nesaser e kontinyen dan nou misyon kolektiv pour en meyer Sesel. E se la osi, kot nou

bezwen servi byen nou laliberte lekspresyon.

I bon ki nou koze san lafreier, me eski nou pa krwar ki si tou, nou ti koz plis sa ki fer sans. E fer bann analiz ki vremen apropiye, non-selman ki nou lavi ti pou amelyore, me nou pei ti pou konn plis matirite e ti pou annan plis respe ek moral.

Rezilta ti ava ki nou fanmir ti a pli solid. Nou zanfann ti ava grandi dan bann pli bon latmosfer e nou pei ti a konn plis progres. Nou ti a kapab anmenn bann pli gran konba kont tou fleo ki menas nou zanfann ek lazenes, nou zoli pei.

Mr Speaker, mwan mon enn ki rekonnet progres kot mon vwar. E kot mon vwar keksoz i bezwen amelyore, mon pou osi debout. Par egzanp, letan mon pas anvil e mon vwar ki Libreri Nasyonal in ganny renouvle apre pli ki 5an depi ki in fermen. Mon bezwen dir ki i vremen zoli e i anmenn en lafyerte dan nou kapital.

Letan mon regard batiman Carnegie ki'n en bote, ankor enn fwa. Byensir mon pou dir ki i zoli e felisitasyon Gouvernman LDS aköz zot ki'n fer sa arive. E letan, mon aprann ki dimoun nanryan fer in vandaliz sa zoli lansenny, '*I Love Seychelles*'. Mr Speaker mon ankoler en kantite, aköz

sa aksyon pe detri mon pei. Tou sa ki pa bon, mon demande ki nou sanz nou move latitud e adopte bann fason fer ki byen e bon.

Mr Speaker, Leta nou Nasyon i la pour nou tou regarde e apresye. Letan mon pas Roche Caiman e mon vwar tou sa travay ki'n ganny fer lo nou bann fasilite sportif. Eski sa pa i donn mwan lafyerte.

Sa nouvo *track* ble, nouvo teren foutbol ek lalimyer. Nouvo kort tenis, Palais de Sport ki byento pou reouver. *Dojo* ki pe ganny repare, laplenn *FIFA Beach Soccer* ki pe ganny fer e bokou lezot.

Mr Speaker, tousala i fer mwan fyer pou apel mwan e Seselwa. E mon osi fyer, ki mon vot ti konte an 2020.

(APPLAUSE)

HON VALDANA SULTAN

Alor mon pou dir avek gran lafyerte ki mon pa pou zanmen les bann ki pa vwar tousala vin detri mon zoli pei. E ansanm avek Lepep Seselwa, mon pou dir byen for, "*No turning back*"!

ALL LDS MEMBERS

"Kit li lanmenm".

(APPLAUSE)

HON VALDANA SULTAN

Mr Speaker, mon pou dakor avek Prezidan ki tou dimoun konsernen i bezwen zwenn ansanm, pour zwe en rol pou fer pri lavi desann. I definitivman pa zis en size ki konsern zis Gouvernman, me tou dimoun.

Parfwa i atriste mon letan mon vwar mannier nou pep i ganny vole e abize. I pa byen pou fer sa e mon krwar ki nou tou nou devret annan en konsyans e zwe nou rol pour ki pri lavi i kapab desann dan nou pei.

Tou dimoun i a kapab viv byen. Sa larzan ki nou trimouse pou gannyen lafen dimwan, pa kapab rantre direkteman dan pos serten dimoun, zis aköz zot, zot pe ofer en servis ki Lepep i bezwen.

Mon lapel i tre senp. Annou vin pli konsyansye, annou realize ki tou dimoun i ganny drwa ganny meyer komodite pou pri pli bonmarse posib. Pa mazin zis gro profi pou ranpli nou pos. Me plito, annou viv an kominote e rode ki mannier tou dimoun i ava kapab nourri son fanmir e pa viv dan lapovrete.

Sa i mon dezir pou mon pep ek mon pei. Mon krwar pa ki mon pe demann en keksoz ki enposib. Alor mon demande ki nou tou nou fer en zefor, pou fer sa arive.

Mr Speaker, koman en ansenyan par profesyon, mon annan gran lentere dan nou sistenm ledikasyon. Mon bann koleg ansenyan, parfwa i eksprim bokou dekourazman e mon konpran zot.

Disiplin ozordi i vin en size ki konsern nou tou. Nou vwar zanfàn ki lager. E ozordi avek *social media*, tanzantan nou vwar bann zimaz ki pa gou e pa donn nou lankourazman.

Letan par egzanp nou vwar de fiy pe lager dan en fason endesan, mon leker i fermal. Me sa ki osi fatig mwan se letan bann dimoun otour pe plito filmen e pran plezir dan sa ki pe arive. Olye aret sa lager e met en lord.

Nou osi vwar zanfàn ki pa pe ganny sipor e gidans dan lakour akòz petet i mank stabilite. Mon anvi fer en lapel avek tou dimoun ki konsernen, pou pran zot responsabilite.

Pou asire ki ansanm nou kapab ranforsi lafanmir. Montre pli gran solidarite, ankouraz nou bann ansenyan e pous nou zanfàn pou fer pli byen posibil dan zot letid.

Mon napa okenn dout ki avek en nouvo fason fer keksoz, nou sistenm ledikasyon pou vin pli for. E nou bann zanfàn ava fer pli byen.

Sa petet i ava donn plis zenn lankourazman pou rantre dan profesyon lansennyman. E nou ava kapab ankòr enn fwa, met sa karyer ansenyan lo sa nivo ki nou ti a kontan.

Mon pou donn tou mon sipor tou lekol Sesel, espesyalman lekol Port Glauud ki mon konn tre byen. Annou fer lekol meyer dan Sesel.

Mr Speaker, mon en dimoun ki annan konfyans dan abilite nou bann zenn. E osi en dimoun ki krwar ki fodre nou kontinyen lager kont bann fleo ki fer nou ditor.

Mon felisit Gouvernman LDS pour sa lalit ki i pe kontinyen anmennen kont drog. Definitivman nou'n vwar bokou progre ek sikse.

Ozordi mon kontan ki mon pa vwar sa gran kantite zenn, dan tou kwen semen pe pike e pe *kick*. Sa lalit alor pe anmenn son sikse.

Me mon anvi fer en lapel direk avek bann ki pe fer trafik drog. Pou silvouple donn nou bann kominote en lape. Mon koz lo lapar bann manman ki plere letan zot vwar kote zot zanfàn in tonbe.

Silvouple, annou aprezan komans swiy larm sa bann manman ek sa bann fanmir ki pe soufer. Bokou zenn, nou'n tann dir in mor avek drog. E bokou pou antre ladan si nou pa fer nanryen. Alor se sa ki

nou Gouvernman pe fer, met en lape avek sa drog.

Annou arete e annou mazin nou pei ek son popilasyon. Letan nou met en zanfan o *monde*, nou anvi vwar li reisir dan lavi. Eski nou realize konbyen lavi zot bann trafiker zot pe detri?

Mr Speaker, mon krwar dan en Sesel kot tou rev i ganny realize. Mon krwar dan en Sesel ki vin en pei promes realize. Mon krwar ki letan nou tou nou koste, nou kapab fer nou rev realize.

Akoz sa Sesel, depi Oktob 2020, in vin sa pei avek en Gouvernman for e solid ki'n fer li vin en pei loportinite pour tou dimoun.

Mon pou donn tou mon lafors ek tou mon lenerzi pou fer sir ki dimoun i sezi bann loportinite e realiz zot rev. Napa pli bon dimoun pou diriz nou pei ki Prezidan Ramkalawan ek son Gouvernman.

Pour bann ki pe rev *State House*, mon anvi dir zot byen for. Le 27 Septanm Lepep Seselwa pou dir byen for, "*No turning back*"!

ALL LDS MEMBERS

"Kit li lanmenm".

(APPLAUSE)

HON VALDANA SULTAN

Mr Speaker an konklizyon mon anvi zis dir an pasan, ki Labib i koz bokou. Lo sa ki annan zorey pou tandé, sa ki annan lizye pou trouve. I sagrinan pour vwar ki i annan en serten group dimoun ki pa kapab fer sa.

Alor ozordi mon dir zot, i pa ankor tro tar pour zot servi zot lizye pou vwar tou sa bann bon keksoz ki pe arive otour zot e pou aprann apresye.

Ouver zot zorey e antann tou sa bann bon parol ki lemonn pe dir lo Sesel, ki en lafyerte dan li menm.

Wi, Sesel i lo bon semen, e nou pou kontinyen gard li lo sa bon larout anba *LDS*. "*No turning back*"!

ALL LDS MEMBERS

"Kit li lanmenm".

(APPLAUSE)

HON VALDANA SULTAN

Mersi Mr Speaker.

(APPLAUSE)

MR SPEAKER

Mersi Onorab. Laparol pou Onorab John Hoareau.

HON JOHN HOAREAU

Mersi Mr Speaker. Mr Speaker, se avek bokou tristes ki yer nou'n tann lanmor Dr Commettant. En dimoun ki in fer en gran lenpak dan Klinik

Beau Vallon, in travay bokou letan dan Klinik Beau Vallon. E in tous lavi en kantite dimoun dan Beau Vallon, Bel Ombre e Glacis.

Alors, lo mon non avek non Onorab Sandy Arissol, nou oule dir son fanmir bokou senpati e fotespere ki son nanm i repoz anpe.

Ser ek frer Seselwa ki pe ekout deliberasyon Lasanble Nasyonal, bonn apre midi. En bonn apre midi spesyal pou tou zabitan Beau Vallon.

Mr Speaker, yer nou'n tann en Onorab novis dan politik ki'n vin fer bokou demagozi lo size lopital. Mon oule dir li ki an 2025 ler nou retourn *State House* li i pou napa en travay, alor nou pou ofer li en louvraz pou li touy sa bann lera envizib lo *ward*.

(laughter)

HON JOHN HOAREAU

Mr Speaker, mon'n osi tann bokou ronfleman lo size *travel* ki Prezidan i *travel*. Mon'n tann demande ki aköz Prezidan toultan pe *travel first class*, ensidswit. Me eski zot, zot in deza demann zot *Leader* ki *class* ki i *travel* ladan? Si zot pa demann li mwan mon ava dir zot, poudir i *travel first class* e Desanm i ti pey \$8 mil lo fon *US* pou li *travel* pou al Langleter avek *Dubai*. Sa, san

bann tiket pou bann entel ki'n al avan.

Mr Speaker, repons diskour Leta nou Nasyon i touzour en loportinite inik ki en Manm Lasanble i gannyen pou analiz o profon lo kwa ki'n ganny akonpli e ki direksyon nou pei pe ale a lavenir.

Mr Speaker, souvandfwa nou pep i oublie ki Ladministrasyon *LDS* in pran la gouvernans dan en letan ki ti pli difisil dan nou listwar resan. Nou'n fer fas avek bokou defi ki swa entern ou enternasyonal. Tel konman pou sanz *mindset* nou pep, pou anmenn en transformasyon dan lafason ki nou dimoun i pran zot responsabilite pou zot lavi. Lenpak pandemik *COVID-19* lo lasante piblik. Lefe ki preski 10poursan nou popilasyon lazenes i abiz sibstans. Lefe sanzman klima e dezaz natirel parey le 7 Desanm 2023 dan rezyon Beau Vallon e Bel Ombre prensipalman.

E menm zour, leksplozyon kot *CCCL* ki'n devaste bokou biznes, lakour e boulders lavi kominote Cascade. I serten rezon devlopman dan nou pei pa'n al osi vit ki nou ti a voudre. Bann defi enternasyonal, tel ki lenstabilite e lager dan *Moyen Orient* e Les Lerop, in annan en lenpak direk lo transportasyon, pri komodite

e redwir krwasans dan biznes tourizm.

Nou'n osi konmans nou manda avek en pei ki ti annan zis 14milyon pou pey lapey travayer servis piblik, zis 3 mwan. E en lekonomi ki pa ti pe fonksyonnen, kot preski tou keksoz ti'n arete e lekonomi ti lo en *standstill*. Wi, se la kot nou sorti.

Nou pa'n reste lebra krwaze, o kontrer mo *failure* in ganny retire dan nou diksyoner. Deswit Prezidan ti bezwen pran bann desizyon brav e byen kalkile. Premyerman in vaksin son pep, re-ouver erport, e nou'n anbank lo en misyon pou stabiliz nou lekonomi e menm nou'n arive kre plis larises pou distribye avek nou pep.

Nou'n donn 2 logmantasyon lapey pou tou travayer ki'n ariv 17 poursan an total. Fer monte minimonm *wage*. Ogmant benefis anba Lazans Proteksyon Sosyal. Kontinyen avek en program devlopman proze kapital kot nou'n konstri lakaz, por lo bann zil pros, lekòl, lopital e semen.

Se atraver kler vwayan e determinasyon Prezidan Ramkalawan ek son tim solid, dinamik, konpetan e entelizan e osi avek zefor pep Seselwa ki'n demontre rezilyans e travay dir. Nou'n arive refer nou pei.

Parey koze i dir “sa ki pa touye i fer ou pli for”. Pou bokou Seselwa sa sanzman gouvèrnans i vin en nouvo lorizon, en nouvo loportinite e en nouvo konmansman. Alors, *no turning back* e kit li lanmenm!

Mr Speaker, nou'n entrodwi en transformasyon ekonomik e sosyal ki permet nou responsabiliz nou pep atraver en nouvo fason fer e en kiltir travay dir. Ptitapti nou'n refer bouze nou lekonomi e nou fyer ki ozordi ki nou rezerv dan Labank Santral in ariv \$789 milyon, en sif ki 45poursan an plis ki 2019. Malgre tou sa defi ki nou'n pas atraver.

Ler zot tim *walkout* ti pe priye pou nou pa reisir, pas zot letan gognarde tir li an 2025, akòz zot pa vwar naryen ki nou'n fer. Nou, nou pou dir nou pep pli for ki zanmen in annan sitan progre dan sa pei ki menm *Mo Ibrahim Index* in dekrir nou dirizan koman meyer dirizan dan Lafrik. Alor, *no turning back!* E kit li lanmenm!

Mersi pou tou sa ki in fer pou sa pei ziska aprezan. Sa ki pa kapab vwar, pa pou zanmen kapab vwar. Akòz zot pa anvi vwar.

Mr Speaker, Ladministrasyon LDS pandan sa 4 dernyen lannen in baz son filozofi devlopman lo en

sanzman e transformasyon. Parfwa, bann ki pa'n lir nou manifesto pa vreman konpran ki kalite sanzman ki nou'n toultan dir LDS pou anmennen pou Sesel. Byen koze i fer byen konpran.

Sa sanzman i baze lo 2 keksoz. Premye se en transformasyon fondamantal dan ladministrasyon pei kot bonn gouvernans, latransparans, rann kont e laplikasyon Lalwa pou tou dimoun in vin 4 zouti enportan dan sak zouti tou fonksyonner piblik.

Sa in permet nou pou redwir koripsyon dan servis piblik, en *legacy* ki *SPPF* in kit deryer avek nou. Ozordi, menm lo lendeks enternasyonal persepsyon koripsyon nou'n pran en pozisyon koman 18enm pei ki mwen koronpi, parmi 180 pei avek 72 pwen an Desanm 2024.

Sa i en rikord ki nou devret fyer konman en pep. Pandan sa 4 dernyen lannen okenn dimoun dan Ladministrasyon LDS pa'n zanmen ganny anmennen devan Komisyon Anti Koripsyon. Menm *Chairperson FPAC* ki *Leader* Parti Minoriter dan Lasanble, Onorab Sebastien Pillay pa'n zanmen kapab montre okenn ka koripsyon dan Ladministrasyon LDS.

Tandi ki son parti *walkout* in fer rikord pou fer faid pei an 2 fwa dan nou listwar modern, an 2008, 2009 e an 2019.

Nou tou nou'n fatigue tandé ki fason zot ti bizi pe pran 57 morso later par isi, \$50 milyon par laba, kan dan magazen Endyen zonnyon ek ponmdeter ti pe vann anba kontwar aköz ti napa ase pou met lo letazer.

Seselwa ti'n ganny dir ser sang e zot ti'n sere ziske lonbri ti'n sorti, ler bann gro imsye ti pe pran tou pou zot dan dalo.

Ozordi ler tou laboutik in plen avek marsandiz e *forex* i alatrenn, kales kase in ganny ranplase par en *Mercedes*, lekonomi pe performen. Prezan bann sren rouz i vin ganny lafors pou dir nou tir li.

Dir mwan, ek ki zot pou ranplase? Avek sa menm tim koken ki'n pran larzan ek later pei pandan 43an?

Fodre Seselwa napa nennen pou santi ki sa ki zot pe vin avek se malpropte. Nou tou nou pou dir "*No turning back e*"!

ALL LDS MEMBERS

"Kit li lanmenm".

(APPLAUSE)

HON JOHN HOAREAU

Mr Speaker, nou'n konmans nou manda avek en slogan

Sesel Pou Tou Son Zanafan. Kot pwennvi politik, ras, kouler e larelizyon in ganny retire konman kriter pou ganny travay oubyen en promosyon. Ozordi okenn Seselwa pa bezwen zwe rol pou li ganny son drwa Konstitisyonnel tel ki en drwa travay.

Akoz sel kriter pou ganny travay ozordi se meritokrasi. Sa in anmenn bokou dignite, linite e respe parmi nou pep. In nepli annan “ek nou pa ek nou”, ki ti en Polisi senm divizyon par rezim *SPPF* e *US* ki ti ti'n ganny enstitisyonnalize dan tou servis piblik.

Alor, pa vin dir nou ki Prezidan Ramkalawan pe senm divizyon atraver son *speech* SONA. Ler ou manz ou bannann pa zet lapo lo nou Onorab Pillay. Akoz Mr Speaker, nou pa pou zanmen pran okenn lesen avek ou.

Sel lesen ki ou kapab donnen, se koman pou fer malelve e mank respe dan Lasanble. Malerezman, en lesen ki nou pa enterese avek.

Mr Speaker, lot dimansyon sa transformasyon i baze lo responsabiliz nou dimoun e sevre zot kont depandans lo Leta. Sa i premyerman redonn nou pep dignite imen e fer zot pran konsyans ki selman atraver travay desan ki sel fason pou ganny ou lavi.

An menm tan mekanizm in ganny entrodwi dan *ASP* pou ed bann ki dan bezwen e pa kapab travay.

Labi lo servis proteksyon sosyal ki ti annan anba Gouvernman *SPPF*, *US* in vin senpleman listwar aköz Ladministrasyon *LDS* i annan respe pou sak sou ki travayer Seselwa i kontribye atraver *tax*. Sak sou i bezwen ganny byen depanse.

Tandis ki Polisi parti *walkout*, se zis donn lasistans depi nesans ziska lanmor san get soustenabilite sa fon avek zis en sel bi. Se pou retenir pouvwar lo ou. Otan, ki ou lo enn zot lalis pou lasistans ou dan zot lasenn, kot zot kapab manipil ou ki mannyer zot ganny bezwen. Sa in ozordi sanze.

Se sa, vre sanzman ki *LDS* in anmennen pou Sesel. Mon bann frer ek ser, anba *LDS* sa nyaz nwanr in ale. Pa zanmen fer sa fot pou les li retournen. Parti *walkout* in vin parey en dibwa drive, alor ler ou pase zis kit li ale aköz i ankor santi gou delo sale.

Mr Speaker, *no turning back* e kit li lanmenm!

Mr Speaker, nou'n osi rekonnet ki tou Seselwa i annan menm drwa anba nou Konstitisyon, vi ki nou tou, nou zanafan menm kreater parey preanbil nou Konstitisyon in proklanmen.

Malgre *LDS* in annan en Polisi toleran pou diversite, nou'n vwar ki i annan serten move zanfandans servis piblik ki touzour manniganse par parti *walkout*, pou sey sabotaz Gouvènmman pou fer lezot son frer soufer. E fer finalman blanm vin lo Gouvènmman *LDS*, lo Mr Ramkalawan e blanm bann Minis e blanm osi bann *MNA*.

Mon pou aport mon soutyen pou sa gran nonm dimoun dan servis piblik ki pe fer en bon travay. Ki pe travay byen avek zot leker e pe donn tou. Me dan menm viger, mon pou ankouraz fortman e donn mon sipor pou lanons ki Prezidan in fer ver sa bann ki pe pez fren dan servis piblik.

Mr Speaker, enn fwa pou tou nou merit re aranz nou servis piblik e fer li vin en sours nou lafyerte. I pa akseptab ki serten fonksyonner i mank respe pou lotorite Minis oubyen *MNA* e pa aplik Lalwa pei, en direktiv ki'n ganny donner dan bon direksyon akòz li i zis en Lopozisyon. De fwa Prezidan ki bezwen entervenir akòz sa bann lanpayaz. Apre zot vire zot dir, zot kritike ki Prezidan pe *micromanage*.

Mon ankouraze pou tandè ki aksyon pou ganny pran avek sa bann ki pe kontinyen anmenn politik dan travay.

Alors, ler ki parti *walkout* i dir tir li, nou pou kriye “*No turning back e*”!

ALL LDS MEMBERS

“Kit li lanmenm”.

HON JOHN HOAREAU

Pou netway bann ki lipye i ankò lo fren.

Mr Speaker, vi ki sa lannen i en lannen eleksyon, e pep Seselwa pou bezwen fer en desizyon enportan pou lavenir sa pei. Alor i nesesser pou nou vwar Leta nou Nasyon dan sa konteks osi.

Mr Speaker, *LDS* in touzour en parti ki met son kapital imen o sant devlopman. Apre tou pou napa devlopman e rannman dan travay san en travayer motive, an bon sante e enn ki annan son pei a ker. An retour, son pei i a rekonnet son zefor e ed li progrese dan lavi.

Alors, i pa drol ki en parti nou zefor se pou elev dignite bann madanm. Nou dirizan in fer plizyer lapwentman kot bann madanm in ganny rekonnet dapre bann kriter meritokrasi e zot in ganny bann pozisyon ki zot merite.

Legzanp i bokou, parey madam Tally Domingue ki anba Ladministrasyon *LDS* in vin premye Sef Madanm dan *SFRSA*. Kaptenn Sylvie Tamboo ki'n premye fiy pou Pilot *Dornier* Sesel e ki'n ganny

ran *Lieutenant* dan nou *Air Force*.

Madanm Janet Georges ki'n vin premye madanm pou pran responsabilite Komisyoner Prizon e plizyer lezot bann madanm ki'n ganny lapwentman konman bann CEO dan diferan sekter nou Gouvernman. Zot tou zot pe fer en louvraz formidab e zot pe demonstre ki zot kapab fer zot travay menm nivo ki bann imsyé.

Mr Speaker, ler nou, nou pe donn dignite e respe nou bann madanm, dirizan parti *walkout* ki pe aspire pou vin diriz sa pei i fer deklarasyon dan son kongre ki li ler i vwar bann madanm zis i eksite. Sa i montre klerman ki diferans fondamantal dan karakter sa 2 dirizan e ki *LDS* i anvi pou Sesel. Mon poz sa la. Se pour se la ki parti *walkout* ler i dir nou ki “tir li” nou, nou pou dir “*No turning back* e”!

ALL LDS MEMBERS

“Kit li lanmenm”.

HON JOHN HOAREAU

Mr Speaker, lalit kont drog illegal i reste defi mazer nou pei. Nou'n ganny bokou sikse dan sa domenn, tel ki plizyer tonn drog ki'n ganny konfiske e detri a ot mer lo bann Dav Iranyen. Plizyer ka in ganny anmenn Ankour e ganny

prosekite e kriminel pe ganny kondannen.

Ler nou pe sey met tou zefor e resours ki swa Militer ou Lapolis pou elimin sa pwazon, pour ki nou zanfani a grandi pou vin bann sitwayen serye e pran bann lanplwa formel dan pei. Zisteman pou redwir depandans lo travayer etranze. En size nasyonal ki ou mazine Lopozisyon ti a siporte.

Me o kontrer zot *Leader* i vini, i dir nou ki en laliny drog i vann R300 e sa i tro ser. E en pri R25 ti a pli bon, pou fer desann pri lavi. Konmsi drog en komodite de baz parey diri.

Mon demann mon lekor si son lekor pa fermal ler bann manman pe plere aköz zot fiy e garson ki pa tro lontan, zot ti pe bers li konman en pti baba e zot ti pe reve avek lespwar ki i ti a vin en pilot, swa en dokter, swa en bon sarpantye. Me zis zot vwar zot zanfani degize e vin bann lonbraz zot vre lekor.

Eski *Leader* *SPPF*, *US* lekor pa fermal ler bann paran pe dir zot pa kapab kit zot *fridge* san take aköz lafreyer ki zot zanfani pou vol tou zot manze e vann zis pou ganny sa sibstans. Parfwa mon demann mon lekor si sa dirizan ki pe aspire pou vin Prezidan Sesel, i serye oubyen si li menm i annan en konfli lentere.

Seselwa pe note. Se pou sela ki nou dir “*No turning back e*”!

ALL LDS MEMBERS

“Kit li lanmenm”.

HON JOHN HOAREAU

Mr Speaker, nou bann zil elwanye in touzour en sours lafyerte pou nou nasyon. Ozordi leta nou bann zil e lakonpannyen ki administre zot, *IDC* i fer nou fyer. En lakonpannyen ki ti pe ganny sibvansyonnen par Gouvernman anba sistenm avan i ozordi pe pey *dividend* pou plis ki R150 milyon par lannen dan kof Gouvernman.

Sa i montre ki diversifikasyon dan model devlopman lo bann zil ki oparavan ti zis prensipalman lagrikiltir pe aport bon rannman. Ozordi direksyon ki *IDC* in pran ver devlopman kontrole e soutenab, tout an prenan kont bon swen avek biodiversite inik e frazil sa bann zil, in anmenn bokou sikse e respe par kominote enternasyonal.

Mon oule akeyir lanons Prezidan, ki devlopman lo *Assumption* pou mars *main en main* avek bann rekomandasyon *SIF* e larzan ki pou ganny ranmase atraver servis ki *SIF* pou donner lo kote biyo sekirite, pou ede amenaz Aldabra. San dout, sa

i ava doub proteksyon pou sa leritaz mondyal.

Avek prezans en baz Gard Lakot Sesel dan sa rezyon, pou ede osi donn plis proteksyon bann zil dan sid ki pe fer fas avek piyaz sirtou par bann Malgas ek Komoryen.

Mr Speaker, avek lanons pou konmans en demars ver proteksyon konstitisyonnel pour tou nou bann zil. Dan en fason ki okenn nou zil dan nou larsipel pa pou zanmen ganny servi koman en baz militer i fer mwan tre fyer.

Ankor nou vwar *LDS* pe al pli lwen ki okenn Gouvernman oparavan pou retir Sesel dan en zwe zeopolitik par bann gro nasyon ki le trenn nou dan bann konfli global, aköz nou pozisyon stratezik.

Mr Speaker, Leta nou Nasyon i osi reflekte par leta lespri nou dimoun. Souvandfwa tapaz eksesiv lo lans e dan son zalantour in vin en size ki bokou zabitan mon distrik pe demann mwan pou koz lo la.

Annan de fwa i annan bann moter ou loto ki modifye zot egzos pou fer ronfle pli for. Prenan kont ki mon distrik i en distrik ki annan bokou *guest houses* e lakour prive ki en pre avek gran rout. Sa bann tapaz lo granmaten e dan lannwit i afekte zot kliyan. E de fwa lanmizik for, ouswa

tapaz lisyen ki ganny sonnyen dan en fason ki pa *humanistic*, i fer ki bann vye dimoun ki malad i vin pli malad oubyen bann kliyan i sanz landrwa reste. E sa i anmenn en pert ekonomik pou sa bann letablisman ki perdi kliyan.

Lapolis i osi devret entansifye son zefor pou ede kontrol sa bann kalite nwizans.

Parey Prezidan ti fer resorti dan son mesaz pou lannen e osi repete dan son ladres SONA, ki tou dimoun i annan drwa zwe son lanmizik, me fodre ki zot osi respekte drwa lezot. Akoz Ou drwa i fini kot drwa lezot i konmanse.

Sa ki vin fer piknik lo lans osi parfwa zot kit bokou salte lo lans, e sa i fer nou zoli lans ganny move repitasyon. La mon oule salye zefor Mr Jude Louange lo radyo *FM* ki koz bokou lo sa size e donn bann pti konsey lo lenportans gard nou lans prop.

Mr Speaker, mon fyer ki dan mon distrik mon'n anmenn bokou devlopman pandan sa 5 dernyen lannen. Zis an 2023 e 2024 nou'n met 173 nouvo lalimyer partou, partou dan distrik. Sa lannen nou pou met ankò, partou dan semen ki ankò fernwar parey dan leo Labati kot semen ki mont kot Mr Roch, ki plante e osi lo Lanmar kot Madanm Leon.

Bus shelters e bin houses pe kontinyelman ganny fer en pe partou e pe donn en nouvo laparans dan mon distrik. Malerezman, pa dan tou ka ki nou ganny *wayleave* sirtou pou met *bus shelters*. Mon ankò an diskisyon avek bann propriyeter pou konstri en *bus shelter* kot Lasapel St Louis e trotwar pou desann ver Pascal Vilaz.

Tou dilon grannrout Beau Vallon nou'n konstri trotwar, e serten morso semen pa ankò ganny fer. E sa nou pou travay lo la pou nou konplete.

Malgre, nou pa ankò ganny en proze lakaz dan nou distrik, me nou reste angaze avek Minis Labita ki sa lannen nou a konmans premye faz redevlopman *Société du Logement*, Pascal Vilaz.

Mr Speaker, avek kolaborasyon ant Distrik Bel Ombre e Beau Vallon, byento nou pou vwar en nouvo devlopman, en *indoor fish market e vegetable e meat market* ki pou prozekte pou ganny fer vizavi kordgard.

Sa pou anmenn en gran soulazman pou dimoun aste zot legim, fri e pwason e lavyann prodwi dan la rezyon a en pri abordab. E sa i a redwi letan e nesesite pou al Bazar Victoria.

Mon lakonplisman pa fini la. La Promenade Beau Vallon

pe kontinyen parey mon'n deza dir, depi kot Boat House ziska kot laboutik Mr Mike Bamboche. An se moman travay in konmanse pou fer en pon obor Baobab Pizzeria pou pyeton.

Miray an-desandan semen Beau Vallon in ganny fer, ki'n kout Gouvernman plis ki R4 milyon ki'n donn plis sekirite e lagrandisman lo semen. Dezyenm faz sa proze pou kontinyen dan kontour La Flute e pli devan ankor.

Bokou bann pti semen ek peron in ganny konstri parey kot Madanm Dupres Le Niole, me pli gro devlopman se lo sit Bazar Labrin ki nou pe byento al ouver. In kout plis ki R15 milyon ki'n ganny servi pou konstri 30 kiosk pou vann bann lobze artizanal e 10 kiosk pou manze e bwar.

Sa pou relev latmosfer lo *Seafront* Beau Vallon, e de moman ki sa devlopman i konplete, nou pou rekonmans aktivite Bazar Labrin. Kot enn fwa dan en semenn nenport dimoun ki kapab desann depandan lo plas ki *available* pou li vin vann son prodwi osi.

Fasilite twalet in osi ganny konstri pou kit en o nivo lizyenn. Pou fer fas avek rad mare e lefe sanzman klima ki pe afekte rezyon lakot, nou'n osi konstri *sea wall*. Ozordi, sa in vin en *landmark* lo Beau Vallon e kot tou bann pye

Takamaka in ganny byen proteze e tou dimoun i byen apresye.

Mr Speaker, an konklizyon mon pou fer en pledwari avek pep Seselwa. Nou pei in fer bokou progre e akonpli bokou pandan sa 4an edmi. Mon zis demann mon lekor si nou pa ti'n pas atraver tou sa bann defi, ki zistans nou ti pou'n arive?

Nou'n vin zwenn en kales kase, nou pa'n reste lebra krwaze, me nou'n travay dir pou met an mars en loto performan. Ozordi masin i nef, larou i nef e nou'n demare. I pa ler pou sanz drayver. Si nou met koken lo volan, avan 6 mwan pou napa ni masin, ni larou e zis kat blok anba sa loto. Nou pou regrete me i pou'n tro tar.

Pa zanmen fer sa move listwar 43an repet son lekor. Mon demann zot tou pou donn Prezidan Wavel Ramkalawan ankor 5an e donn li en Lasanble ki for, avek menm plis Manm Lasanble ki nou vwar la ozordi. Avek sa Mr Speaker, nou pou anmenn plis progre pou Sesel.

Alor, nou dir *no turning back* e kit li lanmenm! Mersi

(APPLAUSE)

MR SPEAKER

Mersi Onorab. *Point of order*. Ki *point of order*?

HON JOHAN LOZE

Mersi Mr Speaker. Mr Speaker, mon oule koriz en mezapreansyon ki'n ganny fer e pou met lenformasyon korek dan gran piblik.

I pa en keksoz kontroversa, i zis ki mon ti oule met deor a ou latansyon Mr Speaker ki *subsidy IDC* ki si mon pa tronpe ti R3 milyon par an ti ganny *phased out* anba program makro ekonomik-reform makro ekonomik depi 2008. I pa, napa *subsidy IDC* ki ti pe gannnen an 2020 ler zot Gouvernman in antre parey pe sey fer krwar. Mersi Mr Speaker.

MR SPEAKER

Mersi Onorab. Bon, be mon krwar in ariv ler pou nou pran poz, me avek retar ki nou'n gannnen mon pou bezwen koup en pti gin lo letan *break*. Nou a retournen 4er 15. Mersi.

(BREAK)

MR SPEAKER

Laparol pou Onorab Conrad Gabriel.

HON CONRAD GABRIEL

Bonn apre midi Mr Speaker. Bonn apre midi tou dimoun prezan dan nou Lasanble ozordi. En bonn apre midi spesyal pou tou zabitan Pointe

Larue ki pe ekout nou ozordi pou larepons SONA.

Dabor, mon profit lokazyon pou remersi Onorab Spiro, Onorab Cosgrow pou zot letan ki zot in pas dan Lasanble e *welcome onboard* Onorab Larsen lo kote US. E an prensip *welcome* de lot kote LDS Onorab Sultan ek Onorab Bijoux.

Dabor, mon oule remersye ankor enn fwa tou dimoun ki'n ed mwan dan en fason ou en lot pandan sa plis ki 4 lannen ki mon'n ganny elekte pou reprezant distrik Pinte Larue. Bann ki pa ti siport mwan *at least* zot in rekonnet ki malgre ek bokou difikilte, bokou defi mon'n nobou aport mon led e soutyen pou tou dimoun san regarde si ou ti vot pou mwan oubyen non.

Prezidan dan son komansman SONA in fer resorti ki Sesel ozordi i diferan ek sa enn 2020 e i ti site ki Seselwa pe viv en meyer lavi. I annan plis loportinite, dimoun i lib pou eksprim son lekor, napa viktimizasyon. Annan nouvo lespri governans e bann lenstitisyon in vin pli solid.

Pep Seselwa, zot ki'n viv dan sa pei pou plizyer lannen eski sa i leka? Prezidan in al pli lwen e dir letan ou vin travay kit politik kot ou. Be Mr Prezidan, letan ou vin fer

SONA silvouple kit politik
State House. Sitan senp.

(APPLAUSE)

HON CONRAD GABRIEL

Ou, oule vin fer politik dan sa Lasanble e espekite ou oponan politik asize pou ekoute e pa dir naryen. Be kot ki annan sa. I paret Prezidan pa ankor konpran son vre rol koman en Prezidan Larepiblik.

Eleksyon pe aproz mon bann frer ek ser Seselwa e i pe apros byen vit tou. Ler in sonnen pou nou lev nou latet e ouver nou lizye, nou a pran nou vre drwa koman bann sitwayen en reklanm nou drwa koman bann imen ki pe viv dan sa zoli pti pei Sesel.

Mr Speaker, mon komans koumsa aköz pandan sa bann dernyen lannen ki mon'n la prezan dan sa Lasanble, mon'n sey mon mye pou fer lavwa zabitan La Pointe Larue e osi byen ki tou Seselwa nenport ki landrwa kot ou ete zot lavwa ganny tandé. I pa'n en latas fasil pou mwan, me avek determinasyon ek perseverans mon'n reisir akonplir bokou.

Avek sanzman DA a plizyer repriz, apepre 5 antou, mon'n trouv mwan dan bokou difikilte pou fer marse bann proze distrik parey lakaz, semen e lezot ki tous direktéman bann zabitan.

Avek larive nouvo DA, Nadine AhKon ek son sekreter, son *housekeeper*, son *cleaner* dimoun dan *landscape* deor ek bann sekirite, mon pran loportinite pou remersye sa tim pou kontinyen travay pou distrik ki nou a fer plis progre pou ed sa kominote fer plis sikse.

Mon pran lokazyon pou *welcome* nou nouvo *office manager* apre en bon pe letan ki sa *post* ti *vacant*. Zabitan i a konstata zot menm ki kantite retar nou'n rankontre pou fer distrik bouze aköz tou keksoz i bezwen pas atraver Egzekitiv. Savedir son DA, son OM, son sekreter e lezot. An gro, Gouvernman.

Avek mankman servis sosyal e *welfare officer*, DA ek mwan menm koman MNA, nou'n bezwen zwe sa rol ki pa fasil ditou avek sa ta kart ki'n akimile depi lannen pase apre depar sa 2 zofisye. La nou pe koz servis sosyal ek *welfare*.

Mon lev sa pwen zis pou fer piblik e zabitan konpran poudir MNA i fer son mye, me souvandfwa nou ganny bloke avek sa bann sanzman ki arive lo nivo Gouvernman.

Fotespere, ziska eleksyon nou a kontinyen travay ansanm pou byennet zabitan La Pointe Larue.

Bokou in ganny dir e bokou promes in ganny fer dan sa Lasanble komansman

par Prezidan Larepiblik, son VP, son *whole Cabinet of Ministers*, son PS, CEO, DG e lezot. Lepep Seselwa letan in arive pou nou *hold* sa Gouvernman *accountable* pou tou sa promes dan vid, in sitan anbet sa pep kot par ler zot menm zot bliye ki zot in dir.

Legzanp i bokou mon bann frer ek ser. Zot in met lekspektasyon sa pep vreman o, me senpleman pa kapab delivre. I annan bann keksoz sitan senp ki ti kapab ganny dil avek me ankor enn fwa in montre zot lenkonpetans e linefikasite dan gouvrenans en pei.

Pti pei, gro problem. Si ou vwar en Prezidan i kit pei zis pou pa asiste lanterman en dimoun kle ki'n ed li vin o pouvwar, *then my brothers and sisters*, reflesir byen dan sa eleksyon ki pe vini. An dot mo, *think twice*. Annou fer en bon analiz avek en konsyans kler avan nou *cast* nou vot.

Eski nou siport en Gouvernman liberal ki'n anmenn lamizer terib pou pep Seselwa? Sa ki ris in vin pli ris e sa ki pov, i vin pli pov. Eski nou kontinyen soutir en group dimoun ki'n met sa pei lo son zenou. Desizyon i avek zot mon bann frer ek ser.

Kestyon senp. Eski ou pli byen ki ou ti ete 5an pase? En refleksyon fondamantal pou Lepep Seselwa. Si larepons i

non, donn *United Seychelles* sa sans pou refer nou pei vin sa bizou dan Losean Endyen.

(APPLAUSE)

HON CONRAD GABRIEL

Mr Speaker, sa i anmenn mwan pou tous sa size pri lavi. E la i enportan fer Seselwa rapel ki ex Minis Finans, Mr Naadir Hassan ti dir byen for ki sa i en zouti politik ki politisyen i servi pou vin o pouvwar. Oli li Minis Finans? In pas son letan zis maltrete, denigre nou apre ki i ti'n prezant pli gro Bidze ki Sesel in deza annan.

Mon krwar in santi kot defet pe vini e in taye byen boner e trankil.

(APPLAUSE)

HON CONRAD GABRIEL

Kestyon ki nou demann nou lekor se aköz ki VP ki pou pran sa portfolyo. Ki zot pe kasyet? Nou konnen poudir VP in deza okip pozisyon kle dan Gouvernman oparavan e i konn tre byen ki'n pase e i menm konplis dan bokou keksoz. Mon poz sa la.

Parey in leka dan mon bann SONA, mon bann larepons SONA oparavan, mon toultan fer resorti soufrans sa pep. Seselwa napa larzan pou depanse lo bann komodite de

baz ki pri in kontinyen monte e tous plafon.

Dan mon bann vizit kot bann lakour, sa pwen in monte kot laplipar fanmir pe aktyelman pas dan bokou difikilte pou fer 2 bout zwenn. Bann *single mothers* pe pas dan difikilte enorm, dimoun i per pou vin rod led aköz sa birokrasi ki egziste. Mon bann zabitan Pointe Larue i konpran tre byen ki zot devret leve e debrouye, me Gouvernman i devret antre e donn lasistans bann ki merite.

Mr Speaker, bokou bon Mosyon lo nou kote latab in anmennen pou seye ede soulaz lavi sa pep, me *LDS* ek son *super majority* zanmen in lev lanmen pou aprouv okenn nou Mosyon, zot in toultan pe sey prouv ek sa pep ki zot ki *rule border* e an rezilta sa *show of absolute power*, sef i bezwen pran gran kouto e mont dan fore li menm. Zafer pa bon, zafer in sal. Ti dir pou annan e pa ti dir keler.

(APPLAUSE)

HON CONRAD GABRIEL

Apre plis ki 4 an zot in deside *travel, enjoy* lo larzan *tax* ki sa pep i kontribye. La aprezan zot oule ankor 5. Serye zot Mr Speaker, Seselwa in fini fer son *appraisal* e rezilta in montre ki zot in *fail* pou sakouy pye.

E ler ou pa'n gard ou promes rezilta i *out*, e spektater i kriye byen for "tir li".

(APPLAUSE)

HON CONRAD GABRIEL

Gro fot in ganny komet dan kler e otomatikman kart i rouz. Laplipar Seselwa i asize i regard Lasanble pandan sa dernyen 4an.

Bokou zot in montre mekontantman avek sa bann *MNA* ki ti ganny elekte pou reprezant zot e vin sa lavwa pou defann zot drwa. Me malerezman, zot in pas zot letan defann lentere Gouvernman e sa pou kout zot tre ser dan sa eleksyon ki pe vini. Zot in maltret nou a plizyer repriz, Lepep in note. Nou ti sipoze disparet koman en parti politik, me la mon krwar zot ki pou disparet apre Septanm 2025.

Travay i la, Seselwa in pare pou fer sa vre sanzman ki Sesel i merite. Seselwa ti annan en zwa de viv enkrwayab me tousala in disparet. Imen an tre imen in arive pa tonm dakor Mr Speaker. Zis laenn ki vin pli for zour an zour. Zis get yer ki'n pase isi dan sa Lasanble. Seselwa pe get zot de pre, e pe swiv tou ki pe pase.

Ki mannyer Sefdeta i kapab ridikiliz son bann oponan politik dan en *SONA*.

Mon bann frer ek ser se sa vre Leta nou Nasyon. I paret nou'n elekte en Prezidan ki ranpli ek vanzans ek lanmertim. Si ou non pa lo lalis ki'n ganny afekte par koudeta, kontakte *State House*. Ze zooot... tousala mannyer i apele.

Sanmenm sa pozitivite e linite ki ou pe pres lo la Mr Prezidan. Akoz *State House*. Larepons i senp. Sa i son dernyen lesey pou anbet dimoun, nepli tan pou fer Seselwa dormi boner.

(APPLAUSE)

HON CONRAD GABRIEL

I enportan note ki ou *Cabinet* pe pran tou sa ki pou zot *allowance* palto, ledan, linet, lakaz e lezot. Akoz ou pa donn sa bann *teachers*, ners e lezot travayer piblik zot *long service allowance*?

(APPLAUSE)

HON CONRAD GABRIEL

Sa ti pou retenir zot e ankouraz zot pou fer pli byen zot travay. Ti annan en sistenm ki ti pe marse e *LDS* in vin deranz tou.

Alors, mon a zis rekonfort Lepep Seselwa par donn zot sa garanti ki en Gouvernman *US* pou redonn zot, zot bann *allowance* e 13enm mwan saler antye san kondisyon.

Leta nou Nasyon pe ganny *run* malisyezman. Mr Speaker, mwan letan mon regard Leta nou Nasyon mon ankoler, mon mekontan avek lafason nou pei pe ganny dirize.

I paret ler nou vin o pouvwar, nou bliye sa parol transparans telman nou lespri i vize ver fer plis larises. Sa i fer ki nou dekonekte ek sa pep ki pe trimouse pou fer 2 bout zwenn. Se sa ki mon konsider vre Leta nou Nasyon ozordi. Kot Prezidan i senpleman mank sa sans pou demontre ek Lepep ki vreman *care* pou zot e annan en leker pou tou Seselwa.

Mr Leslie Benoiton e lezot dimoun pe soufer an silans, *time alone will tell*. Sa i Leta nou Nasyon. Kot pou ankore enn fwa nou Prezidan pa oule vreman aksepte sityasyon ki nou ladan e osi i pa dan en pozisyon pou enplimant bann Polisi ouswa mezir pou adres defi nou nasyon e nou pei.

Mr Speaker, nou enplor Gouvernman pou aret pous tou bann Egzekitiv ler zot kontra i fini apre dir kontra pa'n ganny renouvle par *mutual agreement*.

Ozordi Mr Speaker, si ou pran kont konbyen bann profesyonnel eksperyanse in swa forse kite, oubyen in ganny pouse dan Gouvernman. Nou pa pou

vwar li drol akòz bokou bann Minister, Lazans pa pe kapab perform alaoter e Prezidan i akiz zot pou trenn lipye. Se sa vre Leta nou Nasyon.

Sesel nepli pour tou son zanfan ler ou tann bann zenn profesyonnèl pe ganny denigre e pa pe ganny sans epanouir pou partisip dan devlopman nou pei, malgre zot kalifye. Bokou viktimizasyon partou kote Mr Speaker. *Law and order* e personn pa pe al par lao Lalwa, i zis par lao lalev.

Drwa bokou nou bann frer ek ser in ganny vyole a plizyer repriz. Legzanp pou donnen i bokou, me sa en tre resan i sa rayot dan prizon Montagne Posee kot 2 nou frer ti perdi zot lavi e fanmir sa bann viktim ankor pe soufer an silans. Bokou pe demande ki pe arive dan nou pti pei.

Minis i tap sivilyen ek loto, naryen pa arive. Minis i sot *roadblock*, *nothing*. Minis pa koz laverite dan Lasanble, i *ok*. I montre ou vre leta nou nasyon Mr Speaker, bef dan disab sakenn vey son lizye.

Prezidan i oule met blanm lo bann travayer ki pe *struggle* e pe fer zot mye pou fer marse pei malgre tou sa defi ki egzisyè. Prezan ki i anvi al get *ease of doing business*. Kan zot in pas zot letan anmar lanmen pti biznes par entrodwir tou sort kalite *tax*, *license*, ki finalman i pe detri

nou lekonmi e fer nou pei retourn an aryer.

Les mwan dir zot ki si Leta nou Nasyon i koumsa ozordi, se pa lot ki Prezidan ek sa Gouvernman *LDS* ki responsab. Zot in retir tou bann bon Polisi ki ti egziste e sey re envant larou. I bliye ki rol en Gouvernman. E mon a zis profite pou *remind* li, se pou asir en lavi abordab pou tou son pep e pran bon swen ek son pep.

Prezidan i oule fer tou keksoz e sa Mr Speaker i apel *micromanagement*. Nou vwar sa dan plizyer lenstans kot Prezidan i enterfer dan bokou keksoz ki menm pa konsern li. Mr Speaker, ledikasyon i size tre enportan ki mars an paralel avek *sports*.

An se moman sa 2 Minister pe fer fas ek bokou difikilte, ki ti napa lontan. Bokou travay i annan pou fer dan sa bann Minister. Avek en Gouvernman *US* napa naryen ki enposib. Listwar in prouve ki se en Gouvernman *US* ki sel opsyon pou Sesel.

(APPLAUSE)

HON CONRAD GABRIEL

Nou annan en Gouvernman ki napa tolerans e sey son mye pou ridikiliz sa bann dimoun ki'n travay dan medya e lezot sektè kle nou lekonmi. I vwar problem ek tou dimoun

e zis li ki koz laverite, an dot mo i pa kontan ekoute e sa i kre fristrasyon dan servis piblik e menm dan son prop administrasyon.

Nou konnen ki nou pe pas dan bokou difikilte Mr Speaker, e sa detrwa dernyen lannen ki'n pase i pa'n fasil ditou pou bokou fanmir Seselwa. Espesyalman bann dimoun Petit Paris, Brillant, Cascade. Bann biznes dan Providence e san oubliy mon prop distrik Pointe Larue.

Lavi pou sa bann dimoun ki'n ganny afekte pou nepli parey. I pou reste en kosmar pou bokou zanfand osi byen ki adilt ki'n sibir sa leksplasyon kot CCCL. En sikatris ki pou marke dan listwar nou pei.

Gouvernman in *fail* pou zer sa sityasyon parey i ti devret. Kantmenm *LGB* ti pe sey fer nou krwar ki *US* in fer politik ek sa. Be mon demande, *LDS* pa'n fer politik ek sa? Silvouple annou arete sa lipokrizi.

Mr Speaker, nou ti demann en lanket endepandan, me Gouvernman ti kategorikman refize. Akoz? Onorab Tamboo, in senpleman demande oli sa rapor e in ganny met deor. Byento laverite pou sorti.

(APPLAUSE)

MR SPEAKER

Onorab! Onorab. Ou'n fer en referans avek mon *Ruling* pou met Onorab Tamboo deor. Ou'n mal eksplike, sa ki ou'n dir i pa korek. Silvouple kontinyen.

HON CONRAD GABRIEL

Mersi, Mr Speaker. Nou bezwen sezi sa moman pou nou fer bokou refleksyon lo lavi an zeneral.

Nou bezwen fer bokou lapriyer mon bann frer ek ser Seselwa. In ler pou nou met tou nou diferans de kote e travay pou sa Sesel, sa zoli Sesel ki apel nou pei, nou patri ki'n nou kontan. Sa sel Sesel ki'n bers nou depi nesans e ki'n donn sakenn de nou en sans progresse e epanouir dan lavi.

Me malerezman, nou pe regrese dan plas fer progresse anba en Ladministrasyon *LDS*. Annou arete fer sa pti pei Sesel plere. Pou lanmour de *Dieu*, donn *US* sa vot e ansanm nou a fer Sesel fyer.

(APPLAUSE)

HON CONRAD GABRIEL

Mr Speaker, malgre Lazans Proteksyon Sosyal in vin ek serten revizyon ki dapre zot pou soulaz lavi pep Seselwa, i pa reflekte la realite ditou. La realite aktyel ki nou pep pe pas ladan pa pe ganny reflekte.

Eski en bon *survey* in ganny fer avan ariv lo sa bann tel desizyon? Larepons i non. Koman en pep nou bezwen kontinyen reste solider avek nou kanmarad. E koman en Gouvernman responsab, i devret annan konpasyon pou lezot e konpasyon pour sa ki'n met zot la. Zot bezwen a tou moman asire ki napa en Seselwa ki al dormi vant vid.

Annou pa les en katastrof devlope dan nou pei zis aköz en dimoun i lafen. Bokou fanmir pe trimouse pou konbat pri lavi ki pe kontinyelman monte. E la mon mazin sa bann dimoun aze ki bezwen esper ziska 65an pou benefisye zot sekirite sosyal. Sa i fermal, Mr Speaker.

Malgre ki Prezidan in sey eksplike, me napa gran keksoz ki i pe fer pou amelyor sityasyon lavi Seselwa, sirtou nou bann dimoun aze. Sa promes 10mil in fini tonm dan delo. Ladres Leta Lanasyon in *fail* pou donn konfor pep Seselwa lo ki Gouvernman pou fer pou adres pri lavi ki sa ladministrasyon ti swadizan annan solisyon pandan zot 30an konpanny eleksyon.

Alors Mr Speaker, dan sa Sesel avek en tel ladministrasyon o pouvwar, sa ki annan pou reste annan. Sa ki napa, pou touzour napa. Se sa lager ki Per Fondater ti anmennen pou pep Seselwa e

se sa prensip ki nou parti i krwar ladan. Lazistis sosyal, kot tou Seselwa i benefisye e annan menm drwa.

Plis zefor i devret ganny fer pou ed sa Seselwa ki mwen fortinen. Espesyalman nou bann dimoun aze. Sa group dimoun i santi zot rezete apre tou sa zefor e kontribisyon ki zot i fer pou batir nou zoli pti pei Sesel.

Mr Speaker, kritik pou touzour egziste, me nou bezwen kritik dan en fason konstruktiv e fer li dan en fason kot nou ed pei fer plis progre. Mwan personnelman, mon krwar dan en Sesel ki annan linite e responsabilite. Mon bann frer mon'n fer bann kritik ki konstruktif.

Sepandan Mr Speaker, tousala mon repet ankor i devret komans avek Prezidan li menm, apre son VP, son bann Minis e annou pa bliy bann endividi ki asiz lo sez *speakership*, zis tenny *micro* e pa oule tann okenn kritik dirize ver Prezidan Larepiblik.

(APPLAUSE)

HON CONRAD GABRIEL

Eski se sa linite dan diversite? Oubyen nou pe *serve a modern democracy* annan Ladministrasyon LDS.

O kour mon manda mon'n esey mon mye pou

inifye tou mon zabitan. Fer zot vwar ki malgre nou lopinyon diferan me nou koman en kominote, koman imen, koman bann frer e ser nou kapab kontinyen viv byen e ed kanmarad a tou moman malgre nou lopinyon politik i diferan.

Anmenn plis linite, progre e prosperite pou tou dimoun, malgre latas devan mwan i difisil mon determinen pou fer en diferans malgre bokou lobstak. Mon bann adverser pe sey zot mye pou mon tonbe, me mon met tou dan lanmen Bondye tre o. Ou ki vwar tou e ou ki konn tou, mon dir Senyer pardonn zot akoz zot pa konnen ki zot pe fer.

Si Gouvernman i vreman senser, silvouple aret fer krwar ki *US* pe diviz sa pep, kan o kontrè se zot ki'n fer tou pou kre divizyon par senm fo propagann. Politik bon marse in fini, Seselwa i byen entelizan e konnen ki keksoz pa sitan fasil.

Fodre sa Gouvernman i aprann ekoute. Zot prop siporter i mekontan avek serten desizyon ki pe ganny pran e an zeneral dezapwente avek lafason pei pe ganny dirize. Pirman diktatir *at it's best*.

Be Mr Speaker, i pa drol si ozordi *LDS* in perdi trwakar son bann siporter. Silvouple

annou aret met politik dan tou keksoz. Ler mon obzerve mwan, mon dir rezon ki keksoz i koumsa ozordi i tre senp. I annan bokou mansonz ki'n ganny koze pou konvenk pep Seselwa ki keksoz ti mal ganny zere anba Ladministrasyon *US*.

Prosedir *procurement* e *tender* i ganny manipile, napa en bon lankadremman dan sesyon nou bann proze kapital. E pli enteresan, zesyon nou Bidze pa'n *atenn* son target parey nou vwar an 2023 e 2024.

Me parkont, Prezidan in dir nou fer sirplis, zot in fer sirplis, annefe target fiskal ti bezwen bese lannen 2023. Ti vreman sirprann mwan pou vwar pyer fondasyon pe ganny mete pou nouvo Lopital, Ile Soleil, me prosedir *tender* pa ti ankor konplete. Mon pa konnen ki kantite pyer fondasyon ki'n ganny mete la koman eleksyon pe aprozé. I annan ankor pou ganny mete. Sa Mr Speaker, i Leta nou Nasyon ozordi. *Too little too late!*

Sel bi Gouvernman dizour sete zis pou ganny pouvwar an 2020 a tou pri, e dek ki zot ganny pouvwar, zot in swa kit tou keksoz parey oubyen tir bann lankadremman ladministrativ otour zesyon bann Polisi ouswa programm Gouvernman. E pli enportan,

zot in *fail* pou adres bann size ki swadizan zot annan solisyon.

Ankor enn fwa Mr Speaker, sanmenm ou vwar ki pou en 5enm fwa Ladres Leta Lanasyon in *fail* pou adres problem nou pei e nou pep. Mon demande alors, oli sa bann solisyon e gran promes ki zot ti'n fer. Larepons byensir pou dan bwat vote le 27 Septanm 2025.

(APPLAUSE)

HON CONRAD GABRIEL

Maltrete pandan sa plis ki 4an in fer nou vin pli for e pli determinen ki zanmen. I annan ki ti dir, i rod nou pou maltrete.

(APPLAUSE)

HON CONRAD GABRIEL

Eski sanmenm sa linite ki Prezidan ti pe rode? E mon asir Lepep Seselwa ki sa 10 nou lo sa kote latib, nou pou kontinyen aport nou soutyen e aport nou kontribisyon e ed sa pep demaske sa bann demagozi ki Gouvernman pe fer. Mon kontinyen repete, foudre sa Gouvernman i aprann ekoute e i konsilte son pep. Aret *micromanage* silvouple.

An terminan Mr Speaker, koman en dimoun ki'n atase ek sport pli prezizeman *basketball* pou plizyer lannen,

mon santi mon tris letan mon get sport pe ganny administre dan sa fason dan nou pei. I fer lapenn pou vwar bann *sportsmen* bezwen al tap laport pou rod *sponsor* e mandyan pou al defann paviyon Sesel.

Eski nou senser letan nou pe rod nou premye meday Olenpik? Kestyon pou en sanpyon. Mannyer *LDS* pe *run border* mon krwar pa, nou pou kontinyen reve, mon konnen poudir i annan bokou atlet ki pe persevere e donn tou pou akonplir zot rev. Me bokou baryer e lobstak i anpes zot al pli devan.

En Gouvernman responsab ti'n devret fer plis ki sa. Mon asir ou ki byento nou pou montre zot mannyer i diriz en pei. Nou pa ni pou bezwen al *course Dubai*.

Finalman, sa Gouvernman i dan problem e sa i demontre klèman dan sa diskour Leta nou Nasyon kot Prezidan in admet ki in fatige. Absoliman ou pou fatige si oule zwe tou pozisyon lo laplenn.

Akoz dan Lopozisyon i annan bann zwer ase *skilful* ki pou fer ou ronfle e monte desann lo laplenn.

(APPLAUSE)

HON CONRAD GABRIEL

Fer sa ki zot oule. Tenny *micro*, maltret nou, met nou deor lefe i reste ki 6 mwan avan eleksyon napa en Komisyoner pou ansarz eleksyon. Apre depar Mr Lucas.

Sa i montre nou vre Leta nou Nasyon, kot zot ti kriye byen for “Gappy out”. Ozordi pep Seselwa pe dir *LDS out e never again*.

(APPLAUSE)

HON CONRAD GABRIEL

Tir li. *US*, sel opsyon pou Sesel! Mersi.

(APPLAUSE)

MR SPEAKER

Mersi Onorab. Laparol pou Onorab Gervais Henrie.

HON GERVAIS HENRIE

Mersi Mr Speaker. Koleg *MNA*, tou bann dimoun ki pe ekoute espesyalman bann rezidan distrik Mont Buxton, bonn apre midi.

Mr Speaker, Sesel i lo semen progre avek *LDS*. Lo semen pozitivite. Mont Buxton e sa 25 lezot distrik dan Sesel i lo bon semen avek *LDS*. Ouswa parey granmoun i dir ser, frer Seselwa nou dan bon lanmen.

Mr Speaker, mon pran laparol ozordi avek bokou limilite. Limilite aköz mon anvi gard mon refleksyon lo mesaz

Leta Lanasyon prezante par Prezidan Larepiblik, Mr Wavel Ramkalawan Zedi pase, pli senp posib.

Mon'n ekout li avek bokou lentere e apre ki mon'n travay pre avek li pour sa dernyen 18an, mon kapab dir ki sa diskour ti enn emosyonnel pour li.

Mon'n vwar moman kot in koz avek lafyerte, avek lazwa, avek pasyon, avek pasyans e avek lasazes. Sa *SONA* in donn nou en loportinite pou reflesir. In ofer nou en lespas pou batir lo sa fondasyon ki Ladministrasyon *LDS* in konmans etabli an Oktob 2020.

Dan son dernyen diskour *SONA* pour son premye term, in senpleman fer nou konpran e aksepte ki i pa fer mazik li. Ler nou'n fini ekout li, konbyen nou ki'n demann nou lekor, eski nou'n fer ase pou siport li? En zonm tousel pa pou zanmen kapab fer sa transformasyon ki nou oule pour nou pei. Sa transformasyon i depan lo nou tou.

Letan mon antann Dirizan Minoriter dir ki Prezidan Ramkalawan ti oblize donn tou solisyon, i demontre son febles koman en dirizan. Napa en Prezidan ki kapab rezourd tou problem son pei. Sanmenm sa i annan lezot dimoun ki travay akote li e sa

pou toultan leka, pe enport ki Gouvernman ki o pouvwar.

E si i annan en keksoz ki Prezidan in fer telman byen pandan son manda, se pou ekout bann eksper e teknisyen dan servis piblik. In vreman valoriz bann teknisyen. Sel keksoz ki en Prezidan i kapab fer, se kree en lanvironnman ki permet son pep epanouir pou kapab reponn bann kestasyon, fer fas avek bann sityasyon lavi e trouv solisyon pour bann defi ki zot fer fas avek.

Ozordi koman en dirizan dan distrik ki mon reprezante isi anndan, mon fyer aköz mon pei Sesel koman en pti pei, pe debout avek lafyerte parmi bann pli gran pei ki nou.

Mon osi fyer aköz mwan ek ou, nou viv dan enn bann pli zoli pei dan lemonn, me osi aköz koman en nasyon nou'n reganny nou laliberte. Nou lademokrasi pe pran en nouvo dimansyon, nou viv dan lape avek stabilite, nou vwar devlopman pe kontinyen arive otour nou e prosperite nou nasyon i evidan.

Nou pe fer plis avek mwens. Larises nou pti pei pe ganny distribye egalman. Wi, se sa Leta nou Nasyon ozordi anba Ladministrasyon LDS. Me sityasyon nou lavi, annou pa zanmen oubliye pa ti touzour koumsa.

Mr Speaker, depi Mardi lapros parti minoriter in souliny zot laswaf pouvwar e ki mannyer zot obsede avek tir Prezidan Ramkalawan o pouvwar. Me tir li, ou bezwen kapab e konn fer li. Dapre rezilta eleksyon 2020, US son sipor i baze lo 27mil 185 vot. Oubliy vot Prezidan Danny Faure, aköz Prezidan Faure son 28mil i pa dan zot parti.

Kontrerman avek sa 35mil 562 pou Prezidan Ramkalawan ouswa 8mil 377 vot an mwens. 8mil 377 vot an mwens. *Comme dir* li menm, *hmm...hmm.....* zot ankor feb marmay.

Zot napa en plan pour Sesel. Zot oule zis pouvwar. Tou *MNA US* ki'n koze ziska la, in esey fer krwar ki zis zot parti ki annan *license* pou gouvern Sesel. Napa en diskour prononse par en Manm lot kote latab ziska la ki pa'n esey propaz en rimer, annan en lensilt kekpar, ki pa'n mank respe, ki pa'n annan labi verbal e annan en dezir kriyel pou okazyonn dimal ouswa lapenn anver Sefdeta Larepublik Sesel.

Prezidan Ramkalawan lapo i epe, e zot lesey dezespere pou esey andomaz son repitasyon an retour pou zot ganny popilarite avek elektora Seselwa pa pe marse e pa pou marse.

(APPLAUSE)

HON GERVAIS HENRIE

Son rikord avek sa ki pour son ladministrasyon, in prouve ki tou zot deklarasyon i fo, e senpleman bann lakizasyon. Ouswa ki ziska aprezan zot bann larepons in zis en senfoni propagann dezorganize, pou bat latet bann ki refize aksepte larealite.

Kwa sa realite ki egziste ozordi? An dot mo, ki mannyer Leta nou Nasyon i ete an term son kondisyon ekonomik ouswa politik? Koman bann reprezantan Lepep nou merit pe reflesir lo si nivo krim dan pei in monte ouswa desann ?

Eski sitwayen sityasyon lanplwa pe amelyore? Ki mannyer leta lasante i ete? Eski i annan ase lakaz? Eski bann grannrout i dan bon leta? Parmi bokou lezot kestyon, Mr Speaker.

Lo nivo ekonomik tou literatir ki ou lir ozordi, i plas pti Sesel premye lo lendeks Devlopman Imen, lo kontinan Lafrik e 67enm globalman. An plis, nou ganny klase dan kategori, devlopman imen vreman o.

An term to mank lanplwa e to lenflasyon, nou pe perform pli byen ki en kantite gran pei. Letan poursantaz mwayenn to mank lanplwa i 7poursan lo

Kontinan, isi Sesel i anviron 3.2 poursan.

An term mezir prosperite nou pep e byennet nou nasyon, kalkilasyon bann eksper i dir nou Prodwir Domestik Brit ouswa *GDP par tête d'habitant*, i pli o dan Lafrik. Si nou premye dan Lafrik, i vedir ki menm se si sela, standar lavi Lepep Seselwa anba Ladministrasyon LDS i reste enn ki o aköz nivo nou sistenm ledikasyon, nivo saler bann travayer e lakantite letan ki dimoun pe viv.

Be ou ki annan lespri pour reflesir, ki ou pou krwar? Sa senfoni propagann dezorganize, ouswa analiz endependan sa bann *expert*?

Mr Speaker, ant 2022 e 2023, nou'n debrouye menm pou retir Sesel lo *blacklist* Linyon Eropeen pou vin lo *grey list* an Fevriye 2024. Sa zefor avek sipor sa kote latab dan Lasanble Nasyonal in konvenk Linyon Eropeen pou rekonnet latransparans, e aksepte progre avek langazman ki nou pe fer pou asire ki kad legal Sesel i lo norm e standar enternasyonal.

Ki sa i vedir pour ou ki pe ekout mwan? Si Sesel i reste lo *blacklist* sa i met bokou presyon lo Sekter Finansyel pei e bann Labank pou trouv li difisil ganny en *correspondent*

bank pou fasilite lenportasyon laplipar keksoz ki nou konsonmen koman en pti leta zil.

Sa ki pli enpresyonan pour mwan se lefe ki zis dan 4an, anba Ladministrasyon LDS nou'n fer grosi nou rezerv pei ki Labank Santral i zere par anviron 45poursan, oubyen par plis ki \$200milyon Ameriken malgre lager ant Larisi avek Ikrenn, lager ant *Izrael* avek *LA Palestine*, kriz dan Lanmer Rouz e pandemik COVID-19 ki'n enpakte nou lekonomi negativman. Sirtou nou premye pilye ekonomik ki Lendistri Tourizm.

Me ki tousala i vedir pour ou ki pe ekout mwan anler Roche Bois, Mont Signal ouswa Dan Lenn? I vedir ki nou zefor kolektiv pe asire ki nou pti pei i annan ase larzan pou pey tou bezwen esansyel parey komodite de baz, latizann e mentenir valer nou Roupì lo marse deviz etranzer.

Eski ou rapel ki ler LDS ti komans diriz pei an Oktob 2020 pour ou kapab aste en \$1, ou ti bezwen R22? Ozordi ou nepli fer fas avek sa lefe negativ sok ekonomik ki fer pri komodite telman ser, akòz Ladministrasyon LDS in reisi stabiliz valer nou Roupì kont Dolar lo R14.

Sa bann lendeks Mr Speaker, fodre ki nou pran zot an kont e zot enportan. Bann

politisyen *populiste* a dir ou nou pa met lendeks dan kastrol ouswa zot pa pey bil PUC. Wi, me zot mezir nou nivo devlopman, nou standar lavi e permet nou konpar nou avek nou bann pei vwazen.

Rezilta sa bann lendeks i annan en lenpak lo nou lavi toulezour. Pli nou fer pli byen, pli i pli bon pour nou. Ki mannyer ou ekspekte nou pou grandi? Nou pou matir, nou pou devlope koman en nasyon si nou inyore sa bann kriter?

Annou pran lendeks persepsyon koripsyon par egzanp. Zot a rapel ki an 2018, 19 e 2020, nou ti'n kole dan 27enm pozisyon. Dan zis 4an anba Ladministrasyon LDS, nou'n ariv dan 18enm pozisyon menm par devan Leta-z-Ini.

Ki sa i vedir pour ou koman en endividi? Dabor, i enn bann kantite byen ki pei pe fer anba LDS. Zis mazine si nou pa ti bezwen al re investir dan lenfrastruktir ki US in les tonm an rin, be nou Seselwa pa ti pou pli lwen ankor dan zis sa 4an.

Avek sityasyon koripsyon ki pe amelyore dan pei anba LDS, nou pe byen zer resours finansyel pei e nou pe kapab investir dan nou dimoun. Ozordi laprev devlopman i partou kote. Bann batiman ki ansyen rezim ti'n kit an rin, ozordi pe reganny lavi.

Plizyer proze lakaz pe bourzonnen partou kote. Avan ki Ladministrasyon LDS i konplet son manda, en total pros 800 lakaz pou'n fini konstri dan omwen 4an. Eski sa i rikord en Gouvernman ki pa pe delivre? LDS pa lour e pa'n zanmen ezite investir dan pep Seselwa.

I pa'n fer saler bann travayer dan servis piblik mont zis par 10poursan an 2023, in osi fer mont par 7poursan an 2025. I annan osi saler par erdtan ki pe al ganny aziste apartir mwan Avril ki vedir sa pou otomatikman afekte saler bann travayer dan Sekter Prive, an komansman par saler *minimum* dan en fason pozitiv.

Annou aret en kou pour le moman la, e konpar zenerozite Ladministrasyon LDS avek US an 2019 kan lekonomi ti bon. Zot ti ofer travayer servis piblik zis en pti logmantasyon 5poursan. Apre zansla, ava annan lodas dir nou, ki nou konn zis nou lekor?

Dan 2an nou'n donn travayer servis piblik en logmantasyon 17poursan. Be sanmenm nou pe dir, “No turning back”.

ALL LDS MEMBERS

“kit li lanmenm”.

(APPLAUSE)

HON GERVAIS HENRIE

I osi gras a en Polisi avanse par Prezidan Ramkalawan, depi ler i ti dan Lopozisyon ki ozordi dan en lakour kot i annan 2 dimoun aze, annou dir zot en koup e ki pe ganny benefis retret ki nou apel sekirite sosyal.

Zot pou ganny plis ki R12 mil par mwan apartir lafen dimwan Avril, en *minimum* R12 mil par mwan pour en koup aze dan en lakour, Mr Speaker. La nou pe koz lo zis sekirite sosyal. Aprezan azout sa sekirite sosyal ansanm avek zot fon pansyon.

Allowance bann etidyan pos segonder in ogmante, san oubliy logmantasyon 10poursan pour bann ki pe etidye dan 17 pei atraver lemonn. Apre 10an ki bann benefis byennet sosyal pa ti'n ogmante, Ladministrasyon LDS in trouv mwayen pou ogmant plis ki 7 benefis par 32poursan pou permet bann ki pe ganny sa benefis viv dan plis dignite.

Eski sa aksyon en Gouvernman ki konn zis son lekor, ouswa enn ki pare a tou pri pou re investir dan son dimoun. Si nou pa pe investir dan goute avek dezennnen pour zanzan lekol, LDS pe rod mwayen pou kontinyen konstri plis *Day Care* dan bann kominote.

Konstri sant kominoter pou ofer en lespas pour lazenes epanouir, konstri fasilite sportif pou tir bann zenn dan move frekantasyon. Konstri bazar avek *ice plant* pour benefis peser, fer renovasyon bann Kordgard. Renouvle bokou lezot lenfrastruktir Leta ki rezim avan ti'n kit an rin ouswa dan labandon, parey bann Batiman Istorik, lasose, lekoleksetera.

Kontan, pa kontan. Me anba Ladministrasyon LDS sa pei pa'n koule e pa pou zanmen koule.

(APPLAUSE)

HON GERVAIS HENRIE

Ler menm nou bann oponan politik pe kontinyen swet maler pti Sesel. I kler ki sa ti swe e lapriyer nou oponan politik tou dilon sa dernyen 4an.

Isi menm la anndan zot in pas tou zot letan fer politik lo tou size, zis atak e kritik Ladministrasyon LDS san met okenn propozisyon konkret de lavan e dir ki mannyer zot, zot pou fer pli byen. Sa dernyen 4an in difisil. LDS in vwar li tousel san led ouswa senpati okenn son adverser politik.

Nou'n debout for nou pa'n les tonbe. Nou'n aksepte zot kritik nenport ler e toulezour. Nou pa'n tay nou

responsabilite. Nou'n fer en kantite travay pou remet Sesel lo son de lipye. Nou'n reisir par inyor tapaz ki zansla ankor pe fer e senpleman konsantre lo travay pou rekonstri Sesel.

Prezidan Ramkalawan in sa dirizan solid e eksperyanse pou anmenn Sesel lo en lot nivo. Alor nou desizyon i senp, *"No turning back"*.

ALL LDS MEMBERS

"Kit li lanmenm".

(APPLAUSE)

HON GERVAIS HENRIE

Fast forward, 4an pli tar. Nou lekonomi i stab. Nou pe re partaz larises avek popilasyon.

An 2025, Leta nou Nasyon pe permet Ladministrasyon LDS investir R1.86 bilyon dan bann proze kapital. Dan Sekter Ledikasyon, 8 milyon in garanti pou bann *loan* edikasyonnel atraver sistenm banker e R213.5 milyon in bidzete pour administre bann letid avanse.

Dan domenn lasante 87 milyon in ganny met de kote pou demar proze nouvo lopital. 50 milyon pour tretman spesyalize, 75.3 milyon pou aste latizann, 10.2 milyon pour vaksen, 9.3 milyon pour lantrennman bann profesyonnel lasante. 68.4 milyon pour kontrol bann

maladi e R53.1 milyon pour sistenm lenformasyon lasante entegral, ki rezim avan ti pe lager avek depi an 2019.

Dan domenn lakaz, Ladministrasyon LDS in met de kote R527.2 milyon pour bann nouvo proze e bann ki an kour. 128.2 milyon pe al pour bann proze *landbank*. Letan R10 milyon pe al pour ed nou bann ser avek frer ki pli vilnerab repar zot lakaz. Letan 5 milyon pe al pour bann dimoun aze repar zot twatir lakaz e letan R24 milyon pe al pou sibvansyon bann *loan* atraver *HFC*. Eski sa i pa en ladministrasyon dirize par en Prezidan ki annan son pep a ker?

Mr Speaker, Sekter Lozman i en reisit anba sa ladministrasyon. Letan ki Ladministrasyon Prezidan Faure atraver son program 24/24/24 in reisi konstri en total 435 lakaz, Ladministrasyon LDS anba direksyon Minis Billy Rangasamy pou'n reisi konstri 495 lakaz disi Septanm 2025, e en lot 266 lakaz pou'n komanse avan lafen lannen.

Sa reisit pa move ditou dan lespas selman 2an apre ravaz *COVID-19*. Se sa Leta nou Nasyon. E sa i rikord en ladministrasyon ki'n la pour zis 1600 zour. Parey Onorab *Leader Government Business* in dir nou, Mr Speaker.

Mon distrik Mont Buxton pa'n mal pase ditou depi ki zot in elekte mwan koman *MNA* e Prezidan Ramkalawan an Oktob 2020. Pandan sa dernyen 1600 zour en lenvestisman R3milyon 370mil in ganny fer dan distrik avek ki, nou'n reisi konplet 18 proze. Ki enkli konstriksyon *bin sites*, lagrandisman *grannrout*, konstriksyon *retaining wall*. Enstalasyon *railings*, konstriksyon *pon*, lagrandisman *playground* e konstriksyon omwen 6 santye avek peron.

Kot lalimyer semen i konsernen depi 2021, en total 132 lalimyer in ganny enstale partou atraver distrik ki reprezant 14 an 2021, 12 2022, 62 an 2023 e 44 lannen pase e pour lannen 2025 nou'n deza idantifye 25 nouvo landrwa pou enstal lalimyer.

Lazans Transpor lo Later *SLTA* in re sirfas an tou 20 semen segonder atraver Mont Buxton depi 2021 ziska la. Adisyonnelman, sa lazans in depans ant R500 a R700 mil sa dernyen 4an pou enstal bann *crash barriers*, siny trafik e osi laglas pou mark semen. Pou repar semen avek bann slab, pou koup pye dibwa, kas ros, konstri *retaining walls* e miray pou bar delo eksetera.

Kot mwayen finansyel Gouvernman pa'n posib, mon lofis an kolaborasyon avek Biro Ladministrasyon Distrik nou'n al fer debrouy pour *bus shelter* e 2 *playground* ki'n fek ariv dan pei sorti *Dubai* e ki pou ganny enstale kot *Housing Estate* Mont Signal avek *St Dominic Savio* dan bann semenn ki pe vini.

La mon oule dir en gro mersi Lanbasad Repiblik Popiler Lasin pour Sesel, pour zot zenerozite anver sa proze.

Mont Buxton Mr Speaker, pa dan lanmen en *MNA* ki zis konplent e vwar problem dan tou keksoz. Napa okenn gro lanmer ki fer mwan per, mon touzour pare pou rode e ganny en keksoz pou Mont Buxton.

Letan nou pe mazin lenvestisman dan Lepep Seselwa, Ladministrasyon *LDS* in met R31.5 milyon dan konstriksyon nouvo blok lekòl e R6.5 milyon dan renovasyon ansyen lekòl La Rosière. Devlopman lakaz osi i parey, kot en sonm R14.8 milyon finanse antyerman par Gouvernman Sesel pou konstri 16 *unit* 2 e 3 lasanm lo kare later V52200 Lari Hangar e travay in komanse. Sa i premye proze lakaz dan distrik depi 2015.

SLTA i annan R1 milyon pou agrandi semen Crève Cœur depi Lari Angar ziska

Roche Bois sa lannen. Mon langazman pour Mont Buxton dan bann lannen ki pe vini se vwar konstriksyon en nouvo sant kominoter disi 2027, 2028. Konstriksyon en *outdoor gym*, re sirfas avek renovasyon semen prensipal e konstriksyon detrwa semen segonder.

Pour tousala arrive, Mr Speaker in akòz en zefor kolektiv. Mon remersye tou Minister, departman e Lazans ki'n travay avek nou dan distrik depi Oktob 2020 ziska la pou materyaliz bann reisit ki mon'n mansyonnen avan.

Mon remersye bann *DAs* ki'n travay avek mwan pandan sa menm lannen e zot lekip. Mon dir mersi mon ansyen *Constituency Clerk* ki'n fek ganny apwente nouvo *DA*, Manmzel Antoinette Valentin pour son travay e sipor en kondisyonnel e swet li tou de bon dan son nouvo rol.

Mon pe *look forward* pou develop en menm relasyon travay avek mon nouvo *Clerk*, Manmzel Meanna Agathine.

Mon bann koleg *MNA's* in parey mon fanmir adopte ki'n gid mwan, e sa i enkli nou 2 ansyen koleg, Flory avek Naddy. 2 dimoun ki mon pros avek. Mersi pou zot lanmitye e bonn sans dan zot nouvo parkour.

Lo sa not mon *welcome*, sa 3 nouvo *MNA's* dan nou

lenstitisyon Lasanble Nasyonal.

Mr Speaker, mersi pour ou gidans, *leadership* e grander lespri ki ou demontre toulezour. Bann *activist* LDS Mont Buxton, mersi pour zot fidelite e pou kontinyen atrap mon lanmen e pou kondwir mwan. Pour tou zabitan Mont Buxton, mersi ki zot toultan la pou siport nou parti e ladministrasyon pei dan zot gran mazorite koman en lekip a sak moman ki nou'n bezwen zot sipor.

Dernyen not rekonesans i al pour tou dimoun san eksepsyon ki annan en rol dirizan dan nou kominote e ki zanmen in ezite rann mwan en servis letan mon'n tap lo zot laport pou ed e asiste Distrik Mont Buxton. Parey sanson i dir “mersi pour zot tou”.

Mr Speaker, lemonn i konnen pou dir sa 10 endividi lot kote latab pa'n ekout mesaz Prezidan Ramkalawan lo Leta Lanasyon, aköz zot ti demontre mank respe pli pir dan listwar Lasanble Nasyonal ler zot ti kit zot lakaz e ale. E osi kit zot lakour ler zot ti sorti lo *precinct* Lasanble Nasyonal e kit bann envite tousel dan milye zot salon.

Premye fwa nou'n temwann sa nivo mank respe dan nou lenstitisyon depi retour miltiparti.

(APPLAUSE)

HON GERVAIS HENRIE

Leta nou Nasyon i se ki nou annan en Lopoizisyon danzere e iresponsab. Enn ki son pase in enkli en listwar vyolan. Karakterize par koudeta, mert, disparisyon, deportasyon, detansyon e sirveyans ilegal. Met dife, san oubliy viktimizasyon, diskriminasyon e persekisyon politik.

Wi, se sanmenm group dimoun ki'n etabli listwar koman premye Lopoizisyon dan 3enm repiblik pou vot kont prensip e merit Bidze, sa ti an 2021 letan Sesel ti lo son zenou.

Mr Speaker, dan sa dernyen 4an, sa 10 dimoun in kontinyen ganny zot lapey tou le mwan, san oubliy zot logmantasyon osi. Selman si i annan en group dimoun ki'n etabli rikord *walk out* dan Lasanble se pa lot ki sa tim dimoun ki asiz laba.

(APPLAUSE)

HON GERVAIS HENRIE

Zot in *walk out* sa ki mon'n kapab trouve, 4 fwa an 2021, 2 fwa an 2022, 10 fwa an 2023, 4 fwa- 8 fwa an 2024 e la 2025, 3 fwa dan 3 zour. E zot nouvo Manm in etabli en nouvo rikord, i pret serman 3er, *walk out* 3er kar, re antre 5er e *walk out* 5er edmi.

(APPLAUSE)

HON GERVAIS HENRIE

Alor Mr Speaker, si nou pe rod legzanp move *service delivery*, trenn lipye e pares, lala legzanp.

(APPLAUSE)

HON GERVAIS HENRIE

E, 27 fwa *walk out* dan Lasanble Nasyonal! Onorab Hoareau in byen dir, parti *walk out*. Sanmenm sa group dimoun ki pe dir nou depi Mardi bomaten, ki napa naryen ki bon ki pe arive Sesel anba LDS.

Me ou ki onnet e annan lizye pou trouve e lizye pou analize, ki mannyer ou kapab agree avek sa bann kritik ki ou'n antann atraver sa 7 diskour lot kote latab ziska la?

Sa i sanmenm group dimoun ki ti oule met, ki ti met lobzeksyon Gouvernman pou enport vaksen, pou ouver erport, pou investir dan proze kapital, pou pa ferm *Schemes FA4JR* e *URS* e pou pa entrodwir en program 13enm mwan saler ki rekonpans produktivite.

Me pli gran lafors Ladministrasyon LDS se lefe ki i pa pran bann desizyon *populiste* me plito bann desizyon ki apropiye, difisil, brav e dan lentere nasyonal.

Nou kontan vwar ki sa pe met pei lo en direksyon pozitiv kot i pe sanz lespri e fason fer nou pep.

Atraver tousala, lazenes Seselwa ki lavenir nou nasyon ki pou rekolte bann benefis. Alor ou ki en zenn e ki pe ekoute, eski ou ti konnen ki alors en zour ti annan en sistenm an plas ki ti verifie lapartenans politik en endividi avek son lwayote avek parti o pouvwar?

Sa sistenm ti en *background check* ki ti en kondisyon pour ou ganny travay dan Gouvernman, ganny en labours e loportinite fer biznes dan nou pei.

Eski ou ki zenn, ou vwar li zistifyab ki menm ler ou *perform* byen dan en *job interview* e ou posed kalifikasyon. Avek leksperyans pour en louvraz, me lapartenans politik ou paran si pa ti anliny avek sa ki pour Parti *SPUP*, *SPPF*, Parti Lepep e *US*, ti fer ki zanmen ou ti pou ganny sa louvraz?

Eski ou ki zenn, ou vwar li normal ki menm ler ou annan sifizaman pwen pou kalifye pou en labours Leta, me aköz ou pa partisip dan okenn aktivite ki organize dan sant kominoter ou distrik e organize par biro ladministrasyon distrik, *US* ti pou fer ou perdi ou *scholarship*?

Eski ou ki zenn, ou vwar li akseptab ki si ou ti met triko en parti politik ki diferan avek *US* ler i ti o pouvwar, ou ti pou *end up* pas martir ganny travay dan servis piblik, ganny difikilte ganny en *loan* avek bann antite finansyel Leta ouswa ganny sere letan ou pe sey akse servis Leta.

Wi, lazenes Mont Buxton e partou dan Sesel ki pe ekout mwan, sa ti larealite nou pei depi 1977.

(APPLAUSE)

HON GERVAIS HENRIE

Ziska an 2020 letan *LDS* ti vin o pouvwar.

Sa ti en program anba ki Parti *SPUP*, *SPPF*, Parti Lepep e *US* ti persekit lazenes Seselwa ki pa ti siport zot. I ti apel sistenm *security clearance* e i ti ganny zere anler *State House*.

Alors laprosenn fwa ki ou deside met en triko rouz e al danse dan *United Square* ouswa al debout par deryer bann politisyen *US* lo *stage*, eski ou konnen ek ki ou pe asosye ou lekor? Eski ou konnen ki ou pe fer la? Eski sanmenm sa parti e opsyon pour Sesel ki oule? Nou dan *LDS* nou pe dir *no turning back*!

ALL LDS MEMBERS

“Kit li lanmenm”.

(APPLAUSE)

HON GERVAIS HENRIE

Aprezan vir nou latansyon lo *LDS* pour en moman. Zis 4an apre ki nou'n vin dan lofis, Prezidan Ramkalawan in raport *Africa Freedom Award*, koman en dirizan ki promouvwar la demokrasi avek laliberte e pou diriz par legzanp lo Kontinan Afriken.

MR SPEAKER

30 minit Onorab! Konkli.

HON GERVAIS HENRIE

Dousman, dousman bann valer parey responsabilite, respe, e Sesel san viktimizasyon, meritokrasi, servis pou lepep pe vin priyorite e la demokrasi pe vin en realite.

Eski alor nou anvi retourn an aryer? Nou pe dir, “*No turning back*!”

ALL LDS MEMBERS

“Kit li lanmenm”.

(APPLAUSE)

HON GERVAIS HENRIE

Lazenes Seselwa e zenerasyon fitir i *deserve better and things can get better only with LDS*. Mersi Mr Speaker.

(APPLAUSE)

MR SPEAKER

Mersi Onorab. Nou a termin la pou ozordi. Lasanble i ava *adjourn* ziska demen bomaten 9er pou kontinyasyon deba lo Leta Lanasyon. Mersi.

(ADJOURNMENT)